

# 桂苑筆耕

一

國家圖書館 NATIONAL CENTRAL LIBRARY, TAIWAN, R.O.C

(公分)

23 x 16.8

13494

4 册

006787

國立中央圖書館藏善本

書碼: 集刻集新 之屬

書名: 桂苑筆耕集

著者: 魏晉致遠撰 二〇卷 四册

版本: 清道光十四年刻湖南布政使林有梁法華本



校印桂苑筆耕集序

記有之曰酒醴之美而玄酒明水之尚貴五味之本也黼黻文繡之美而疏布之尚反女功之始也古之君子必重其本始如此吾東方之有文章而能著書傳後者自孤雲崔公始吾東方之士北學于中國而以文聲天下者亦自崔公始崔公之書傳于後者唯桂苑筆耕與中山覆篋集二部是二書者亦吾東方文章之本始也吾東方以文爲尚至我朝益煥以融家燕許而戶曹劉以詩若文成集者無慮充棟宇矣而顧鮮有知崔公之書者余嘗見近代人所撰東



NATIONAL CENTRAL LIBRARY, TAIWAN, R.O.C.



國書目有載中山覆篋集者徧求之終不可得唯桂苑筆耕二十卷爲吾家先世舊藏自童幼時知珍而玩之然間以語人雖博雅能文而好古者亦皆言未曾見然則是書也幾乎絕矣使是書不行于東方是玄酒不設于太室而疏布不羈于犧樽也豈所以教民不忘本哉世或謂公文皆駢儷四六殊不類古作者公之入中國在唐懿僖之際中國之文方專事駢儷風會所趨固有不得而免者然觀公所爲辭逞逞多華而不浮如檄黃巢一篇氣勁意直絕不以雕鏤爲工至其詩平易近雅尤非晚唐人所可及是蓋以

明水疏布之質而兼有乎酒醴黼黻之美者豈不彌可珍哉公在中國取科第入軍府亦旣已聲施當時矣而一朝去之如脫屣及歸東方躋翰苑貳兵部以至阿漚阿漚者新羅大官其顯用方未已也而顧又自放於山林寂寞之濱以終老其身而不悔蓋度其時之皆不可有爲也士君子立身蹈道莫有大乎出處之際出處而不失其時非賢者不能也賢者之作固不可使其無傳况其文傑然如彼而又爲東國文章之本始者哉湖南觀察使徐公準平卽余所稱博雅能文而好古者也聞余蓄是書亟取而校之捐其



俸搨以活字得數十百本用廣其傳曰不可使是書絕于東國也嗚呼不忘本始教民厚也表章賢人勸民善也徐公之用心也如此其所以爲政於湖南者亦可知已役旣完徐公屬余曰子實傳是書今不可以靳一言余辭不能得若崔公之蹟行本末與是書之可備攷證者徐公之序詳之矣余無所復贅云甲午九月大匡輔國崇祿大夫議政府左議政豐山洪奭周序

校印桂苑筆耕集序

桂苑筆耕集二十卷新羅孤雲崔公在唐淮南幕府時公私應酬之作而東還之後手編表進于朝者也公名致遠字海夫孤雲其號也湖南之沃溝人幼穎慧絕倫年十二從商舶入中原十八舉進士第久之調溧水縣尉任滿而罷時值黃巢之亂諸道行營都統高駢開府淮南辟公爲都統巡官凡表狀文告皆出公手其討黃巢檄天下傳誦奏除殿中侍御史賜緋魚袋後四年充國信使東歸事憲康王定康王爲翰林學士兵部侍郎出爲武城太守真聖時挈家入



江陽郡伽椰山以終焉葬在湖西之鴻山或謂公羽化者妄也夫以海隅偏壤之產而弱齡北學取科宦如拾芥終以文章鳴一世同時賓貢之流莫之或先豈不誠豪傑之士哉若其居幕數載知高駢之不足有爲呂用之諸葛殷等之誕妄必敗超然引去去三年而淮南亂作則又有似乎知幾明哲之君子其人與文要之可傳不可泯者也據進表是集之外復有今體賦一卷今體詩一卷雜詩賦一卷中山覆篋集五卷唐藝文志則稱桂苑筆耕二十卷文集三十卷而他皆不傳唯是集屢經鈔印板刻舊佚搨本亦絕

罕癸巳秋余按察湖南巡到武城謁公書院裴徊乎石龜流觴臺之間俛仰遺躅有餘慨焉會淵泉洪公以是集寄曰此近千年不絕如綫之文獻耳子其無流通古書之思乎余如獲拱璧懼其愈遠而愈佚也亟加証校用聚珍字擺印分藏諸泰仁縣之武城書院陝川郡之伽椰寺嗟乎名醞之坊必題杜康良劍之鐔必標歐冶爲其不忘本始也我東詩文集之祇今傳者不得不以是集爲開山鼻祖是亦東方藝苑之本始也庸詎可一任其銷沉殘滅而不之圖哉東還後著作散逸無傳唯有梵宮祠墓之間披林藪剔



苔蘚尙可得十數篇彙附原集剗刷壽傳余竊有志而未遑云按史稱中和二年正月王鐸代高駢爲諸道行營都統五月加高駢侍中罷鹽鐵轉運使駢旣失兵柄復解利權攘袂大詬上表自訴言辭不遜上命鄭畋草詔切責之今考集中有謝加侍中表巽辭引咎而已無一語激忿勃謾又有謝賜宣慰表云仰瞻綸音深嘉秕政師徒輯睦黎庶安寧其假借慰獎也若是之慙摯史所謂草詔切責者無乃非當時實錄也歟又按中和紀年止於四年而公進表年月系以中和六年蓋公以中和四年十月浮海翌年春始

抵國又翌年編進是集而前一年之改元光啓容或未聞知也

歲在闕逢敦牂中元達城徐有桀書于湖南布政司之觀風軒中



桂苑筆耕序

淮南入本國兼送詔書等使前都統巡官承務郎  
侍御史內供奉賜紫金魚袋臣崔致遠進所著雜  
詩賦及表奏集二十八卷具錄如後

私試今體賦五首一卷

五言七言今體詩共一百首一卷

雜詩賦共三十首一卷

中山覆篋集一部五卷

桂苑筆耕集一部二十卷

右臣自年十二離家西泛當乘桴之際亡父誡之曰



十年不第進士則勿謂吾兒吾亦不謂有兒往矣勤  
哉無隳乃力臣佩服嚴訓不敢弭忘懸刺無違冀諧  
養志實得人百之已千之觀光六年金名榜尾此時  
諷詠情性寓物名篇曰賦曰詩幾溢箱篋但以童子  
篆刻壯夫所慙及忝得魚皆爲棄物尋以浪跡東都  
筆作飯囊遂有賦五首詩一百首雜詩賦三十首共  
成三篇爾後調授宣州溧水縣尉祿厚官閒飽食終  
日仕優則學免擲寸陰公私所爲有集五卷益勵爲  
山之志爰標覆簣之名地號中山遂冠其首及罷微  
秩從職淮南蒙高侍中專委筆硯軍書輻至竭力抵

當四年用心萬有餘首然淘之汰之十無一二敢比  
披沙見寶粗勝毀瓦畫墁遂勒成桂苑集二十卷臣  
適當亂離寓食戎幕所謂饘於是粥於是輒以筆耕  
爲目仍以王韶之語前事可憑雖則傴僂言歸有慙  
鳧雀旣墾旣耨用破情田自惜微勞冀達聖鑑其詩  
賦表狀等集二十八卷隨狀奉進謹進

中和六年正月日前都統巡官承務郎侍御史  
內供奉賜紫金魚袋臣崔致遠狀奏

桂苑筆耕集一部二十卷

都統巡官侍御史內供奉崔致遠撰







桂苑筆耕集卷之一

表一十首

都統巡官侍御史內供奉崔致遠 撰

賀改年號表

賀通和南蠻表

賀建王除魏博表

賀封公主表

賀殺戮黃巢徒伴表

賀處斬草賊阡能表

賀收復京闕表

賀殺黃巢表

賀降德音表

賀廻駕日不許進歌樂表

賀改年號表

臣某言今月某日得進奏院狀報奉十一日宣下改  
廣明元年爲中和元年者展義龜城易名鳳紀美號



既新於曆象歡聲遍振於寰區臣某誠抃誠躍頓首  
頓首臣謹案王制云天子西巡狩命典禮考時月定  
日同律然則三秋啓候萬乘省方金郊興肅殺之風  
玉壘應巡遊之地遂遵規於舉正爰降命於改元且  
大戴禮曰中也者天下之大本和也者天下之達道  
致中和天地位焉萬物育焉故漢益州刺史王襄俾  
蜀詞人王褒作中和樂職宣布之詩以歌君德耆舊  
傳揚况及聖朝曾編新樂舉二月恬和之節播八風  
調暢之音永驗休譚實諧昌運伏惟聖神聰睿仁哲  
明孝皇帝陛下纂承寶位丕闡皇猷將務格苗暫勞

避狄風始行於地上易象可徵日再耀於天中休禎  
斯在是以紀年有裕懸法無虧帝業中興則遠超於  
前漢後漢物情允洽則近繼於元和太和足可使蠢  
植昭蘇華夷悅服掩神雀黃龍之瑞應河清海晏之  
期則彼蕞爾叛徒騷然嘯聚偶縱煙塵之患卽歸原  
野之誅佇廻西幸之儀便舉東封之禮臣今者旣獲  
成師以出必能仗義而行跡泛戈船心馳劔閣冀陳  
戎捷永賀堯年臨楚水以魂飛朝天可待望秦雲而  
目極捧日爲期未獲榮列朝班稱慶行在無任抃躍  
戰懼屏營之至謹奉表陳賀以聞臣某誠歡誠喜頓



首頓首謹言

賀通和南蠻表

臣某言臣得進奏院狀報入南蠻通和使劉光裕等  
廻雲南通和兼進獻國信金銀器物疋段香藥馬等  
者天威遠振星使遄歸化外癡內黠之徒竭奉贄獻  
琛之禮德既超於萬古恩已洽於四夷臣某誠欣誠  
抃頓首頓首伏以聖主卜征旣以用和爲貴遠人從  
化自知犯義不祥是得事尙從權德資含垢言皆答  
響禮不違經且南蠻嘗懷異謀久稔邊患數年猾夏  
獨虧控北之誠列鎮徵兵驟動征南之役則乘虛可

慮怙亂難防今者鳳口銜書纔飛遠地狼心感德永  
順皇風有以見皇帝陛下法古爲君視人如子以藏  
疾匿瑕爲妙策以玩兵黷武爲良箴能昭利害之鄉  
不失羈縻之道遂使要服修貢賓旅歸仁適當多事  
之秋已見太平之兆則彼驃信實狗封之族尙革昏  
迷賊巢迺蟻聚之羣何難撲滅佇聆大捷永賀中興  
必可驅堯舜而殿禹湯苑五岳而池四海盛矣美矣  
念茲在茲臣頃者禦寇交州董戎蜀郡先則展馬援  
討除之勢後乃設隨何說諭之機仰托皇威粗申將  
略喜當今日免負初心限守藩條不獲稱慶行在無



任賀聖戀恩欣躍屏營之至謹奉表陳賀以聞臣某誠抃誠躍頓首頓首謹言

賀建王除魏博表

臣某言臣得進奏院狀報二月二十二日恩除建王可開府儀同三司兼太保充魏博節度使者維城茂德列土殊勞逮分閩外之憂實表寰中之慶臣某誠歡誠喜頓首頓首臣聆周歌麟趾漢譬犬牙固須地處親賢方得天垂寵寄伏以建王修善爲樂居高不危好書而旣擅多才獻表而肯慙求試今以鄴稱上鎮魏有大名將資磐石之宗遂錫分圭之寵豈獨漳

濱之俗遠荷恩威永令海內之人皆歌德業臣限守藩鎮不獲稱慶行在無任踴躍屏營之至謹奉表陳賀以聞臣某誠欣誠躍頓首頓首謹言

賀封公主表

臣某言臣得進奏院狀報奉去年十月十四日勅旨皇帝第十一妹封遂寧公主長女封唐興公主次女封永平公主待收復京闕備禮冊命者芳舒玉葉寵襲金根鬱佳氣於高天振歡聲於率土臣某誠欣誠抃頓首頓首伏以遂寧公主德資元吉考祥於歸妹之占唐興公主永平公主譽洽肅雍稟慶於降嬪之



典伴嫦娥於獨月分婺女於雙星秀發青春光浮碧  
落伏惟皇帝陛下齊家理國恭已敬親流鳳展之殊  
恩舉鸞閨之美命猶以暫勞仙蹕未復皇都畱具禮  
於宮闈待成功於干羽捧日而榮滋九族欽風而喜  
播四方臣限守藩條不獲陪位稱慶行在無任抃蹈  
聳踴之至謹奉表陳賀以聞臣某誠喜誠躍頓首頓  
首謹言

賀殺戮黃巢徒伴表

臣某言臣得進奏院狀報北路軍前定難軍節度使  
拓跋思恭保大軍節度使東方逵等奏宣君縣南殺

戮逆賊黃巢徒伴二萬餘人生擒三千人並賊將者  
又鳳翔節度使李昌言奏探知京中賊徒潰散六月  
十三日皇帝御宣政殿排仗受宰臣及百僚賀禮畢  
者睿謀遠叶戎捷遄陳開雉扇而儼皇威舉鸞旌而  
恭列辟天浮喜氣地匝歡聲臣某誠喜誠抃頓首頓  
首伏以逆賊黃巢嘯聚兇狂偷生晷刻養姦而惟日  
不足恃暴而謂天可欺敢驅螻蟻之羣累拒熊羆之  
衆孽唯自作罪欲何逃拓跋思恭東方逵等身居重  
位手握雄師氣吞蠹彼之徒志解赫斯之怒齊驅於  
六步七步果剗於左之右之戰于野而騰威戎難伏



莽拘諸原而騁勇勢若焚枯不唯剝面搥喉乃得連  
頭係頸况李昌言鎮於岐下伺彼京中識虞譚鷹集  
之祥辯師曠鳥聲之樂遂飛吉語遠達宸聰佇看大  
戮之期克踐中興之運伏惟聖神聰睿仁哲明孝皇  
帝陛下財成三極敦叙九疇出震位而臨人方瞻堯  
日幸坤維而罪已更闡舜風暫勞遵養之師遙委仁  
賢之將既誅逆黨爰列賀班濯錦江邊已睹霞舒綵  
仗蒼龍闕下卽聆雷振鑾音永清四海之波遍灑九  
天之澤臣謬操鈇鉞尙默鼓鼙未唱凱歌唯知拊舞  
顧彭野之久妨道路怒髮雖衝望秦原而將滅煙塵

愁眉已展臣限拘守鎮不獲稱慶行在無任欣抃聳  
踴屏營之至謹奉表陳賀以聞臣某誠歡誠躍頓首  
頓首謹言

賀處斬草賊阡能表

臣某言得進奏院狀報西川都將高仁厚部領兵馬  
收捉草賊阡能已於十月十八日並處置訖二十一  
日聖駕出羅城北樓宣慰廻戈將士各賜優賞放歸  
本營者遠耀日旗高張天網梟帥已歸於大戮鴻圖  
永耀於中興臣某誠歡誠抃頓首頓首臣伏以草賊  
阡能跡陷迷津心辜聖澤短狐稔射人之毒瘕狗喧



吠主之聲高仁厚逐惡志雄擒奸氣勇仰資睿略靜  
剗兇徒伏惟皇帝陛下有罪必誅無思不服歌採薇  
而遣卒念破竹之成功親降如綸之言遍安被練之  
卒妖氛息而綿山益翠喜氣浮而錦水先春自此遠  
振軍聲深摧寇黨覆頑巢而在卽迴法駕以何遙臣  
方事專征先聆吉語限拘藩鎮不獲稱慶行在無任  
踴躍屏營之至謹奉表陳賀以聞臣某誠歡誠喜頓  
首頓首謹言

賀收復京闕表

臣某言臣得河中節度使王重榮牒報四月十日當

道與鴈門節度使李克用及都監楊復光下諸都馬  
軍齊入京城與賊交戰約殺却賊步軍一萬餘人其  
馬軍賊便走出城往東南路去其賊軍家口錢帛並  
皆遺下黃巢亦未知存亡其逃遁賊徒尋差兵馬追  
奔並已收復京闕訖者天威耀武月捷傳聲望宸階  
而初奏凱歌舉區宇而咸增抃舞臣某誠喜誠躍頓  
首頓首臣竊窺曩代旁採前經靜理邦家必須以殺  
止殺保安社稷固在雖休勿休是故不得已而用兵  
無所私而煦物伏惟皇帝陛下纂臨寶位丕闡宏圖  
匝四溟而不見揚波安九野而皆能偃草而乃逆賊



相列筆耕卷一  
黃巢暗遵邪徑深入禍門久騰吠噪之聲敢恣穿窬之便穢黷宮闕淹延歲時偷安暫戲於鼎中戮暴難逃於机上今者風行睿略雨集王師楊復光任在信臣李克用名爲勇將各思報効競奮驍雄齊心而覆滅梟巢戮力而尅收鳳里賊巢拒輪不暇亂轍潛奔干戈則電散風飛金帛則填街塞巷更展追遊之勢必擒稔惡之徒自此日月重光煙塵永息唯望宸遊之返駕佇觀盛禮於登封臣職忝董戎功慙徇難雖手無重柄數年虧奮擊之能而耳得嘉聲遠地倍歡呼之功臣限拘藩鎮不獲稱賀行在無任手舞足蹈

慶抃屏營之至謹奉表陳賀以聞臣某誠喜誠躍頓首頓首謹言

賀殺黃巢表

臣某言臣得武寧節度使時溥狀報逆賊黃巢尙讓分隊並在東北界於六月十五日行營都將李師說陳景瑜等於萊蕪縣北大滅羣兇至十七日遂被賊將僞僕射林言梟斬黃巢首級並將徒伴降部下都將李惟政田球等訖其黃巢函首已送行在者聖日重耀狂氛暗銷戎捷超於古今歡聲振於夷夏臣某誠抃誠躍頓首頓首臣伏以歲有四時則秋行肅殺



之令武有七德則兵貴禁戢之能是故歲以無相奪而克成兵所不得已而方用自革結繩之政皆勞祝網之仁賊巢食土懷頑含沙稔毒深犯天紀廣致地災九州則半致侵凌三輔則久經穢黷擢髮而旣難數罪搯喉而只待懲姦今者窮寇迴心元兇授首殺傷者少歸附居多有征無戰之言實符王道以靜待勞之勢深叶軍機伏惟皇帝陛下運啓中興功資下武睹天鑑而實爲大警聽風謠而非止少康永當銷干戈之鋒便可鑄耒耜之器况乃西山八國數年飽巡幸之恩東岳百神終日渴登封之禮佇迎雲馭俯

納巖音臣密邇寇戎撫安疆境不暇爭鋒而進實防代俎之譏慙虧犬馬之勞喜睹鯨鯢之戮手舞足蹈魂飛膽揚臣限守藩條不獲奔走稱賀行在無任慶抃兢越之至謹奉表陳賀以聞臣某誠歡誠喜頓首頓首謹言

賀降德音表

臣某言臣得進奏院狀報司天臺奏六月十六日夜太陰虧伏奉六月二十三日德音應三川管內見禁囚徒等宜委所在長吏五日內疎理決遣其京畿四面暴露骸骨宜委諸鎮切准前後勅旨差人收拾埋



瘞者望舒匿影曲赦流恩化洽泣辜義資掩骼振歡  
聲於蜀壘蕩妖氛於秦川臣某誠抃誠躍頓首頓首  
臣伏以日能順晷而照臨不失其所月以順時而盈  
缺則維其常况當蓂葉初凋桂輪自減兵銷下土非  
石麟暗鬪於東陵謫見上天致玉兔暫虧於西汜既  
同君子之過乃軫聖人之憂伏惟聖神聰睿仁哲明  
孝皇帝陛下光闡睿圖保寧區宇仁能及遠德以勝  
妖爰當展義之辰克舉眚災之典慈傷痍死牢囚免  
滯於風霜義貫幽魂道殫皆沾於雨露可使涪水耀  
千年之色巴山呼萬歲之聲道能繼於垂衣法無妨

於委轡佇迴巡幸仰賀登封臣限守戎藩不獲稱賀  
行在無任抃躍屏營之至謹奉表陳賀以聞臣某誠  
歡誠喜頓首頓首謹言

賀迴駕日不許進歌樂表

臣某言臣得進奏院狀報伏審勅旨迴駕日應沿路  
州縣切不得輒進歌樂及屠殺者聲除飾喜味減薦  
珍遠遵罪已之言深播好生之德凡於蠢動孰不歡  
呼臣某誠抃誠躍頓首頓首伏惟皇帝陛下日月運  
行雷雨作解體堯舜之理能咸若法禹湯之興必勃  
焉退庭舞而撤宮懸惡衣服而非飲食一慈二儉守



玄祖之格言沐雨櫛風稟太宗之不訓今則冕旒東顧  
榑杗西移師乙收心無以逞鏗錡之曲庖丁斂手何由  
挫彀鯨之形義感六牲恩加萬姓則乃蜀山力士旣無  
煩役之虞漢水老人豈有深譏之事帝業永資於下武  
物情皆慶於中興臣方擁戎旃阻隨仙蹕遙思盛禮空  
馳拱北之誠願報深恩但勵鎮南之志無任抃躍屏營  
之至謹奉表陳賀以聞臣某誠歡誠喜頓首頓首謹言

桂苑筆耕集卷之一



桂苑筆耕集卷之二

表一十首

謝加太尉表

謝示南蠻通和事宜表

謝立西川築城碑表

謝賜御製真贊表

謝御札衣襟並國信表

謝就加侍中表

謝賜宣慰兼加

侍中  
實封

表

請巡幸江淮表

請巡幸第二表

讓官請致仕表

謝加太尉表

臣某言今月某日宣慰使供奉官嚴遵美至奉宣聖旨慰諭臣及將校等並賜臣勅書手詔各一封加臣檢校太尉依前充淮南節度使兼東面都統者仰窺



鳳詔謂對龍顏寵榮極而何力負山戰灼深而自容  
無地臣某誠抃誠感頓首頓首臣伏以大司馬之威  
權百官所仰上將軍之法令十道皆遵豈唯整戢五  
兵實在諧和七政况當今日宜屬全材如臣者德乏  
潤身智虧周物於儒則筆慙五色在武則劔敵一夫  
但以荷寵天庭分憂水國擁旄重寄榮冠絕於一時  
仗鉞專征冀折衝於萬里幸逢聖鑑得盡忠誠今者  
已率雄師將誅巨猾征旗指路遠趨堯日之光戰艦  
凌波方託舜風之力豈期王人遠降帝命俄臨獎其  
外鎮之微勞授以上司之劇任未著緇衣之美旋叨

錦被之榮况乃兼制利權廣潤軍食瑞節不移於南  
堯兵符亦縮於東陲將何異能勝此寵寄謹當冰爲  
夕飯蘖作朝飡褰帷則面撫烝黎建旆則身先士卒  
羣寇旣蝟毛而起偶恣俯張諸侯必馬首是瞻共成  
剪滅唯力斯視何心自安必也臨亂忘身見危致命  
仰解焦勞之念粗伸式遏之功臣旣當下瀨屯師佇  
欲中流設誓枕雕戈而輟寐跡寄轅門瞻帝座而馳  
誠魂飛輦路未獲稱謝行在無任感恩戀聖榮抃戰  
懼之至謹因宣慰使嚴遵美廻附表陳謝以聞臣某  
誠感誠懼頓首頓首謹言



謝示南蠻通和事宜表

臣某言二月二十六日宣慰使供奉官李從孟至伏奉勅旨入鶴拓使胄嗣王龜年閣門使劉光裕等廻得驃信表並國信兼布燮揚奇肱與西川節度使書皆備述情誠無不順命其表及書白並答信物數並令錄往此事首末自卿良謀者遠降王言深窺使節跪閱上天之旨坐知外域之心寵飾踰涯憂惶若厲臣某誠抃誠躍頓首頓首臣才非間代智不濟時但以每鎮窮邊粗安荒服免使飽飛飢附欲令前倨後恭頃者忝守成都冀申遠略遂憑釋子善諭蒙王仰

稟天威得揚風教永戢干戈之患俾陳玉帛之儀雖羣議沸騰競銜鑠金之口而宸衷剴斷早推匪石之心是以暫事西巡或虞南叛爰遣維城貴胄直閣近臣廻聖德以降尊遠傳玄化譯訛言而獻欵備寫真誠既令抱義戴仁果見奉琛執贄此皆陛下威德臣何力之有焉而迺謂臣有先見之能知未來之事設和蠻之良策備幸蜀之嚴城俯錄勤勞迴垂稱獎睹雕題之章奏書軌既同息猾夏之猜嫌梯航相接驗南琛之贖咎知北極之紓憂雖云五利有餘敢希茂賞唯願四方無事永贊昌期臣限守藩條不獲稱謝



相列筆耕卷二  
行在無任欣躍感戴兢惕之至謹因供奉官李從孟  
廻附表陳謝以聞臣某誠惶誠恐頓首頓首謹言

謝立西川築城碑表

臣某言伏奉十一月六日勅旨以臣在任西川節度  
使日創築羅城昨因有勅嘉獎方進所賜碑詞今已  
付所司鐫寫建立者一片石文龜初戴立九重天語  
鳳已銜來雕銘莫繼於色絲寵飾遽超於華袞仰窺  
恩獎俯抱憂惶臣某誠感誠懼頓首頓首頃者幸夢  
三刀久臨益部遙提一劍得挫蒙兵但以其玉壘可  
稱金城未設山口則空吞蠻蠻水頭則斜枕犍犛含

溪抱谷之形雖云天險比屋連甍之勢實類野居臣  
是以運度籌謀斟量板築蓋從人欲果致子來遂得  
役興而草偃川中誠感而土生石上長圍於三十六  
里高鎮於百千萬年不愧鐵名可將錐試隼墉烏堞  
儼若騫飛錦浪綿峯迥然裝飾遂蒙陛下辱褒稱之  
重許刊勒之榮以爲事實可觀足得詞華不朽臣雖  
遇泥封激賞豈將油素矜誇非敢彰謙所期避謗今  
者伏遇皇帝陛下遠巡勝槩親覽微功徵舊賜之碑  
詞命新鐫之筆跡永使卓立琴臺之境平欺劔閣之  
銘且杜元凱之峴亭無非自銜阮德規之齊國蓋是



相苑筆錄卷二  
衆成謾傳身後之虛名豈睹目前之盛事曷若彩毫  
見獎翠琰斯刊因成下土之功終應上天之意得逢  
今日別振孤風向非陛下錄善恩深酬勞德厚則何  
以未有出師之業篆刻叨榮曾無興學之規傳揚竊  
美臣限拘鎮守不獲稱謝行在無任感戴欣躍戰懼  
之至謹奉表陳謝以聞臣某誠惶誠恐頓首頓首謹  
言

謝賜御製真贊表

臣某言二月二十六日宣慰使供奉官李從孟至伏  
奉勅旨已令於大慈寺御真院寫朕真並扈從宰臣

等真列卿儀貌俱會此堂今先寄卿真軸並朕親製  
贊述賜卿冀表顯恩式彰異禮者銀璫降使玉簡傳  
詞受宣而頂踵光輝拜賜而神魂驚越臣某誠感誠  
懼頓首頓首臣志欽涓訣業鍊圮書敢憑涓滴之勞  
自安寵寄願掃氛霧之患永竭忠誠遂在先朝便從  
戎役南征北伐豈暇寧居東鎮南藩累叨重任遇陛  
下龍飛之後委微臣隼擊之能蜀國防蠻則粗伸遠  
略楚宮捍寇則偶遂良機旋令移節於海門復許建  
牙於淮甸是以常拘戎闔未覲宸階唯披上天之詔  
書似睹日中之玉字空增戀闕莫遂歸期頃者虔託



仁祠寫畱麼質豈致去思於舊鎮唯慙取笑於空門  
伏遇陛下展義陳詩停鑾駐蹕遂徵繪事俾寫聖容  
其於侍從之臣宜居左右豈料孱微之質得潤丹青  
愧無鸞領之姿永侍龍顏之側况蒙宸襟顧矚御筆  
贊揚高題而素壁爭輝卓立而浮埃不染然後遠飛  
寵詔特遣貴臣乍捧綵牋驟竊游揚之譽初開寶軸  
深驚刻畫之恩窺看而形影自慙感激而肺腸何極  
昔漢朝中興聖帝下念功臣列形像於禁宮載勳名  
於史筆雖令贊述不自稱揚豈如陛下暫事巡遊迥  
垂獎飾別降絲綸之命親編錦繡之詞俾臣位掛於

鳳凰池中名超於麒麟閣上遐尋故實獨荷殊榮有  
何出衆之能見此非常之寵所謂千年嘉遇萬代美  
譚唯當志勵風霜永驗松筠之不改身霑雨露免憂  
蒲柳之先衰臣限守藩條不獲稱謝行在無任感恩  
戀聖榮躍兢懼之至謹因供奉官李從孟廻附表陳  
謝以聞臣某誠惶誠恐頓首頓首謹言

謝御札衣襟並國信表

臣某言二月二十六日宣慰使李從孟至伏蒙聖恩  
別賜臣御札衣襟並御服衫一領龍腦香一金合金  
銀花散碗一口金花銀盃一隻者缺窺神筆恩襲御



衣仙香氣撲於鼻根寶器光騰於眼界仰霑寵錫俯  
積憂兢臣某誠感誠懼頓首頓首臣每念業紹弓裘  
任叨斧鉞誓傾忠節終報聖朝去年親率驍雄願殲  
兇醜旋承綸音已駐舟師旣慙叩楫之言徒切枕戈  
之望豈期貂冠傳命龍袞裁書辱宣尼一字之褒過  
光武十行之詔加以粉分御筥香滿雕奩花鐫乃麗  
水之珍雪缺透任山之器捧玩而實驚寮吏緘藏而  
永耀子孫雖有幸逢時輝榮驟集而無功受賞愧恥  
難居徒荷鴻私何申豹略身依楚水未陳告捷之書  
目斷蜀天但灑感恩之淚臣限守藩鎮不獲稱謝行

在無任荷戴激切榮抃兢懼之至謹因供奉官李從  
孟廻附表陳謝以聞臣某誠惶誠恐頓首頓首謹言  
謝就加侍中表

臣某言臣伏奉去年十一月十一日恩制加授臣侍  
中依前淮南節度使階勳封並如故仍加食實封一  
百戶者有命自天處身無地感深以泣寵極而驚臣  
誠抃誠懼頓首頓首伏以黜陟分科聖君至教行藏  
守道達士良規慮受爵以斯亡在持盈而不殆臣自  
提權筦便遇兵戈郡邑爲征戰之場山海足逋逃之  
藪旣難聚利莫遂成功况乃權有他門刃無餘地動



見越庖代俎無非避柱觸楹遂虧漕輓之程僅壞銅鹽之法伏蒙皇帝陛下俯詳直道不寘嚴誅選用良才改移重務而乃察臣在公之節念臣戀主之誠重委將壇更增封邑恕乏一時之秀許攀七葉之榮唯慮慙卿或譏竊位然臣今所以自賀者三朝獨立七鎮榮遷每當拜爵王庭不省謝恩私室以茲勵已永免愧人謹當激發壯圖殲夷窮寇粗息四方之患仰寬萬乘之憂臣限守藩條不獲稱謝行在感恩戰灼屏營之至謹奉表陳謝以聞臣某誠慙誠懼頓首頓首謹言

謝賜宣慰兼加侍中實封表

臣某言六月十六日供奉官劉叔齊至奉宣聖旨慰諭臣及將校並賜臣勅書手詔各一封官告一通就加臣侍中仍加食實封一百戶餘如故者自天降命無地安身啓鳳詔而魂驚對貂冠而股慄臣某誠感誠懼頓首頓首臣早因薄效每忝殊榮勤王而素乏實勤受爵而但多虛受負山寡力臨谷戒心况自我馬生郊陣蛇出穴妖氛蔽闕法駕省方臣久鎮雄藩嘗提重柄一無成績兩拜寵章前者以上將軍爲大司馬今則兼納言之任加眞食之榮累年虧橫草之



功終日抱伐檀之恥且易曰或錫鞶帶終朝三褫之  
詩云受爵不讓至于已斯亡遍覽格言是懲貪祿不  
能報國苟欲榮家臣實何心有覲于目但遇王人遠  
降聖澤旁流仰睹綸音深嘉稅政以爲師徒輯睦黎  
庶安寧俯念忠誠特行懋賞臣也方寸之地可倚咫  
尺之顏不違豈敢矯俗陳情節詞讓爵難效一辭而  
退唯期三命益恭旣除勞力於利權終願勵心於闕  
寄臣伏限守藩不獲奔赴行在稱謝無任感恩戀聖  
戰汗屏營之至謹附供奉官劉叔齊奉表陳謝以聞  
臣某誠惶誠戀頓首頓首謹言

請巡幸江淮表

臣某言伏以舜伐有苗修德而終能率服湯征自葛  
行恩而競望來蘇斯皆今古之美譚實乃帝王之盛  
事固敢跼天負責向日裁誠仰陳利害之端冀副華  
夷之望不量狂瞽遠黷聖聰臣某誠惶誠懼頓首頓  
首臣聞日月以運行爲德永麗于天江河以委輸是  
期必朝于海上能昭其煦育下方遂於通流况乃天  
災非人力能除地分有兵戎不起將獻永安之兆輒  
陳可復之詞伏自寇陷上京兵徵外鎮猛銳始從於  
鶴列旋致徒歸頑兇尚固於蟻封難成盡殪臣豈唯



相苑筆耕卷二  
投袂實至衝冠昨率舟師暫屯江次必欲朝離楚岸  
暮及漢濱旗張商嶺之風劍拂秦川之霧願言薄伐  
冀效微勞尋蒙陛下遠許分憂不令離任臣進退惟  
命始終無虧寧招曠職之譏敢涉爭功之責又緣淮  
海乍息煙塵忽若去兵必當致寇則迺江南沃壤盡  
成蠶食之資淮北強隣暗展鯨吞之勢輿賦既無所  
倚軍須將必屢空是以仰奉勅書已班師旅四境之  
赤眉歸伏八州之黔首謐寧遍布皇恩粗申將略然  
而關中縱敵閩外偷安既乖踊躍以身先每切忸怩  
於顏厚伏惟皇帝陛下省方展義駐蹕經時龜城壯

麗之形金湯雖固鳳輦巡遊之費桂玉可虞况舊謂  
西川富強祇因北路商旅託其茶利贍彼軍儲今則  
諸道發表章則半載始廻徵貢獻則經年未達實緣  
道路遼夔兼值干戈阻躑值剽掠者斯多至行朝者  
甚少加以僦雇所費耗蠹不輕每當水運陸船只可  
率鍾致石以此征稅則漸成抗獎軍兵則未遂飫饒  
伏慮扈從實繁宴犒仍廣盡搜資於三蜀難濟用於  
百司苟興盱食之憂實慊庶寮之望又以蜀川僻居  
邛棘缺人密邇蠻戎虺毒潛吹獸心難測儻或乘虛  
犯境率衆渡瀘六軍之熊豹騰威縱能制敵八詔之



豺狼作暴不免喧驚事可酌於將來禍須防於未兆  
伏惟陛下覽臣忠懇察臣直言暫迴西幸之儀更舉  
南巡之禮使處處息後予之怨人人安戀主之心天  
下幸甚天下幸甚且如遠狩河陽僞遊雲夢將興霸  
王俯順權宜况江淮爲富庶之鄉吳楚乃繁華之地  
陛下九年理國四海爲家豈比周之東遷非擬晉之  
南渡賊巢兇狂久聚穢黷難除縱便收城未宜迴駕  
豈如楊都粵壤桂苑名區四夷之賓易朝天九牧之  
貢無虛月伏乞陛下俯迴鳳宸略泛龍舟必想山靈  
卷三峽之風水伯寢九江之浪遐尋禹跡允叶堯巡

昔也日耀錦川天不傾於西北今則風行澤國地無  
缺於東南然後發使清宮舉章司隸振盛儀於歸闕  
告休績於登封臣雖識昧變通而志勤匡濟敢憑草  
奏輒貢管窺無任戀聖感恩戰越屏營之至謹奉表  
陳請以聞臣某誠惶誠懼頓首頓首謹言

請巡幸第二表

臣某言聞聖人能以天下爲一家以中國爲一人者  
必闡於其義達於其患然後能爲之臣遂自前年繼  
陳短識請移車駕巡行江淮計資於避險就安事叶  
於暫勞永樂未迴聖鑑再獻瞽言臣某誠慙誠懼頓



首頓首臣尙阻擒奸敢言伐善然但願愚夫之一得  
難追賢者之三思臣頃鎮成都偶諧遠慮克符天意  
亟就土功別營雉堞之雄規永壯龜城之峻境爰憑  
釋子善誘蒙王果悛倔強之愆便付懷柔之信皆資  
帝力能肅物心伏遇陛下遠耀珠旗高臨玉壘樂降  
絲綸之旨深加毫髮之勞謂臣有先見之機念臣以  
至誠所感仰銜睿獎倍激忠誠然則當年已往之功  
粗成籌畫今日未來之事竊有管窺苟或緘辭則爲  
負德不辭鼎鑊輒貢芻蕘臣近者俯察時情仰瞻乾  
象荊州道路羣寇將侵蜀國封疆微災似起儻或未

收鳳闕尙駐鑾輿忽有妖氛潛興近境必恐烏合蠶  
食之徒占據江陵把斷峽路則列鎮貢賦無計流通  
行在詔書亦難傳降若見東西阻絕固當遐邇動搖  
伏惟陛下斷自宸衷斥其橫議念江淮之進獻遠涉  
多虞察蠻蜚之奸兇乘虛可懼早移仙蹕直幸楊都  
滅星辰交錯之災叶日月運行之理則乃九州斧鉞  
討戎而齊願風驅四海梯航奉贄而必能雲集盛矣  
美矣念茲在茲且逆賊黃巢久黷皇居多成穢跡直  
到剋收之後須勞繕葺之功更俟二三年之間可興  
千萬世之業慮不先定事難速成伏乞陛下覽竭節



之言闡隨時之義俯從衷懇暫事宸遊天下幸甚天下幸甚臣粗識古今略詳利害自非徼以爲智豈敢知而不言謹奉表陳請以聞臣某誠惶誠懼頓首頓首謹言

讓官請致仕表

臣言臣伏以聖君御宇必先塞彼倖門良士省躬唯慮妨其賢路苟速官謗是辜主恩况臣關中無定難之勲閩外乏分憂之效強欲晏安寵祿其如玷浼刑章永言量力而行固在奉身以退既知無隱寧避有辭臣某誠慙誠懼頓首頓首臣少勵琢磨晚師擒縱

不以一經介意粗於三略畱心願紹家勲免虧堂構先皇帝念臣孤直試以諸難出分大將之威權坐受上卿之爵秩故得內稟聿修之訓外伸式遏之能北掃虜庭則胡雛不敢南牧南清獠海則蠻謀無由北窺及覲彤墀暫司緹騎俄屬齊郊聚擊鉅野興師臣也不才謬膺斯任伏遇皇帝陛下纂臨宸極警諭戎薄舉旌鉞以分勞聽鼓鼙而軫念謂臣有戢兵之奇略察臣立降寇之微勞遂令位假中台名編外相夢想旣通於鳳沼威稜益峻於龍旌其後瀘水波驚蜀山霧暗久念雕題之患遍流黔首之災又蒙命臣曰



俞爲帥於彼爰遵薄伐得解倒懸豈敢貪天之功願  
銘鍾鼎祇能因地之利別建溝隍伏蒙陛下俯獎忠  
誠特行懋賞開國授周司徒之貴立家紹漢丞相之  
榮臣此時早誠持盈輒思請老必願告休錦里退隱  
羅浮不料隴上耕夫盡解揭竿斬木草間惡子競謀  
蟻聚蜂飛當荆門失守之時乃楚塞宿兵之際忝趨  
戎旆兼縮牢盆僂俛而未能報恩驅馳而何敢言病  
或楔猱磨牙於原野或鯨鯢噴毒於江湖尋提招討  
之權來撫句吳之俗遠憑睿略深挫羣兇洎解印海  
門建牙淮甸上將軍之劇任首冠列藩大司馬之雄

資先沾宥禮揣頂踵而偏濡雨露扼咽喉而莫效涓  
埃且自黃寇憑陵翠華巡狩仰天戮力竊嘗服王導  
之言終日痛心何止灑袁安之淚及至成軍已出又  
緣奉詔却迴行藏雖順於綸詞進退實慙於物論遂  
見時溥興北林戎役周寶致南鄰責言玉每慮於俱  
焚金亦憂於衆鑠幸蒙陛下涵之以海量炤之以天  
光如見肺腸得保首領然臣也先軫以直言逞志曹  
植以深過責躬則二年忝都統之名不能誅奸戮暴  
四載主銅鹽之務不能富國贍軍是以兵權則屢見  
改移利柄則變爲分割凡此辱君之命莫非職臣之



由臣猶自知况在陛下擢髮而既難數罪乞骸而唯願辭榮今者大憝奔赴上京克復氛祲卽當殄滅寰區永見廓清臣有忝登壇無能報國行當碁齒居亦胡顏兼以頃鎮蠻陬久棲瘴嶺蒙犯其妖烟毒霧剗除其封豕長蛇當年而靡憚勤劬晚歲而皆成疾疹不將筋力爲禮既載前經苟或身心自讎難逃後患雖思強飯實愧素餐廣陵爲楚澤上游醴府乃漢朝大任以臣衰老當此重難必恐終無所成遂希不可則止伏惟皇帝陛下知人爲哲多士以寧選英才而代處是邦俾微臣而退居散地鬪於菟之逃富固是

忠貞王內史之辭官誠非矯飾幸遇舜風無外漢日再中陛下旣已除盱食之憂微臣亦希免夜行不息臣無任望恩戀聖懇迫兢灼之至謹奉表陳請以聞臣某誠感誠懼頓首頓首謹言



桂苑筆耕集卷之二

國家圖書館, NATIONAL CENTRAL LIBRARY, TAIWAN, R.O.C.





桂苑筆耕集卷之三

狀一十首

謝詔狀

謝詔示權令鄭

相充都統狀

謝宣慰狀

謝詔獎飾進奉狀

謝詔示徐州事宜狀

謝詔止行墨勅狀

謝邈公甫充監軍

手詔狀

謝除鍾傳充江

西觀察使狀

謝就加侍中兼實封狀

謝秦彥等正授刺史狀

謝詔狀

右臣伏奉四月十日詔旨黃巢兇逆穢黷宮城罪惡貫盈人神共怒尋東兵合勢剪滅元兇想副朕懷已遵道路佇聞克復永耀功名者十行天語萬里星飛



捧窺而壯膽初驚跪讀而愁眉頓豁竊以黃巢禍心  
斯極狠力既衰肉已太醜果缺將落甍起烟塵之患  
則歸原野之誅臣每當永夜枕戈早願中流叩楫自  
啓行十乘已屯駐五旬伏緣江路多虞風波未便暫  
淹行色用候良時非致役於遷延但興懷於矍鑠今  
則仰覩鳳銜之詔况乘隼擊之秋俯勵軍謀仰遵睿  
筭卽冀朝離江北暮到漢南長驅背水之師永破滔  
天之孽率奮義感恩之衆氣已凌雲殄藏奸匿暴之  
徒勢如沃雪伏惟陛下歲巡備禮時邁傳歌將示罪  
於三危乃宣威於七德臣遠承獎諭誓盡勤勞身暫

寄於戈船心每馳於劍閣唯願西都獻捷早申收復  
之微功東嶽告成得覩登封之盛事臣無任感激兢  
懼之至謹奉狀陳謝以聞謹奏

謝詔示權令鄭相充都統狀

右臣伏奉去年九月九日詔旨卿曾間道獻章諸鎮  
飛檄便欲長驅甲馬親議專征未卽便來須權制置  
遂命鄭畋等分爲京城四面都指揮諸道師徒慮卿  
偶未委知故茲詔示者伏以書曰無偏無黨王化乃  
興詩云不識不知帝謀是稟况兵當伐叛事合從權  
臣去年先因淮北侵疆後值江南阻路久屯師旅未



遂戰征陛下妙選羣才近分重寄鄭畋等莫不身先  
貔武手運豹韜旣當怒髮爭衝固謂賊胷可堪仰酬  
睿獎竟勵忠誠臣也遠鎮臨戎強隣結憾唯慙曠職  
豈望成功伏蒙陛下尙念勤勞曲垂慰諭覩上天之  
慈意解外地之深憂旣許將軍獨舉柳營之令終期  
叛卒必歸竹町之誅臣限守戎藩不獲稱謝行在無  
任感激戰懼之至謹奉狀陳謝以聞謹奏

謝宣慰狀

右宣慰使供奉官李從孟至伏奉去年九月九日勅  
書手詔兼宣恩旨慰諭臣及將士等者伏以感恩効

命武士常規仗順摧兇元戎素分賊巢偶乘奸便尙  
道嚴誅臣願膾彼逆鱗變其邪膽掃重氛於魏闕迎  
法駕於蜀都是以去年據馬援之鞍敢矜獨勇杖辛  
毗之鉞親率諸軍久在江干再承天旨不令離任遂  
已班師豈料伏蒙陛下念及老臣撫茲衆卒特迂星  
使遠降泥封綸傳萬乘之言纖微不間續彼百夫之  
體慰暖皆均歡呼而聲已振雷感泣而淚將成雨唯  
期勵節共願報恩臣限守藩條不獲稱謝行在臣無  
任感戴榮抃戰懼之至謹因供奉官李從孟廻奉狀  
陳謝以聞謹奏



謝詔獎飾進奉狀

進奏院遞到恩賜手詔一封

右臣伏奉詔旨以臣先

缺

供軍應接使駱潛等進奉

銀事特賜獎飾者伏以收功示賞乃聖主之異恩寓物輸誠固藩臣之常事但屬敵滋隣境寇阻道途運網而既闕先登贄禮而僅侔錫貢早成缺滯况涉鈔微是以雖憑孱水之珍難追塗山之罪豈料鴻毛比價方申懇悃之心鳳口銜書遠降褒稱之旨感激而懷榮爲懼揣脩而報德何期臣限守藩條不獲稱謝行在無任荷恩戀聖屏營之至謹奉狀陳謝以聞謹

奏

謝詔示徐州事宜狀

右臣先奉詔旨據時溥奏卿本道羌兵侵境殺傷令務止遏者臣遂具時溥誣謗事由申奏伏奉二月二十五日詔旨今則寇孽不日勦除藩方務息爭競所宜和叶各保封疆者臣伏以天德既高側管者固難窺測日恩至廣戴盆者自阻照臨是以遠竭愚誠動違聖慮時溥既銜睿獎得縱兵威早成熊據之謀更展鯨吞之勢累興師旅來犯封疆焚郭邑於山陽掠資財於淮上臣遂令捍禦略挫兇狂而乃時溥奸計



已成根株巧言頗有枝葉不思已過敢惑宸聰今者再奉絲綸仰遵徽纆唯期寬則得衆粗可和而不同臣分閫無功戢兵爲務至於草寇猶許歸降况是隣藩豈謀侵擾彼無此詐此無彼虞臣限拘鎮守不獲稱謝行在無任感激屏營之至謹奉狀陳謝以聞謹奏

謝詔止行墨勅狀

右臣伏奉詔旨去春權降詔命許諸道承制除官已兩道降勅止絕自今後凡有要甄獎者並於急遞奏聞不得更議承制者臣伏以漢朝鄧禹始啓倖門魏

室曹瞞敢專重柄欲敦於自家刑國所惜者唯器與名伏遇陛下遠事宸遊慮防爵賞遂降無私之澤遍資諸道之權不料人人而競弄筆端處處而皆誇墨勅長蛇封豕猶匿暴於神州狗尾羊頭已成羣於列鎮臣年前雖奉詔旨未欲施行却緣親率軍兵遠期征討此時久屯南浦將泛西江忽被鎮海節度使周寶欲感軍情潛施巧計便以無功將吏悉皆超授官榮臣所領士卒旣多將校不少彼安坐者猶爲甄獎此遠行者豈免怨嗟遞口聲傳從頭憤激臣若不依周寶必恐事生遂准詔書得行軍賞已曾一一具事



由申奏訖自奉前年十一月一日勅旨仰遵成命靜守常規至於近日所招賊徒只與往時先賜官告曾無僭越豈可隱藏今者外將忠誠永當無二大君善教已至再三泣告而天何未聆憂懷而地謂可入臣限拘藩鎮不獲稱謝行在無任戰越屏營之至謹奉狀陳謝以聞謹奏

謝邈公甫充監軍手詔狀

伏奉某月日勅書手詔各一封

右新授當道監軍邈公甫四月十日到伏蒙聖恩賜臣勅書手詔兼慰諭臣及將校等九天降詔萬里宣

恩柳營之列將歡呼桂苑之羣寮感泣伏以邈公甫素懷材略久撫軍戎漢南之職業可觀江北之物情獲賴既見寬能得衆必令師克在和臣仰窺五色之書俯慰三行之士喜氣高侵於畏日歡聲遠振於薰風臣與將校等無任感恩激切榮抃屏營之至謹奉狀陳謝以聞謹奏

謝除鍾傳充江西觀察使狀

右臣先奏請授鍾傳江西觀察使其高茂卿乞別除廉鎮伏奉七月五日詔旨允許特賜獎飾者天從素望風遞仙音既諧舉善之誠實叶分憂之寄伏以鍾



相苑彙編卷三  
傳比從屬郡來援府城撫綏而使洽衆情禦備而能  
成遠略高茂卿既多梗阻不免徊翔固難掉鞅而旋  
豈許垂橐而入臣以戒之在鬪事可從權遂具奏論  
輒陳利害不料一言之善遽得動天終令二將之才  
皆榮列土鍾陵江徼銅柱海隅政成而必有可觀恩  
重而各得其所臣限拘鎮守不獲稱謝行在無任感  
激兢灼之至謹奉狀陳謝以聞謹奏

謝就加侍中兼實封狀

右臣得進奏院狀報伏奉某月日恩制加授臣侍中  
餘並如故仍加食實封一百戶者九重降命萬里傳

聲側聆而踊躍忘疲內揣而怔忡失措伏以納言進  
秩頒邑賞功固須德望鎮時仍有勳勞濟物然後方  
可謂君無虛授臣無虛受如臣者謬提旄鉞免墜弓  
裘空有志於四方竟無能於一割况自羣兇蝟結戰  
陣蛇奔狂鱗久戲於鼎中聖駕遠巡於劍外臣也動  
不能剗烟塵之患靜不能瞻山海之資遂蒙改易兵  
權分張權課雖值盤根錯節其如有斧無柯安邦之  
計策何成富國之機謀莫就唯甘黜爵以警慢官豈  
期陛下恩洽無偏義深宥過特超衆例許陟高資印  
標石鵲之祥早慙不次冠簪金貂之飾愈覺非宜况



切真食之榮實愧素餐之咎但屬狼星未滅鯨浪猶翻方期抗旆以專征不敢懸車而請老謹當訓兵是務殄寇爲期粗申武弁之威仰報彤門之賞臣限守藩鎮不獲稱謝行在無任感恩戀聖戰汗屏營之至謹奉狀陳謝以聞謹奏

謝秦彥等正授刺史狀

新授和州刺史秦彥 新授滁州刺史許勅  
右件官臣先奏請各授管內刺史今月某日得進奏院狀報伏奉某月日勅旨允許者九天降寵兩地分榮覩降將之懷恩喜元戎之獲請伏以秦彥等比者

爲梟爲獍維虺維蛇久流螫蠱之災未有誅鋤之便臣偶令招諭旋自歸投遂假分符皆能守節誠宜獎勸輒具奏論今者聖澤濡枯皇風盪垢纔擲黃巾之飾許登皂蓋之資秦彥等旣荷新恩永除舊惡必也出榮建隼入効懸魚學其守土之規贖彼滔天之罪臣限拘藩鎮不獲稱謝行在無任抃戴兢灼之至謹奉狀陳謝以聞謹奏



桂苑筆耕集卷之三

國家圖書館, NATIONAL CENTRAL LIBRARY, TAIWAN, R.O.C.





桂苑筆耕集卷之四

奏狀一十首

奏請從事官狀

奏請僧弘鼎充管內僧正狀

謝許弘鼎充僧正狀

謝除姪男瓊授彭州九隴縣令狀

謝弟祝再除綿州刺史狀

奏請姪男劬轉官狀

謝姪男弘約改名濟除授揚州大都府左司馬狀

奏請歸順軍孫端狀

奏李楷已下軍縣尉等狀

奏請楊行敏知廬州軍事狀

奏請從事官狀

營田判官將仕郎殿中侍御史內供奉賜緋

魚袋宋絢





右件官相門傳慶詞苑成名退居安東郭之貧就養  
奉南陔之詠自叅戎幕備見良籌佐理而星霜屢遷  
清勤而風雨不改久裨重任敢覬殊榮伏請轉官改  
章服依前充職

攝鹽鐵巡官朝議郎守京兆府咸陽縣尉柱

國高彥休

右前件官訓稟儒宗才兼吏術王畿結綬早見勤勞  
賓席曳裾頗多婉畫望憲臺之清秩助權筦之重權  
伏請轉官依前充職缺以前件狀如前伏以臣子之  
所以立身者以孝以忠慎終如始若遂榮親之望必

勤事主之誠且如擇隣卜居斷織勵學至于成立色  
養無虧能報慈母之恩則宋絢有焉又如教以義方  
退而學禮至于仕宦力行有規能遵嚴父之訓則彥  
休有焉臣是以久藉謨猷仍嘉德行事堪勵俗志切  
薦賢伏惟皇帝陛下恩流域中孝理天下特廻睿獎  
許假賓缺冀令修己從知盡以敬親務本干黷宸扈  
無任兢惶謹錄奏聞伏聽勅旨

奏請僧弘鼎充管內僧正狀

右件僧跡洗四流心拘八政演法於有緣之衆致功  
於無缺之言伏自翠華遠省於風謠丹詔屢徵於月



捷兇渠未滅銳旅猶勤弘鼎常令僧三十人晝夜轉念功德張開覺道教化闔城所願早覆梟巢便迴鸞駕雖不關於至理實自發於精誠兼緣當道屬郡既多仁祠不少若無綱領難肅緇流伏乞聖慈俯詳所請許充當道管內僧正仍賜紫衣所冀身掛金欄逞養鷹之雋氣手持玉柄制醉象之狂徒謹緣奏聞伏聽勅旨

謝許弘鼎充僧正狀

右件僧臣先具狀申奏請充當道管內僧正仍賜紫衣伏奉勅旨依允者伏以弘鼎久勤轉念輒具薦論

能資十地之因遽荷九天之寵元戎獲請喜三教之並行法侶歡呼驚一佛之或出唯冀永持功德上報慈悲苟不能盪火宅之餘災則何以稱水田之華服必可潛燃慧炬助滅妖氛臣限守藩條不獲陳謝行在無任感戴兢兢灼之至謹奉狀陳謝以聞謹奏

謝除姪男瓊授彭州九隴縣令狀

前守京兆府鄠縣尉高瓊

右件官是臣姪男今得進奏院狀報伏蒙勅旨除授彭州九隴縣令仍賜緋魚袋者伏以高瓊早乏藝能忝從祿仕佐理未閑於吏道列官已陟於王畿昨者



背秦嶺而脫烟塵面蜀川而就雲日雖有心於葵藿  
且無托於萍蓬豈料不由薦論便賜超擢纔拋黃綬  
遽沾墨綬之榮始佩銅章又竊銀章之貴况乃濛陽  
屬邑益部名區正當巡幸之邦實謂來蘇之地豈伊  
殘劣能此勝當臣也必令行慎履冰坐勤飲水勉追  
芳於花縣無致辱於竹林臣限守戎藩不獲稱謝天  
庭無任感恩戰懼之至謹奉狀陳謝以聞謹奏

謝弟祝再除綿州刺史狀

綿州刺史高祝

右件官是臣堂弟今得進奏院狀報奉某月某日恩

制除授金吾將軍被軍州官衆狀舉畱續准勅旨依  
前授綿州刺史者恩資鳳宸喜集鵠原形影光輝精  
魂震越伏以高祝早從裾履免墜箕裘旣懸報主之  
誠得習牧人之術昨者忝膺寵寄粗舉政條銀水金  
山曾無自潤帶牛佩犢或有可觀振家聲廉慎之名  
致郡俗舉畱之請况乃秩假帝之喉舌官登王之爪  
牙仕宦旣榮分憂又重祝也必遵勗勵更慎撫綏不  
辜署劔之恩以謝擁轅之衆臣亦申教誨俾贖貪叨  
俱在朝之盛儀雖慙前哲各爲郡之清譽可畏後生  
共資綽綽之詩冀播優優之政臣限拘藩鎮不獲稱



謝行在無任感恩抃躍之至謹奉狀陳謝謹奏

奏請姪男劬轉官狀

前鄂州都團練副使朝議郎檢校祠部郎中  
兼侍御史柱國賜緋魚袋高劬

右件官是臣親姪男粗詳吏術早忝官裳始佐理於  
江陽旋從知於寒壤實得片言以折獄未嘗枉道而  
事人遂荷寵榮已登班列尋叨命服久倅廉車方當  
寇盜喧驚亦有籌謀施展加以每遵家法願報國恩  
宗族稱孝悌之名僚友許溫恭之行臣是以輒思內  
舉敢具上陳引以進之守戴禮之深義惟善所舉憑

魯書之美譚伏乞聖慈俯鑑忠懇特賜除授峽內刺  
史劬也必能勵心從政常銘馬援之言竭力分憂不  
負謝安之舉干黷宸扆無任兢惶謹錄奏聞伏聽勅  
旨

謝姪男弘約改名濟除授揚州大都府左司馬  
狀

朝散大夫前行閩州上元縣令柱國高弘約  
右件官是臣姪男先具奏請除授揚州司馬並請改  
名濟伏奉勅旨依允者九天渥澤萬里塗程沐恩命  
於堯階泛光輝於阮巷負山旣重臨谷何安臣以高



濟早列官裳頗聞吏術建業字人之政曾有微功惟揚典午之資敢希薄授始陳丹青驟竊殊榮濟也譽雖讓於王晞名不慙於程昱聖君如父照臨實表於無偏猶子比兒訓勵必遵於匪懈俾申勤效少贖貪叨臣限守藩條不獲稱謝行在無任感恩激切兢灼之至謹奉狀陳謝以聞謹奏

奏請歸順軍孫端狀

歸順軍都知兵馬使銀青光祿大夫檢校國子祭酒兼左武衛將軍御史中丞上柱國孫端

右件官巢鳥知風園葵向日能投善教永戢姦圖既悛抗斧之心可在執殳之列仰希甄獎輒具奏論伏乞聖慈特授一官勒在軍前驅使冀率感恩之衆永除稔惡之徒謹錄奏聞伏聽勅旨

奏李楷已下叅軍縣尉等狀

以前件狀如前伏以臣當府淮海粵區州縣多事永言屬吏實藉得人每憂輿賦闕懸漸難責辯若俟銓衡注擬恐失舉賢前件官等皆爲君子儒有古人志學優則仕旣知祿在其中見善若驚不愧藝成而下可以叅臣軍事可以代臣邑僚試假缺員頗彰殊效



况抱斑衣之樂冀攀黃綬之榮伏乞聖慈允臣所請  
干冒宸鑑無任兢惶謹錄奏聞伏聽勅旨

奏楊行敏知廬州軍州事狀

右臣伏以武士所先惟忠與勇忠勇兼著行敏有之  
自假郡符能勤缺理銳旅有爭先之志齊毗無背怨  
之詞蓋乃訓練齊戎撫綏周室在於巡屬實越輩流  
累具奏論請賜正授伏慮道塗艱阻未達宸聰每籍  
幹能再陳薦舉永言成績可使頒條伏乞聖慈特賜  
允許干黷宸鑑無任兢惶謹錄奏聞伏聽勅旨

桂苑筆耕集卷之四



桂苑筆耕集卷之五

奏狀一十首

奏誘降黃巢

下賊將成令瓌

狀

奏誘降福建道草賊狀

奏姪男劬

華州失守請行軍令

狀

奏論天征軍

任從海等衣糧

狀

奏論抽發兵士狀

奏請叛

將鹿晏弘授與元節度使

狀

進金銀器物狀

進漆器狀

進御衣段狀

進綾絹錦綺等狀

奏誘降黃巢下賊將成令瓌狀

草賊黃巢下孽隊賊將成令瓌徒伴四萬人

馬軍七千騎

右件賊徒元受黃巢指使占據潼關尋自孽隊奔逃





所在燒劫就中斬黃管內最甚傷殘臣伏以肅齊王者之師必期無戰遵奉聖君之德可恕有瑕暫緩討除先加告諭臣昨者專差押衙丁威賚委曲深入招誘果願歸降兼乞委任郡符展效忠節其成令瓌臣當時補充軍前押衙兼給功名檢校國子祭酒兼御史中丞官告一通權知楚州軍州事以今月二十三日部領手下兵士到楚州倒戈訖伏緣楚州與徐州漣水對岸今春曾被寇戎驟來攻劫雖頻討逐未盡誅擒况漣水賊徒久蓄姦謀潛行偵諜常排戰艦欺視孤城再欲奔衝終爲患害臣以此特將此郡權授

令瓌既能投信義而來必得破頑兇之窟臣久臨戎事素習軍謀以爲先則惠而後則誅兵家所貴遠者懷而近者悅帝道方興上窺含垢之恩下察慕羶之志不勞寸刃唯假尺書成令瓌遂革野心能從天意叛徒四萬盡爲樂業之齊人精騎七千皆作輸忠之烈士既當恕罪倍見感恩蜂飛之小寇旋銷蝟結之元兇可殄斯乃陛下祝除三綱舞耀兩階信既洽於豚魚化能移於梟獍善師不陣敢矜止殺之權至道無私但仰好生之德其成令瓌下願在軍門及放散人數請續具申奏謹錄奏聞謹奏



奏誘降福建道草賊狀

福建道溪洞草賊何嶠張延鄂璩悚等徒伴  
共八萬人

右件賊徒自去年冬侵劫信州界內臣以其道途阻  
闊溪洞險艱若欲討除恐爲勞役遂於今年二月內  
差節度衙推諸葛成充東面招諭使判官便賚委曲  
職牒招諭其賊首何嶠等三人雖行匪有師而卜能  
從吉一時應響三窟除姦纔當言下歸投兼乞軍前  
展效臣字缺二委曲補職名追赴軍前俾申忠節臣伏  
以小人興叛所迷者貪競之心上帝垂恩所惡者殺

傷之事終能耀德固可弭兵與其繼獻捷書曷若盡  
收降款是以遠飛折簡便倒羣戈塵不假於曳柴風  
自行於偃草溪頭洞口免污煙霞閩嶺鄱江豁通道  
路况乃各期後效盡願前驅能令八萬餘人永不二  
三其意有以見陛下皇威天覆玄德日新四郊之煙  
壘將銷萬國之梯航競集則乃軍中士卒安身而永  
別戰場宇內生靈携手而齊登壽域臣無任歌詠屏  
營之至其何嶠等下補職名願隨臣征行及放散人  
數請續具申奏謹錄奏聞謹奏

奏姪男劭華州失守請行軍令狀



具銜高劬

右臣伏以僨軍之將禮所興譏大義滅親傳曾垂訓  
將肅安危之本必嚴賞罰之科竊自巨猾增驕王師  
致討臣堂姪男劬比在河中司錄得受李缺都指揮  
領昭義之甲兵收華州之城邑稍申鷹犬之力暫挫  
梟狼之聲已蒙特降殊恩俯旌微效服榮金紫位忝  
星郎始離蒲坂之具寮遽假蓮峯之通守誠合率忠  
勵勇馘醜推兇稟進尺退寸之規決萬死一生之計  
終申誠節仰報寵光昨者狂孽併來疲兵再戰既絕  
安西之救難申逐北之威然而不能潤草塗原永忘

苟活抑使靡旗亂轍旋見脫歸致諸道之星分縱姦  
徒之霧結職此之過罪無所逃豈可當二峯保守之  
時遽沾寵賞及一陣奔亡之後得免誅夷國有常刑  
軍無貸法懲一勸百念茲在茲伏乞聖恩特行嚴典  
徇于藩鎮警彼師徒所冀缺二國章永能安於社稷  
微臣家法亦不昧於神祇干冒宸聰無任責躬泣血  
戰越之至謹奉狀陳請以聞謹奏

奏論天征軍任從海等衣糧狀

天征軍都將任從海及節級軍將並官健摠  
二百八十七人



右臣得都將任從海及節級狀稱自赴征行已逾五載累曾沿海襲賊上江防虞去年軍都放廻本道從海等且在當府願隨行營者各得家信知西川已停衣糧伏緣從海等皆是貧寒更無營業彼處父母親屬便須委壑填溝請具奏論乞還衣糧者謹按史記釋云天子車駕所至則人臣爲僥幸賜人爵有級數或賜田租之半故因謂之幸也伏以任從海等萬里從戎五年于役不辭艱險願盡勤勞今者身在東吳職居西蜀此方苦於羈旅彼已停其衣糧遠路音書難寫征人之恨貧家親戚先懷餓殍之憂伏遇陛下

暫幸龜城未廻龍闕三川草木別有光榮萬戶烝黎永能蘇息而任從海等久離本鎮不睹殊恩望雨露之均沾恨煙波之迥隔固堪傷憫輒具奏論伏乞聖慈允臣所請特令本道却給全糧所冀鳳駕巡遊士卒皆知其有幸鴻慈煦育君親必表於無私謹具錄奏聞伏聽勅旨

### 奏論抽發兵士狀

當道先准詔旨抽廬壽滁和等州兵馬共二萬人仍委監軍使押領赴軍前者臣當時已各帖諸州令排比點檢次又得進奏院狀報



近奉詔旨更於諸州催促兵士者

右臣伏以兵惟飾怒雖尚勇於戰征師克有和固推誠於輯睦苟非得衆何以成功臣當管廬州與和州舊有讎嫌至今疑忌唯謀以怨報怨未遂知和而和孫端新授滁州又與秦彥有隙既是滁和接境動有他虞若於光蔡會軍必酬舊憾事非便穩理合奏論臣自得招降多方控馭粗能禁戢免有動搖如令各出兵戈必恐自相魚肉輒陳利害冀慎始終謹錄奏聞伏聽勅旨

奏請叛將鹿晏弘授興元節度使狀

右當道賀正子將許令琮等今日日迴得狀稱三月五日陳許軍潰散節級鹿晏弘領兵馬二萬餘人打破金洋等州突入興元府坐節度使牛勗四日夜領隨從人並家累約二千餘人奔投龍州西山谷者伏以天未悔禍地多受災旣當易動難安非可懲一勸百鹿晏弘早驅散卒廣集叛夫始聆焚劫東都旋見奔衝西路本道節度使周岌累令招諭終不歸降豈興破浪之風但熾燎原之火今者逆黨則鯨吞盛府元戎則鼠竄危途爪距已成根株難剗儻或未恕亂常之咎別興伐叛之師卽恐終成一秦固應不利三



蜀且列藩貢獻諸道表章得達刀州皆由劍路况乃鳳城已復鑾輅將旋縱令鷓鴣在天能摧狡窟若更豺狼當道必礙行宮峽路雖通水程多慮不唯險阻實且遐遙兼至上江皆爲賊境唯憂進獻莫遂通流臣久竊寵光深懷驚憤遠詳事意輒具奏陳伏乞聖慈霽雷霆之威迴雨露之澤速飛寬大之詔特委撫綏之權鹿晏弘免致磨驚便當豹變必當克己永務安人聖主含弘既宥其窮斯濫矣姦臣驚悟亦免於尤而效之謹錄奏聞伏聽勅旨

進金銀器物狀

金器 銀器

右臣伏以煙塵向息道路猶虞每慙仗鉞之榮多曠獻琛之禮得申遠貢唯有輕賫前件金器銀器等質變披沙形分鑄礫雖愧易盈之用且資虛受之功固敢竭航波梯巘之心助麟趾馬蹄之瑞貢金三品空陳任土之宜望闕九重未遂朝天之願感恩何極戀聖徒勤今差押衙王虔隨狀奉進謹進

進漆器狀

當道造成乾符六年供進漆器一萬五千九百三十五事



右件漆器作非淫巧用得質良冀資尚儉之規早就  
惟新之製雖有慙於瓊玉或可代於琉瓶伏緣道路  
多虞星霜屢換器貢難通於萬里綱行遂滯於三年  
既失及時唯憂虛月臣今差押銀青光祿大夫檢校  
太子賓客兼御史中丞上柱國辛從實押領隨狀奉  
進謹進

進御衣段狀

當道先兼鹽鐵使織造中和四年已前御衣  
羅折造布並綾錦等除先進納外續織造九  
千六百七十八段謹具如後物色

右臣久權筦貨素乏籌謀多虧山海之資莫報雲天  
之澤前件御衣並綾錦綺等薄慙蟬翼輕愧鴻毛然  
而舒張則凍雪交光疊積則餘霞鬪彩既成功於鳳  
杼希入用於龍衣儉德彌彰致美宜先於黻冕皇恩  
遠燭輸誠必鑑於絲毫其疋段物等臣謹差某官某  
押領隨狀奉進謹進

進綾絹錦綺等狀

進奉綾絹錦銀綺等一十萬疋段兩謹具色  
目如後物色

右臣伏以兵戈充熾郡邑凋殘仰思御輦巡遊唯恨



賦輿懸闕况乃當道巡屬之內招降頗多皆請占畱  
將充供贍貴息寇戎之患難豐進獻之儀前件綾絹  
錦綺等雖製自鴛機而價慙鮫室負謝八蠶之號劣  
登三品之名祇將申任土之宜豈足備補天之用輕  
微既甚隕越何安其疋段物色謹差節度散兵馬使  
王審球等押領隨狀奉進謹進


桂苑筆耕集卷之五



桂苑筆耕

二

國家圖書館, NATIONAL CENTRAL LIBRARY, TAIWAN, R.O.C





桂苑筆耕集卷之六

堂狀一十首



都統巡官侍御史內供奉崔致遠 撰

賀入蠻使廻狀

賀殺黃巢賊徒狀

賀收復京城狀

賀月蝕德音狀

賀內宴仍給百官

料狀

請降詔旨指喻兩浙狀

謝加侍中兼實封狀

謝落

諸道鹽鐵使

封狀

謝弟祝再除綿州狀

請轉官從事狀

賀入蠻使廻狀

右臣得進奏院狀報入南蠻通和使劉光裕等廻雲南通和兼進獻國信金銀器物疋段香藥信馬等漢



使傳詔則星迴象林蒙王奉琛則雲集龍闕能舉羈縻之術果悛偏強之心若非聖上德叶棄瑕化敷柔遠則何以感鑿耳鏤身之衆啓隳肝瀝膽之誠彼越雉呈祥未爲盛觀旅獒入貢徒見良箴曷若正在艱時能安獷俗使雲南酋長再遵奉贄之儀天下賢良免獻征蠻之策斯皆相公魏絳陳利王商振威已令六詔歸投即使八紘清謐某比者南尋銅柱西鎮劔關曾施上將之謀免辱大君之命今則遠聆盛事倍切歡心陳賀末由無任欣抃云云

賀殺黃巢賊徒狀

右得進奏院狀報定難軍拓跋相公保大軍東方達尚書奏於宜君縣南殺戮賊徒並生擒賊將又鳳翔李相公奏探知京中賊徒潰散六月十三日聖上御宣政殿排仗受賀者竊以逆賊黃巢稔惡旣多就刑非久敢驅烏合之衆屢拒鷹揚之師拓跋相公東方尚書或力微裔孫或曼倩餘慶皆申秘略共彌兇徒能順天誅遂陳月捷軍名定難雅稱關張之聲縣號宜君克符堯舜之德是以聖上高臨紫極遠耀皇威睹百辟之歡呼雷驚蜀國想六師之勇戰電掃秦川卽當靜滅氛霾永見均施渥澤此皆相公調鼎中之



味運堂上之兵右援枹而得功左執律而至獻勳功  
相繼稱慶何窮某久阻淮夷尙淹海徼遠聆捷語但  
切歡聲然必願劔拂狼星旗迎聖日終繼張飛之拒  
後不慙聶叔之致師限守戎藩末由陳賀下情無任  
踴躍之至謹奉狀陳賀謹錄狀上

### 賀收復京城狀

右得河中節度使王司空牒報四月十日當道與鴈  
門節度使李僕射及都監楊驃騎下諸道馬軍齊入  
京城與賊軍交戰約殺賊步軍一萬餘人其馬軍賊  
便走出城黃巢亦未知存亡其逃遁賊徒尋差兵馬

追奔並已收復京闕訖者伏以逆賊黃巢藏姦匿暴  
惡積禍盈久於輦下偷生固是檻中待死楊驃騎受  
聖君之重寄李僕射傳飛將之雄名旣無慮於二心  
果有成於一力想其霜鋒電擊月羽風驅壓雀卵之  
威高燎鴻毛之勢猛遂使賊巢困不能鬪亂無所歸  
雖爲漏網之鱗已是傷弓之翼則期加顯戮永掃羣  
兇加以熊據六宮豕豕逐九陌今茲克復免致焚燒佇  
望翠華便歸丹闕稍豁上天之怒實際除下土之災此  
皆相公靜運廟謀遠揚戎略旣叶一匡之妙道北極  
何憂將流萬古之美談東封可俟某登壇有忝仗鉞



無功遠聽歡聲始除慙色限拘守鎮陳賀末由下情  
無任抃躍之至謹錄狀上

賀月蝕德音狀

右伏見六月二十六日德音以太陰薄蝕曲赦三川  
管內囚徒及委諸鎮收拾埋瘞京畿四面暴露骸骨  
者伏以金精隱耀玉辰垂仁答天誠以震驚省風謠  
而欽恤圓扉宥罪掃彗銷冤近鄙北齊號御囚而肆  
虐遠遵西伯葬枯骨以施恩蜀山之草木先春秦甸  
之煙塵永息此皆相公功成燮理道洽變通助日月  
之光輝振雲雷之號令八方翹首萬彙歡心某跡繫

戎旃心馳台室阻隨班列莫遂歡呼下情無任抃躍  
之至謹奉狀陳賀謹錄狀上

賀內宴仍給百官料錢狀

右得進奏院狀報七月一日於內殿宴百官仍令度  
支各給三箇月料錢並奉勅旨迴駕之日應沿路州  
縣切不得輒進歌樂及屠殺者伏以聖上繼周匡業  
避狄興憂自幸成都彌資儉德守玄元之三寶達舜  
帝之四聰徹彼珍肴掛其素服言唯罪已事不勞人  
今者已復上京將迴大駕致栢梁之高宴盡醉千鍾  
鄙鍊布之乏財均頒九府然後繼飛綸翰仍命繡衣



制郡邑之嚴科節道途之浮費既施令於好生惡殺亦停歡於八列九成王化斯行物情皆泰此皆相公手攜多士躬賀聖君駕行賦在鎬之章鳳藻詠濟汾之樂一時盛事萬代美談某限守藩條阻攀仙仗心馳蜀棧目斷堯樽下情無任抃躍之至謹奉狀陳賀謹錄狀上

請降詔旨指諭兩浙狀

右先淮浙西周相公牒杭州與浙東兵士鬪敵某遂具事由申奏請降詔書速令戢斂伏奉二月二十日詔旨已詔兩浙務在叶和者某當時備錄王言各移

公牒訖兼先差人賫書牒與劉漢宏尙書詰彼起戎之本諭其繼好之規今得廻書其言不讓唯稱周相公與董昌苟恃寵榮妄行威福虐侵近境阻截通津况有不同國之讎嫌又夫無蘊年之誓約必想見豺而戰猶能首鼠幸生已決加兵終期釋憾然則此無和氣彼有鬪心嘗膽者結怨既深抉眼者遺言可驗必恐以吳與越終當有越無吳實所謂夫差之麋鹿興譏范蠡之鼃鼃得便唯憂黎庶枉見殺傷輒再具狀奏陳請更飛詔止遏某徒圓鑿方枘避柱觸楹累陳高鳳之詞莫解子都之怒且讎因手足疾在腹心



久練師徒決期戰伐則也衛絲轉亂鄭蔓難除三人是仇百姓何罪伏惟相公贊成睿略施展廟謀俾陳兩武之事端唯仰一言之恩庇謹錄狀上

謝加侍中兼實封狀

右得進奏院狀報伏奉十一月十一日恩制加授侍中仍加食實封一百戶者伏以某材輸美箭業紹良弓早勤式遏之規敢怠聿修之訓遂得一分戎闡七換師壇提漢法之重權陟秦官之極品恩榮獨盛績効何申况自蠶尾之徒蝟毛而起神州傾陷御輦巡遊不能踴躍用兵有類遷延之役雖進退惟命不敢

爭功而行藏相時豈無懷愧而又積山煮海瓜剖豆分莫成贍國之權徒竊經邦之位唯甘廢棄永見沉淪敢期渥澤之無私俯念涓埃之有效許登玉署高戴金璫仍忝真封式加懋賞且如講能奪席諫切引裾方升鸞渚之榮俾稱鳳池之望豈伊孱劣所可貪叨此皆相公仰贊萬機俯安九牧無使怨乎不以能令可者與之唯當三命益恭一辭無退入則撫安疆圉出則誓掃氛霧佇成滅寇之功冀贖曠官之責戎鎮有限不獲陳謝下情無任感恩兢懼之至謹奉狀陳謝謹錄狀上



謝落諸道鹽鐵使加侍中兼實封狀

右某伏奉去年十一月十一日恩制加授侍中並餘如故仍加食實封一百戶落諸道鹽鐵使者伏以君親委任固能捨短從長臣子忠勤唯願從微至著某一司權課六換暄涼正逢多事之秋莫展牢籠之用况自頻更統帥別致租庸既當狐讓千皮實見羊分九牧贍軍富國固絕籌謀熬海鎔山幾隳條貫今者聖上恕其不逮察以無私將漢法之重權委儒流之妙術豈料更畱宸慮猶念戎勳許登負璽之班資不替擁旄之寵寄尚假極品重增實封當主憂臣辱之

時若斯榮盛審福過災生之理何以遑安此皆相公曲庇庸虛全忘僭忝俾息躬於負重當銳志於專征寧無淬礪之功仰答陶勻之賜此外以榮爲懼至末如初下情無任感戴兢惕之至謹奉狀陳謝云云

謝弟祝再除綿州狀

右件官是某堂弟今得進奏院狀報奉某月某日恩制除金吾將軍被本州官吏衆狀舉畱續准勅旨依前充綿州刺史某嘗讀後漢書見寇恂爲潁川守後拜金吾從上經過潁川郡人遮道願借寇君乃畱一年以慰百姓此實國家殊寵郡邑美譚萬代之來一



人而已誰知盛事得屬鄙宗安貧恤孤潁川之政化  
雖之出官入仕子翼之官資略同感深而喜作悲端  
效淺而榮爲懼本伏以高視粗閑吏術忝荷君恩分  
憂而地壓劔關理俗而塵銷鈴閣今者纔升緹騎却  
擁朱輪謂施撫蒼之能特徇衆多之請此皆相公愛  
忘其短仁及於微仰贊帝俞俯從羣願某唯知提訓  
俾慎揣摩同驅軾下之熊但期靜理雖睹堂前之鸞  
免恨分飛限守戎藩末由陳賀云云

請轉官從事狀

某官薛礪

右件官閔損登科良由德行陳琳從職實假詞華林  
幽而轉識芝蘭木落而方知松桂深敦操尙夙著幹  
能遠叨分閫之榮唯藉運籌之妙伏請轉官仍改章  
服轉充觀察判官

某官鄭俶

右件官早登上第久佐大藩能修檢慎之規每助撫  
綏之政賓筵所重健筆爲先伏請轉官仍賜章服轉  
充節度掌書記

某官顧雲

前件官東筠孕美南桂抽芳曳謝朓之長裾從衛青



之軍幕五殺皮之爲重豈謂虛譚百鷲鳥之不如方  
知實事良資妙畫共展壯圖伏請轉官仍賜章服充  
觀察支使以前件狀如前伏以某遠率舟師誓除國  
賊征帆則雲掛行色戰鼓則雷含殺聲畱務旣繁良  
籌是托或倚幕中之婉婉或求馬上之翩翩輒具薦  
論仰希甄獎不拘月限別覬天恩伏惟相公庇護戎  
藩激揚賓席稍超常例特受清資略假潤於丹青許  
分榮於朱紫所冀元戎十乘速成討罰之功越府三  
才各得施張之處已具狀申奏訖云云

桂苑筆耕集卷之六



桂苑筆耕集卷之七

別紙二十首

滑州都統王令公三首

鄭畋相公二首

史館蕭邁相公

度支裴徹相公

租庸王徽相公

前太原鄭從讜尚書

禮部夏侯潭侍郎

吏部裴瓚尚書二首

宣歙裴虔餘尚書二首

鹽鐵李都相公二首

盧紹給事

壁州鄭凝績尚書

泗州鄭庾常侍

湖州杜孺休常侍

滑州都統王令公

伏見制書伏承榮加內史之任暫執元戎之權往鎮



雄藩誓殲窮寇佇復宮闕則歸廟堂九重之倚賴如山八表之歡呼動地而况令公志勤捧日力贍補天三秉台衡兩分戎律入則建蕭何之功業出則振黃霸之恩威此皆羣議稱揚不假拙辭贊詠今者聖上以叛徒乘便尙敢俯張諸道徵師互相逗撓蠢彼之姦兇未弭赫斯之憤怒良深遂輟股肱遠資心膂薦赦宰楚設前茅後勁之規管仲相齊致九合一匡之譽是以榮轉西臺左相請爲東道主人儒武全材古今罕遇伏想近承睿略嚴令諸侯誠知白馬封疆幸而獲賴必料蒼鵝羣黨困不能飛卽當立刻梟巢去

迎鑾駕海晏而永興龍德池清而再睹鳳儀凡在含靈皆增係望某靜思奮擊動見悔尤四隣多是異心十道竟誰同力今所以自賀者得逢知己親摠貞師巧脣無所構之端壯膽有可傾之處唯冀遙稟大將軍之命用勵驍雄仰憑眞宰相之威永除妖孽末由陳賀下情不任欣慰瞻攀虔祝云云

第二

伏睹制書伏承榮膺寵命正鎮雄藩伏惟感慰竊以動惟佐聖靜乃優賢百穀垂成則暫停霖雨八紘向泰則貴息兵戈詎勞有道之人久練不祥之器羣情



既鬱帝命斯行令公獨竭忠誠克扶厄運當六師扈  
從司南之制度無虧及十乘啓行逐北之威稜有裕  
但屬王事靡盬人心不同祖豫州志在誓江佇申壯  
節蕭相國力謀佐漢或致游詞今以小寇必殲大臣  
于役慮失華夷之望倍興宵旰之憂遂乃鳳紙傳恩  
遠離西蜀蜂旗卷影却到南燕指蹤既稟於成謀搏  
噬佇看於衆旅坐驅十道臥理百城顯爲出入之寵  
榮保就始終之勳業某夙銜深獎繼奉好音覽古人  
賀滿之言睹君子持盈之節拊慰攀戀不任下情伏  
惟云云

第三

伏承旌幢已到鎮上訖伏惟感慰令公手傾霖雨身  
耀福星三入廟堂已超仲父一匡寰宇更屬何人昨  
者十乘啓行九重軫慮以爲螢不勞海灌卵何假山  
摧遂請元臣却臨重鎮今則徐廻龍節靜撫雄師下  
車而恩澤均沾舉扇而仁風廣振南燕受賜北極紓  
憂某早荷獎知倍增欣慰云云

鄭畋相公

伏見二月六日制書伏承相公正居宏父光弼聖君  
兼摠蘭臺再調梅鼎凡云遠者近者莫不舞之蹈之



伏以相公碩德茂勳雄才奧學播在四方之口沃於萬乘之心固絕贊揚但增瞻仰况自關中聚寇岐下屯兵率先諸侯累展奇略是以才趨鳳輦便陟鸞臺遠涉山川行就九天之寵克平水土坐升百日之榮竹宮既託於清規芸館更歸於雅望則乃孫叔敖之慎守愈貴愈恭胡伯始之累遷有倫有要永憑上德佇賀中興使仲父執鞭鄩侯捧轡驅蠢動入華胥之域格蠻夷歸虞舜之風某早沐深知遠聆殊拜末由陳賀抃聳倍深云云

第二

伏承太保相公累陳章表懇讓勻衡暫輟任於股肱果優賢於羽翼緇衣纘美青綬加榮守難進易退之規叶居安慮危之道莫不宸辰欽矚措紳詠歌而况相公比者統冠甸侯深攻國賊唱義聲而飛羽徽管爵賞而練甲兵方驅破浪之風佇滅燎原之火而乃腹心有疾牙爪無功何君子之見欺實小人之難養然而災爲福始小往大來再秉洪勻遠安仙蹕調鼎中之實味運堂上之奇謀決勝漢籌弭災魏闕皆憑蕭丞相指蹤之力豈假鮑尚書統集之兵咸推第一之功能贊登三之業今則奉身有裕止足無虧將尋



疏傳之高蹤乃訪留侯之故事用黃石公之妙略蔚  
爲帝師從赤松子之勝遊別作仙侶雖云獨樂其奈  
衆情氛曠餘妖方願靜銷於天下陶鎔重望豈宜久  
滯於山中必計才返鸞旌請歸鳳闕永使蝸蟻罷噪  
仍令鹿馬分形深荷眷私况聯親懿依攀禱望可鑒  
遠誠拜賀末由悚戀增切云云

史館蕭邁相公

昨睹制書恭承高辭大計正陟中台兼升史館之榮  
實副儒門之望竊以冊書所重筆削爲難別成一代  
之楷模夙掩百王之規矩是得宸衷妙選朝列具瞻

而况相公眞君子儒老成人德允釐百揆顯贊萬機  
今者邦計旣豐國經斯整東西臺之極位揚歷無遺  
左右史之直言裁成有類莫不助華表德游夏緘詞  
能施補袞之功備載垂衣之化必使褒眞貶僞彰發  
傳之體有三激濁揚清勵事君之心無二古今盛美  
遐邇欽依某遠守藩維忝資陶冶每慎六條之理敢  
希一字之褒抃躍所多啓陳無及伏惟俯賜念察

度支裴徹相公

伏睹除書伏承相公再履台席榮均賦輿凡在生靈  
莫非欣躍某今之所賀者眞以天上之福與大國之



幸不欲更牽俗禮強飾繁詞然而歡心有餘祝史無愧敢陳贊詠冀豁懇誠伏以相公德襲清通道資恭儉歷遊華貫高陟台衡當聖君巡幸之初見賢相燮諧之業而乃鵠原陷難鳳閣辭榮暫屈跡於外藩尋秉權於大計今者天將悔禍日待升平果請英才却歸舊位躡周司馬統兵之秩騁晉尚書較運之謀四方所傳一意相賀某每慙薄伎偏荷殊私再逢調鼎之期實切彈冠之望末由陳賀但增攀戀簪抃之至云云

租庸王徽相公

伏睹制書伏承榮膺寵命伏惟感慰伏以萬乘巡遊最難畱事百官毗倚允屬持綱况當返駕之時尤重清宮之禮膺茲寵寄實在賢能司空相公靜抱長材動施餘刃報主安人之業早冠鼎司束姦芟弊之名已諧輿論今者鳴鳩命氏鷹隼揚威內清輦轂之塵外肅關畿之地聖君新命永託中庸司隸舊章佇觀大禮某忝承眷獎欣抃實深云云

前太原鄭從謹尚書

得河中王相國書報伏承相公榮膺寵命將赴京國伏惟感慰伏以宸遊既遠居守是難須倚元臣方安



聖慮是故昔漢帝曰吾與僕射何異則知重寄別表  
顯恩而况相公岳立儒宗川流相業頃辭鳳閣遠耀  
龍旌郭伋示信之鄉廣沾恩化周舉移書之地遍活  
疲羸肅軍令於貔貅振兵威於獬豸求安邊境胡雛  
不敢南侵遽值妖氛周馥久勞西狩今以玉京雖復  
鑾輅未迴輟戎略於藩垣託繁機於宮闕必計中和  
樂職已繼雅音司隸舊章卽興盛禮然後重調梅鼎  
永對奠階贊成天下之春固是穀中之事凡云品彙  
莫不欣歡某早忝恩知倍增抃慰末由陳賀但切依  
攀云云

禮部夏侯潭侍郎

伏承榮膺寵命伏惟感慰侍郎泰初朗鑒日月難踰  
孝若美姿風塵莫染儒室別開其戶牖相門必繼其  
弓裘是以始於憲府宣威便見儀曹主貢履歷而皆  
遵仙路操持而永振貞風栢列朝霜昨日揖登臺御  
史桂開夜月今朝選入室生徒採珠而蓬島待空搜  
玉而藍峯寡色副天下正人之顒望息場中藝士之  
屈聲某早沐眷私不任欣抃云云

吏部裴瓚尚書

伏承榮膺寵命伏惟感慰竊以助華聖代唯務舉能



邵泰賢流共推取實用捨既歸於重柄古今皆託於  
長材人望所諧主恩斯在尙書情疎宦路性悅道風  
月高而霜鶴數聲雲卷而蓮峯萬仞早知厄運久避  
囂氛洋川之瑞草仙花幾牽蝶夢闌苑之朝嵐暮靄  
深潤豹姿然而陶勻難住於山中塗炭待平於天下  
遂辭肥遯來謁宸遊果登銓管之司允洽簪纓之望  
昔年掌貢搜海嶽以皆空今日掄材酌淄澠而不混  
清通所莅淆亂必除歷居六郡之峻資終補三台之  
缺位遠祈邇禱匪夕伊朝某早仰仙標遙欽懿範抃  
慰瞻望不任下情云云

第二

伏以禮稱選士實資秀孝之科書貴知人允屬銓衡  
之職君命既將歷試物情固得僉諧而况侍郎雲鶴  
性情天驥行止瓊窓近日高批帝語於筆端絳帳生  
風妙選羣才於門下洎湖湘察俗瀟洛尹都便宜入  
秉化權坐匡聖略直以手能持滿心切避榮唯求勇  
退之謀久阻急徵之詔萬乘夢思於隱霧四方渴望  
於爲霖今者移黜陟之司託清通之鑒何假山濤之  
密啓能遵李重之良箴永期涇渭分流必使輪轅適  
用某每思玉昆金季皆辱眷知松茂竹苞深敦交契



禱祝瞻戀並同衆誠伏惟云云

宣歙裴虔餘尚書

伏承榮奉徵詔將赴闕庭伏惟感慶兼極今者妖氛  
向息聖運重興諸葛亮之用兵已非急務叔孫通之  
制禮方藉賢才以尚書望積臯夔政成宛句三年察  
俗以仁義爲先四境懷恩俾寇戎自戢是得傅巖結  
夢宣室飛書黎庶傾心莫遂攀轅之懇君王聳耳待  
聽曳履之聲况乃親侍安輿榮趨帝輦佇聆調鼎永  
使建燾豈獨關中又安實爲天下幸甚某久隣仁境  
深飽德風抃慰瞻攀不任誠懇云云

第二

特垂手筆榮函兼示陳情表藁捧尋無斃欣賀有餘  
且近者時風僅訛孝道多缺事親則薄奉已爲先只  
將奔競榮身不以違離介意今睹尚書遠辭徵詔懇  
致奏章叙向來爲國分憂不矜茂績請從此於家就  
養實稟格言况尚書若赴行朝必登相位而乃不親  
梅鼎願奉板輿是逃台袞之榮唯戀斑衣之樂永使  
李密之表萬古齊名仍令東哲之詩千秋長價有以  
見聿修令問橫勵時流豈唯上德之美譚實乃中興  
之盛事拜賀末由但切攀依之至云云



鹽鐵李都相公

伏承榮膺寵命兼掌漕運伏惟感慰伏以鑄山熬海  
既標富國之權紫帳皂檐固是安邦之彥况從多事  
諒託全才相公中庸日彰大任天降舟楫暫妨於援  
溺棟樑必俟於扶危今者三年禮成萬乘恩至假途  
端揆正位司元憑孔僅之智謀繼齊桓之霸業必也  
廣施奇計遍致豐資答上帝之殊恩振中興之盛事  
凡云品彙孰不欣歡某每慙糠粃居前久阻鹽梅入  
用主張多失固難稱老成人交代叨榮無以告新令  
尹抃慰兢惕不任下情拜賀末由攀戀空切云云

第二

每辱榮緘卽垂虛譽周顛齊名於樂廣固是懷慙韓  
非接傳於老聃實爲過望荷戴增切兢惶益深伏以  
相公宋劍倚天魯戈駐日再居重任大洽羣情必計  
海若傾心廣潤煎熬之利山靈効力助成鎔鑄之功  
便令流馬飛牛終得踰千越萬國用則立期饒羨廟  
謨則坐致昇平勤王之誠在我而已伏惟遵護用慰  
禱祠其他下誠已具前狀云云

盧紹給事

近睹除書恭承賢兄左丞榮膺寵命伏惟感慰竊以



國有司直野無遺賢蓋前代之所難實我朝之獨盛  
况乃上可以紉彈八座下可以整肅百官永言其才  
固屬全德賢兄左丞中庸處厚大雅含清柱晴空而  
嶽頂無雲瑩秋色而潭心有月是得歷游華貫輝綽  
令猷頃遇分憂暫作甘棠太守尋聆徵詔請爲仙桂  
主人此時也歡聲則風振儒林喜氣則雲鋪筆陣有  
口皆賀無心不歸蓬島靈珠想離領下荆山瑞玉待  
入掌中而屬鶯谷藏春鳳城陷寇不見孔門盛事唯  
傷魏闕餘災今者遠從行朝久臨憲府旣躡清資於  
侍極榮升重位於肅機博咸之畏慎無虧鄭晉之矜  
瞻戀無以披陳云云

壁州鄭凝績尙書

伏承自小司馬假大宗伯出刺始寧伏惟慶慰竊以  
進有致君之志共託阿衡仕無擇祿之言常聆季路  
綽然遺範宛若合符尙書玉樹一枝金山萬仞雅望  
全騰於八海華資緩步於五雲漢丞相之傳經永光  
儒室周司徒之善職固屬高門况乃於國於家曰忠



曰孝比者黃巾犯闕翠輦省方尚書暫別鯉庭遠趨  
鳳宸高提夢筆仰贊宸猷稟大聖之指歸立中朝之  
張本此實爲人臣之忠於國也今以聖主優賢嚴君  
遜位尚書固辭武部峻陟儀曹榮掛萊衣俾歌廉袴  
毛義之喜難自己胡威之清必衆知又爲人子之孝  
於家也莫不事標雙美譽冠一時今彼郡而昔彼州  
豈能較盛出傳舍而入官舍未足齊榮佇見風扇揚  
名雲屏隔位隼旗高建免勞陟岵之詩龍鼎待調卽  
展濟川之業某早銜眷獎常切禱祠拜賀未期瞻攀  
無極云云

泗州鄭庾常侍

伏承已到貴鎮上訖伏惟感慰昔鄭弘爲臨淮太守  
熊初架軾鹿乃挾輶旣傳一郡之政聲終陟三公之  
寵秩果符瑞應永振美譚今則常侍族茂山東威臨  
泗上實繼巨君之芳跡足分聖主之遠憂况乃沛師  
戢兵淮民復業懸一城之愛日振四境之和風羣情  
允諧新命非遠某近封斯接殊眷先垂抃慰瞻攀但  
切誠抱云云

湖州杜孺休常侍

昨睹除書伏承榮膺寵命再理吳興伏惟感慰常侍



比臨霽水大振袁風適聆高握新蘭又見重分舊竹  
實謂政聲日洽人欲天從徵黃太守之書却隨鳳去  
借寇使君之衆迎得春來自此煙封茗畦月挂蘋渚  
不詠洞庭歸客卽吟金谷主人再樂三年終蘇一境  
云

桂苑筆耕集卷之七



桂苑筆耕集卷之八

別紙二十首

泗州于濤常侍

西川陳敬瑄相公

徐州時溥司空三首

諸葛爽相公二首

湖南閔頊尚書

幽州李可舉大王四首

滑州王令公

鹽鐵李都相公二首

龍州裴峴尚書

西川柳常侍

史館蕭邁相公

三相公

翰林侯劄學士

泗州于濤常侍

常侍榮戴貂冠遠驅熊軾能施善政遍恤疲氓暫牧



雄州已安樂國斯乃鄭巨君之甘雨再潤淮邊卜子  
夏之儒風重興泗上况屬彭門叛亂仍當汴路艱難  
獨守危城終摧敵壘果成茂績實驗全才且羣師悅  
挾纊之心鄰孽縮吞舟之口仁者有勇信非虛譚某  
昨奉詔書許令軍賞設爵而唯憑帝命舉賢而實契  
私誠今則寵換銀璫威兼鐵柱敬申厚禮用報殊功  
楚岸風聲處處而既傳滅寇隋堤柳色年年而祇望  
行春拜賀未期瞻思頗切某公牒同封送上云云

西川陳敬瑄相公

伏睹除書伏承相公以祝鳩之榮兼戴貂之貴禮登

八命寵冠三台伏惟感慶兼極伏以掌邦教之司無  
人則闕負國璽之任有德始居昔丁固休徵終叶生  
松之夢戴憑奧學會標奪席之名然十八年而既居  
後時五十重而何益於事曷若相公雄臨玉壘榮奉  
金輿昔也坐振風謠作一方之慈父今乃立迎天寵  
爲萬乘之主人使西夷免怨於後予南詔永知於戀  
聖是以秩歸鳳闕化洽龜城躡高蹤於黃闥紫扉耀  
偉質於朱衣皓帶豈獨一時之盛事實爲萬代之美  
譚某早沐眷知不任欣抃云云

徐州時溥司空



竊以誓於晉乘則重其執贄往來諷以楚詞則愧彼  
隨波上下永言有義有禮唯在知和而和况乃仁境  
接邦之彥兮善鄰存國之寶也始終相契今古何殊  
去春特辱長牋兼貽厚幣使者乃和門上校貺之以  
華棧大宛引夏殷罪已之言鋪陳數幅舉邾魯息民  
之義撫綏近封有以見真男子之用心古諸侯之行  
事其於景仰豈可弭忘今遣專人聊馳微信匪足爲  
報永以爲好伏惟照察

### 第二

司空利器倚天忠誠貫日授律而舉無遺策訓戎而

動有成功昨者窮寇驚奔銳師薄伐審麟史追逃之  
勢展豹篇決勝之機靜剗羣兇暗梟戎首范丹縣側  
雷威騰肅殺之聲季氏山邊天罰示告成之慶久畱  
盛績終屬雄才所謂有非常之人然後有非常之事  
絳灌亦一時俊傑關張非累世勳庸鏤姓名於金鼎  
玉鐘飾儀形於雲臺煙閣永言盡美孰敢爭先某幸  
接德鄰深遵義路每增欣賀固異等倫云云

### 第三

特辱長牋俯傳大捷誘賊將而暗除梟帥剗羣兇而  
遍戢豺聲夫何壯哉誠可畏也且黃巢謂逃天得計



乃揆日偷生書罪則竹乏南山流惡則浪乾東海逞  
暴於鋸牙鉤爪挺災於金闕玉京煙氛所侵塗炭皆  
匝諸道遞相逗撓別自佞張驅兵而未暇褫旗喪律  
而先聆返旆養姦既久翫寇何安若非司空以當春  
滋雨露之恩則坐迎龍節及初夏順雷霆之怒則立  
展豹韜遂得纜發銳師果殲窮寇刷國家之積憤弭  
州縣之餘殃所謂三年不飛終當一戰而霸况可飲  
頭而快意何須擢髮以論辜有以見報聖天子之恩  
固須待舉真將軍之令幸聯仁境先聽好音欣抃欽  
矚翰墨何寄云云

諸葛爽相公

伏承親提師旅遠赴戰征跋履山川蒙犯霜露不審  
近日尊體何似急景凋年寒威肅物令行麾下盡忘  
鞍瘵之傷望峻寰中將救瘡痍之患必有百靈薦祉  
七萃成功遠揚邵元帥之高名近繼郭汾陽之雄略  
則銷氛禳遍活烝黎有心之徒引領而望伏惟每加  
保重早副禱祈遠誠所望云云

第二

訪聆賊巢自逃商嶺久偪許田蔡師相連狂鋒尙熾  
當使以道途遠隔行止難知未施倚鹿之能但養斬



蛟之勇伏承相公親麾八陣深運六韜將靜掃其羣  
兕已齊驅其銳旅既見三冬擐甲卽致殊功方知五  
月渡瀘誠爲易事諸道固當高枕聖君便可廻鑾而  
未測鯨奔須防獸搏凡居戎閫合審軍機輒遣專人  
遠偵賊勢幸垂示及冀助討除伏惟照鑒謹狀

湖南閔頊尚書

親故前河西朱大夫到遠垂書示深荷眷私兼將尚  
書弄馬圖及貴府祥瑞事跡相示閱覽忘倦欣仰有  
餘且武藝所稱歷朝可數楚誇徹札魯銜蒙輪轡三  
百斤之長弓嘗傳漢史掉八十斤之雙戟亦著魏書

然而唯守一隅莫能四達長於射而短於御力甚壯  
而心甚怯永言戎伎難遇全才今者尚書術繼白猿  
名高赤兔旣占萬人之敵眞爲一代之雄雖居仗鉞  
之榮不忘據鞍之勇爰徵粉繪妙寫風儀遍覽左旋  
右抽唯知目駭神聳彼繫繩逞捷運臂服勤實謂區  
區瑣瑣者爾况乃夢符捧日政洽觀風花竹呈祥果  
驗中興之運龜龍薦感皆標上瑞之姿若非望重行  
春歌喧來暮則何以三軍效勇永諧欽化之名七郡  
懷恩盡表殊常之應必期渥澤繼入瀟湘此則但睹  
其電擊雲飛鷹麟鷲視每勞企想無以喻言唯望慎



舉政條仰酬寵寄方值四郊多壘實憑萬里長城其  
他中心藏之永以爲好幸垂諒察云云

幽州李可舉大王

不審自履初夏尊體動止何如伏想趙盾日威雄臨  
北塞袁宏風化遙助南薰固當九郡懷恩百靈薦祉  
符提白玉儼標萬里之長城臺築黃金遍啓四方之  
賢路豈止應掛絲之夢自然超衣錦之榮伏惟精慎  
寢興別迎寵冊永扶昌運大洽羣情今遣諸葛果卿  
假以郵巡修聘旣愧未成好幣又慮或失良材無限  
遠誠各具別狀云云

第二

雲龍在想風馬異區末由傾蓋之誠空切着鞭之望  
雖傳鱗翼莫寫肺肝况某俯顧家門忝同里閭每詠  
維桑之什卽懷喬木之恩幸蒙侍中大王不賤家丘  
深知國產曲垂厚獎頻辱好音然則苟能知心何假  
會面以斯佩荷可鑒依攀今緣國患未除鄰讎不戢  
甚欲慎言結舌其如憤氣填胷略假牋毫具陳事實  
恃惠子之知我望明王之鑒賢伏惟恩私遠察誠素  
云云

第三



伏以蜂蟻巢窠猶能稔惡熊羆羆隊伍未見摧兇在於  
義士忠臣莫不痛心疾首某蓋謂去年奉詔遂於近  
境旋師然今若終不自行必恐竟無所就已從中夏  
遍閱大軍待剗淮戎卽登汴道但以指其百勝決此  
一行人不異心事希同力侍中大王族榮周姓爵貴  
漢封固多報國之誠常貯安邦之術見茲禍難忍不  
憂勤某旣事征行輒申控告伏望差借兵士助平寇  
戎得貴藩精騎五千勝諸道羸師十萬佇收京闕尅  
在旬時亦已先具奏陳所貴免成專輒申包胥之告  
急與此雖殊趙充國之請行于今可試幸垂亮察必

賜允從不敢獨擅茂勳所冀均分重賞忠誠之切實  
在於斯伏惟永存始終早示可否未間顛望可想眷  
翹云云

第四

別奉榮緘遠搜古籍其於降歎無以喻陳且近者列  
土諸侯盈庭多士唯以宦塗銳志少於儒術畱心而  
乃侍中大王博古通今去華取實燕碣石之接土已  
繼芳蹤漢維城之好書遠符仁旨是以訪遺編於汲  
冢尋墜簡於魯宮然則荆軻易水之歌徒矜壯氣召  
伯甘棠之詠虛播政聲豈若博采聖人之書用光君



子之道但懷鑽仰敢覬切磋况某久擁戎旃難親講  
席耽讀闕五千卷之數藏貯無三十車之多自奉指  
蹤願申誠懇遍令列肆廣集異書冀資日益之功寧  
憚風詠之過必可徵名東觀承乏西齋伏惟俯賜鑒  
察云云

滑州王令公

某蒙恩忝官不任感懼某粗傳堂構謬荷國恩然而  
術略素貧勳勞甚淺早分相印累陟師壇每遇福過  
災生蓋爲材微任重一自四郊多壘萬乘蒙塵未施  
毫髮之功深負咽喉之寄羊皮狐腋空思趙簡子之

言瓦釜黃鍾寧免楚大夫之歎旣難展用唯願退閑  
方欲瀝血拜章奉身請老豈料更隨衆例亦忝殊榮  
遽登常伯之高資復益實封之異寵伐檀可懼橫草  
何申伏緣遞路不通制書未到先垂榮問過辱獎詞  
旣聆天上之音不愧月中之夢末由陳謝但切兢惶  
云云

鹽鐵李都相公

某蒙恩忝官不任感懼伏以納言峻秩眞食殊榮有  
扶持社稷之功有燮理陰陽之術方居正位允洽羣  
情如某德乏潤身智慙周物况逢多事未展壯圖動



無効於啓行靜有能於臥理加以久司筦貨實寡籌  
謀既虧於富國贍軍深愧於木牛流馬唯甘黜削永  
遂優閒豈料聖澤無偏戎藩有忝轉飛畫鹿昔年而  
莫見休徵冠簪豐貂今日而愈慙非據仍加班邑何  
報聖朝此皆僕射每賜保持得榮交代唯期勵節共  
願匡時陳謝末由依攀益切云云

第二

竊以世途易變時事難言泛泛如水中自安滔滔者  
天下皆是雖董卓已燃巨腹衆切歡呼而桓彝若有  
忠魂潛應慟哭每窺師律空激壯圖今則大駕未旋  
外藩多難獲利者唯謀潤屋握兵者誰解清宮當道  
雖乏供須但勤貢獻願早迴於御輦難空倚於賦輿  
割占所因指撝斯在必希朗鑒深察鄙誠其他卽遣  
專人冀具後狀云云

龍州裴峴尚書

遠勞專介特枉華緘發函睹不滅之蹤滿幅示相憂  
之旨其於佩惠何以寄言且國步猶艱天心難測忠  
直者韜聲戢影姦邪者鼓舌簸唇彼旣一時此須三  
黜唯當竭節豈足興言尚書偶值危時暫淹雅望將  
期歷試無限卑栖寵辱若驚周柱史非無意也行藏



自保魯司寇有是言乎多謝故人勉報聖主分憂救  
瘼爲政非輕志操不虧恩榮斯在伏惟諒察云云

西川柳常侍

某頃鎮龜城別營雉堞蓋符天意得就土功今者幸  
遇巡遊謂申績効久畱御輦俾立豐碑杜元凱方愧  
勳名李玄感敢言德政雖忝當功受賞其如見寵若  
驚常侍直道而行樂人之善遠垂華翰過辱獎詞以  
永傳不朽之譚先見未來之事可使美掩蜀都之賦  
高齊劔閣之銘荷戴兢兢無以指喻伏惟照察云云

史館蕭邁相公

某日無勞効天降寵光雖雨露常均不辭潤物而丘  
山漸重莫遂安身况蒙相公察以獨立聖朝勤行直  
道迥垂芘賴免使湮沉既闢洪爐辱陶鎔之厚賜仍  
揮彩筆煩刻畫之妍詞以爲動有成功前無強敵撫  
寧淮甸靜戢煙塵繼陳任土之儀遠瀝望雲之懇遂  
使榮升畫室特解牢盆更增班邑之恩尙假統兵之  
位仰窺華翰俯揣凡材未能息多壘之災何以竊長  
城之譽唯期激勵少報生成拜賜未前懷仁益切云  
云

三相公



某蒙恩忝官不任感懼伏以風后古官是聖代弼諧  
所重國僑美賞非賢才負荷固難必也挺秀儒林鉤  
深學海方可奪席占五十重之譽享秩稱二千石之  
榮如某任重咽喉功微毫髮早提兵柄不能靜剗寇  
戎久握利權無以廣資經費雖進退每從於帝命而  
否臧實愧於軍謀以茲責躬無所逃罪但願罷歸林  
藪絕望雲霄豈料宸襟猶傷墜履自上安下方慙畫  
鹿之幡居高飲清忽戴附蟬之冕解煩難於平准增  
寵祿於實封此皆相公啓導睿慈庇安戎律使貞金  
鍊火免銷耗於毒煙直材摧霜更敷榮於聖日唯當  
親驅銳旅遍討羣兇冀成破竹之功少贖伐檀之刺  
末由陳謝悚惕增深云云

翰林侯劄學士

某材略素貧勳勞甚薄謬蒙睿渥累陟華資今者拜  
以古官加之真食伏蒙學士親奉宸睠過垂獎詞煩  
郭璞之彩毫榮勝軒冕使夷吾之瑣器頓異斗筲遭  
逢實契於百生銘鏤豈唯於一字但冀仰憑筆陣更  
鍊戎韜充國壯心早遂征行之望無鹽陋質免慙刻  
畫之恩荷戴兢惶不任誠懇末由拜賜但切依攀云  
云



桂苑筆耕集卷之八

桂苑筆耕集卷之八

國家圖書館, NATIONAL CENTRAL LIBRARY, TAIWAN, R.O.C.





桂苑筆耕集卷之九

別紙二十首

都統王令公三首

浙西周寶司空五首

宣歙裴虔餘尚書三首

壁州鄭凝績尚書二首

太保相公鄭畋

護軍郟公甫將軍三首

前左省衛增常侍

泗州于濤尚書二首

都統王令公

近者專馳賀狀伏計已覽卑誠久絕來音但多景戀  
令公始終陶冶表裏經綸王商能止於訛言謝萬暫  
提其勁卒奪窮寇姦兇之魄活疲毗震懾之魂行旣  
順天捷當克日某比承詔旨久緩師期今伏見令公



命許君親身先將校幸叶彈冠之望倍驚投袂之心  
已閱全師旣離弊鎮雖自稱岸上之虎或謂當仁而  
不畏水中之龍實歸重德唯期助役非敢貪功欲取  
來月上旬決謀進退直衝宋野先會梁園謹遣專人  
咨探行李輒覬廻信聊紓遠懷伏惟恩私深賜鑑察  
云云

### 第二

累專寓狀粗得輸誠繼奉榮緘益銘殊眷不審近日  
尊體何似夏星沒火秋瑄飄灰佇妖氣之雪銷想軍  
聲之雷振伏計振振君子之德仡仡勇夫之誠足可

憑有慶之威誓無譁之衆功期一舉勢必萬全謝太  
傅之智謀預知大捷鮑參軍之歌詠唯佇中興伏惟  
慎保節宣用諸時望某常銜曩顧况捧溫言朝禱暮  
祈可量卑懇云云

### 第三

某自承令公親率銳師佇殲窮寇便謀訓練欲赴戰  
征願折豺牙仰瞻馬首履山川而犯霜露久決心期  
擐甲胄而峙糗糧早成力辦不料徐戎忽聚費誓猶  
陳未豁征途難通饋輦以此早申誠懇但切憂惶伏  
想萬夫爭殲弩之先八表望建橐之令佇見龍歸魏



闕却迎鳳舞荀池雖居喙息跛行盡解口祈心禱某  
早窺偉量遙稟壯圖仰視旄頭漸覓奔藏之處俯看  
屐齒唯懷斷折之虞恭竦捷音專申賀禮未前祝望  
不暇啓陳云云

浙西周寶司空

昨奉緘翰兼寄示書碑樣眷私旣深披閱無倦其於  
榮抃無以喻陳某每念久握兵戎累移節制雖纘弓  
裘之業未揚鍾鼎之勳况乃來暮歌稀行春化拙豈  
期睿獎特采微勞許標不朽之規遠降非常之寵至  
如仲尼儒術始流芳於沂水之湄元凱戰功方掛美

於峴山之頂愚實何効遂叨此榮司空念切憂忘事  
諧響應猥垂恩力妙選書工所謂知臣者莫若聖君  
成我者固須良友有始有卒念茲在茲彼雖未起雕  
鏤此已先深銘鏤今者干戈務擁筆硯事疎不及別  
請他人敬遵來命唯望早成刊勒實賴獎憐其碑詞  
同封呈上云云

第二

錄温者包藏異謀玷污玄化螻蝻暫成聚窟鴟梟貴  
欲同巢誠謂天高可欺不知日遠能照果彰罪跡遂  
舉刑書旣絕慮於竊鉄俾成規於用鉞言堪自賀事



必相傳豈料司空染五色毫飛一函紙徵美詞於魯  
史辱虛譽於劉賤列土除兇不負國章在手臨風拜  
賜其如戎律拘身未啓素誠但銘殊貺

第三

揚示詔書仰窺聖旨佇攀高躅倍激壯懷司空寄綰  
吳門瞰懸魏闕况奉臣哉之命必興王者之師但希  
水簇舟舡幸遵舊俗山堆戈甲早振雄威副大君旰  
食之勤慰下走朝飢之望某祇看風信便泛江程五  
兩翩翻解指朝天之路三軍踊躍待申破竹之功許  
接後塵遠示行日儻可從心所欲必希攜手同行王

導有言無作楚囚相對劉琨養勇以誅逆虜爲期事  
可榮今功何讓古旣銜帝語勿老師徒願因江漢之  
征得遂瀟湘之遇云云

第四

伏以山岳降靈尹吉甫之全德風雷奮氣竇世寧之  
異祥况乃景值新秋時當聖代間生英傑高建勳庸  
伏惟相公名可掩瑜志堪奪璧魏公子春霆振響有  
物皆驚晉大夫冬日流輝無人不愛深蘊安劉之業  
終成佐漢之謀今則又慶生辰永資景福出握元戎  
之柄旣播嘉聲入持宰相之權則迎急詔禱祝攀戀



不任下情有少續壽之儀謹具別狀寄獻云云

第五

專使押衙傅遜至啓閱華緘奉承珍貺光輝奪目荷戴銘心况承已奉堯言永除回怒繼好息民之義遠耀麟經輸忠報主之誠頻傳鴈訊喜氣連鋪於兩岸嘉聲遍振於四鄰敬仰成規深敦曩契唯願內防覬譖外息狐疑必期勩力於公家不敢欺心於閭室伏惟深賜云云

宣歙裴虔餘尚書

今月十六日裴校書至伏蒙深追曩顧迥黜違言捐

之以榮賤辱之以好幣情敦刻畫無非譽過之詞事繫琢磨宛是愛忘之眷既多受賜永切銜知不審自履閏秋尊體何似伏想蟬噪暮景鶴叫晴空樓下長溪閱政聲而不息窓中遠岫引詩思以無窮伏惟侍膳之餘公退之暇精加保愛佇俟寵徵某早願攀嵇近蒙善鄭深祝瞻望豈任下情云云

第二

去年因景氏子有小人言讒誣之事多興噂啗之詞不少動成忌器久阻親仁昨以戎首既摧禍胎自剖遂脩舊好聊達微誠伏蒙尚書特請嘉賓遠賚厚幣



相苑筆耕卷九  
俾息四方之笑永通兩地之歡捧嘉貺而增榮窺雅  
言而竊抃况對蓮池之客實逢桂苑之仙自此句渚  
清波已能流惡隋河遠派亦得洗瑕鍊多而既識金  
精燒罷而共知玉冷伏惟仁鑒俯察愚衷云云

第三

當司宣歙院被浙西越局侵權差官奪務以強自恃  
謂暴無傷仰計通仁備詳深弊今者鹺務却仍舊貫  
已有詔書浙西雖近宋讐固殊魯瘠只解租庸副職  
尚提招討兵符宜慙已往之非用結將來之好竊知  
猶尋亂轍愈弄雄權再署周正罔思唐令宣歙院上

違聖旨下阻羣情實虧臣子之誠豈追鬼神之怒既  
失用和爲貴唯知長惡不悛伏望尚書洞察事情俾  
全理體雖知秦鏡固無遺鑿之虞或恐齊竽猶有濫  
吹之者能摧狡妄遠托威嚴亦慮官吏驚疑必望深  
加撫恤幸甚

壁州鄭凝績尚書

賢尊相公不聞庸虛早垂眷顧每念攀鴻之懇頻傳  
繫鴈之書動皆陶侃之手蹤曾非陳遵之口占寶玩  
而字終不滅何翹三年輝榮而恩有所從倍賢十部  
况與尚書頃依鳳里已覩龍章清談深仰於阿戎異



禮得攀於侯昱高山仰止何日忘之今者遠辱榮緘  
過垂虛譽永言抃荷但務鐫銘云云

第二

某素無材術謬荷寵章頃握兵權方舉上將軍之令  
爰沾睿渥叨承大司馬之榮仰覩鳳書深慙豹略此  
時未審尙書躡八花墀之影綴五色筆之詞刻畫恩  
深游揚意重不獲早申感激遠謝褒稱又奉華緘方  
知麗藻雖早榮紙貴固無愧於士安而每想筆乾實  
有慙於玄照既多闕禮何贖深辜伏惟眷私終賜恕  
察云云

太保相公鄭畋

自承相公大郎再持廟筭大庇藩條况蒙特假陶匄  
正歸權筦雖則魯爲長府仍舊貫之言行其如晉閱  
被廬作新軍之意切未能措手尋見移權凡所阻難  
自能審度遠垂批示倍荷恩私如愚者焉所獲多矣  
敢速官謗有負親知伏惟鑑察謹狀

護軍郟公甫將軍

某用舍行藏唯遵帝命始終去就冀洽羣情仰酬萬  
乘之知豈計一朝之忿昨者繼窺天旨更勵冰心遂  
令專介傳書願得近鄰釋憾周相公似能遵稟免致



悔尤既知蘧瑗之非必息廉頗之怒一帶水永除多  
梗九重天實鑑忠誠自此日聆鷄犬之音風識馬牛  
之性往來無壅彼此相成斯皆將軍遠贊睿慈旁均  
和氣共成美事但荷深仁特辱芳緘過垂虛譽銘戴  
慙惕豈任下情

第二

特垂寵示過辱獎詞竊知將校官寮三軍百姓共陳  
衆狀請發奏章以爲煙塵自起於四郊塗炭遍加於  
九野唯有斗牛之境稍無戎馬之災此實地分所招  
天心見庇蓋烝黎之福也何功力之有焉豈料將軍

過聽衆詞助成美事欲煩錄奏特賜傳言然以拙政  
而誘羣情以虛言而干聖鑒固爲不可實所難當伏  
惟終寢奏論俾速官謗便同受賜非敢矯言伏惟允  
察云云

第三

特辱華緘猥傳吉語初驚善謔終荷深仁某每省庸  
虛過沾寵寄未能報主豈至封王雖漢代諸侯亦流  
恩於異姓而周書列爵須示賞於殊勳曾無剖竹之  
聲詎有分茅之望旣非實譽必恐虛傳但慙眷私未  
敢陳謝云云



前左省衛增常侍

忽奉榮緘特垂善謔宣父則欽遵三益老君則唯贈一言仰銜成我之恩但抱起予之歎自常侍遠勞仙騎俯顧弊藩竊承久陟道途倦垂軒蓋戀德而披雲尚阻懷誠而啓露未期每憶笑談莫勝飢渴某也早以勤行至道唯希翊贊聖朝張良正遇於漢恩敢言絕跡范蠡未除其越恥詎欲逃名非求八百歲以成春但讀五千言而勵節幸無大故且恕小瑕方願惠然肯來豈將率爾而對云云

泗州于濤尚書

蠡彼徐戎聚茲餘燼敢侵貴境再逞姦謀只應來就誅夷固可立期撲滅况尚書德超定國威跨栗磳妙略防危實知孺子可教強隣結憾是表忠臣不和去年旣振雄威今日更資茂績此已徵驅衆旅救援仁封永言牙爪之勤須託指蹤之妙願諧羣望暫屈長才輒敢請充都指揮使仰俟一呼之命同成九拒之功冀耀兵權早燔寇黨得脫齊桓之恥唯憑郤縠之賢伏惟眷私深賜照察

第二

昨者竊聆有拔城之議遂申忠告冀保遠圖伏奉廻



緘得窺深旨且徐戎肆虐固非楚子之能泗俗懷忠  
不比蕭人之怯欲謀自潰何謂克終雖云有慮於防  
川豈可潛思於坐井某近奉詔旨頗促軍期卽得經  
過貴州便可剷除寇壘未見殷輪之苦且更勉旃其  
於沃釜之言已承命也他具前狀此不繁陳云云

桂苑筆耕集卷之九



桂苑筆耕集卷之十

別紙二十首

魏博韓簡侍中

鄂州崔紹大夫

考功蔣泳郎中

前泗州鄭廉常侍

新羅探候使朴仁

範員外

蕭邁相公二首

田軍容

都統王令公賀冬至

浙西周寶司空

前宣歙裴虔餘尚書

幽州李可舉太保五首

徐泗時司空

田令孜軍容送器物

振武赫連鐸尚書

謝馬

幽州李可舉大王

魏博韓簡侍中



一自黃巾北侵翠輦西幸蝗無避境蟻已壞堤內無  
宮闕之災外結藩維之恥諸葛爽者豕食難飽豺聲  
易驕却躡迷途敢凌貴圉侍中手驅虎隊心閱豹韜  
一陣纔施三城遂復雄功始建冊命俄臨永爲壯士  
之盛談別作諸侯之美事某昨欲剖巢燻穴久爲淬  
甲勵兵及出師徒又蒙詔旨且令利權山海鎮壓江  
淮一弭國讎先資邦賦然其奈夜眠軍幕霜橫枕上  
之戈曉掛戎衣雷吼匣中之劍終願親揚勇略靜滅  
兇徒伏惟鑑察

鄂州崔紹大夫

遠蒙仁私特示表藁其於歎仰無以喻陳某夙練戎  
韜願裨王略不愧於管天錐地猶勤於撮壤導涓遂  
敢累貢忠誠冀廻聖鑑儻或六龍下峽豈同五馬渡  
江中朝之禮樂無虧下武之功猷斯在果蒙大夫惠  
於宗族贊以表章過垂華袞之褒益睹彩毫之妙古  
詩云不惜歌者苦但傷知音稀今日知音幸遇之矣  
然榮示中媿茂弘之德業齊越石之機謀自顧瑣才  
何當虛譽今則王導清望已推於首座相公劉琨至  
誠亦付於襄陽僕射必期英鑑永察愚衷云云

考功蔣泳郎中



特勞專介忽辱榮緘過垂軒冕之褒永寘巾箱之寶  
實慙彼已豈敢當仁郎中學士暫避韜時偶勞僑跡  
今者官清司績職峻集仙麟趾殿中久侍驂鸞之客  
螭頭階上則親吐鳳之才豈唯舉四善之精詳蓋必  
備九重之顧問鋪陳組繡演暢絲綸則也虞夏商周  
之書重行聖代蕭曹魏邴之位更屬何人詎可守三  
徑之寂寥慮千山之險阻許垂訪別專冀祇迎伏惟  
眷私幸賜鑑察

前泗州鄭廉常侍

竊以寇戎未殄士卒多驕凡曰郡侯實難政理縱得  
上和下睦猶爲朝是夕非况福乃儻來禍惟不測但  
無慙於屋漏亦何累於國恩然而常侍蓋切奉公匪  
疎撫士雖云驚擾終免侵傷有以見爲政無私當仁  
有裕伏承已離泗水始及淮山捧閱來緘撫謙往咎  
其於瞻仰胡可弭忘然則郡守懸魚旣繼古人之節  
塞翁喪馬可寬達士之懷云云

新羅探候使朴仁範員外

忽奉公狀備睹忠誠慰愜欽依但增衷抱員外芳含  
雞樹秀稟鼇山來登天上之金牌桂分高影去陟日  
邊之粉署蘭吐餘香今者仰戀聖朝遠銜王命捧琛



執贄棧險航深能獻欵於表章欲致誠於官守雖無  
奉使難在此時九州之侯伯傾心萬國之臣僚沮色  
幸來槃鎮得接清規况奉貴國大王特致書信相問  
將成美事不惜直言儻員外止到淮壩却歸海徼縱  
得上陳有理其如外議難防無念東還決爲西笑聖  
主方深倚望賢王佇荷寵榮道路亦通舟舡無壅勿  
移素志勉赴遠行峽中寇戎或聚或散此亦專令防  
援必應免致驚憂且過鬱蒸可謀征邁館中有闕幸  
垂示之所來探候事已令錄表申奏敬惟鑑察

蕭邁相公

某累貢表章請議巡幸忠誠屢罄宸睭未廻冀保始  
終再陳利害匪望河陽之狩願迎汾水之遊竊以諸  
道賦輿皆遵峽路多是旣五致一蓋已萬水千山後  
網不繼前綱所貢不如所費况近者西從蜀國南至  
荆門似有微災恐遺巨患忽若草寇侵據江陵阻艱  
則榛梗旣多苞茅莫入或更蠻戎伺隙必令越嶠勞  
兵避柱觸楹防微可誠行舟墜劍執滯固難某以孝  
子不諛其親忠臣不諂其主遂陳狂瞽遠贖聖聰唯  
望略泛龍舟暫遷鳳里庶使九州修貢不愆任土之  
宜四海歸仁盡遂朝天之望且賊巢兇狂聚衆穢贖



經時縱能早覆妖巢豈可便迴法駕淮南乃寰中俗  
富聞外名高喻以金甌永無釁缺比於玉壘實異繁  
華伏惟相公居注意之朝處沃心之位周成王之卜  
洛始託姬公晉元帝之渡江終資仲父早申決議仰  
贊宸衷能成可久之規益表無私之德某頃在西川  
制置及於南詔通和雖爲先察於微豈欲驟稱其伐  
但緣相公皆垂目驗不敢面欺則今日荆蜀災星未  
能退舍吳楚福地實可遷都事歸從權化資垂拱永  
致一家之理必輸萬里之誠某言不近誣志唯遠慮  
非奪日官之業冀垂天子之恩幸望國僑無譏裨竈

謹以具表陳請訖伏惟云云

第二

伏以物忌太盛器滿必傾自古有言至今爲誠苟或  
不能知止但欲貪榮則有折鼎足之虞炊劔頭之險  
某每念遭逢聖運紹續舊勳北定羌戎南征蠻蜚東  
降齊盜西建蜀城高提三尺之權粗展四方之志然  
自煙塵聚孽原野宿兵曾無敦閱之全材先叨統帥  
詎有縱橫之令策兼領利權而乃不能首唱義聲身  
先銳旅戮奔鯨於海澤逐獬犬於秦關遽及火熾祠  
篝火驚御輦遠聆巡幸便議征行但以每當誓衆之



時卽奉止軍之詔雖自始終勵節其如進退失圖華元興城者之謳子產致國人之謗乃有浙侯構隙沛將加兵三年已來二憾不釋蝸蟬競噪蚌鷓相譏厚誣而巧弄舌端顯奏而亂搖心曲求刺舡而不暇想投杼以難逃伏賴相公照以秦臺調之伊鼎察邾公之愬鄭伯解晉帝之疑石苞免挂刑章尙縻寵秩旣蒙明洗誠合淬磨更修克己之心永竭勤王之力直以松筠不改雖自保於堅貞蒲柳先秋遽已傷於衰暮筋骸漸憊志氣潛摧縱欲自強終憂不逮今者幸遇上京已復大駕則迴麟鬪龍吟固息興妖之慮放

牛歸馬實迎偃武之期某也旣在清時誠爲棄物况縈沉痼深負壯圖攬鏡無繆投簪是念豈慕祈奚請老尙處冗員唯思范蠡愛閑得行素意乞解所職自卜爲宜伏惟相公選士惟賢退人以禮俯矜羸劣特賜允從雖慚未遂報恩免更久爲尸祿仰干陶冶敬託賤毫始知調急聲哀唯愧詞窮理盡伏惟俯賜恩鑑

田軍容

某慙無術略久竊榮寵提漢法之重權陟秦官之極品莫申展効何贖貪叨况自寇盜奔侵京都陷覆久



守咽喉之寄不成毫髮之功雖兵柄既多固難措手而君恩未報實切靦顏况乃室怒潛興鄰讎競起陸遜徒稱其佳吏崔暹終憾於癡人顯奏相誣多言可畏幸蒙軍容推心庇護極力保持雖遭貝錦之詞免陷織羅之罪祇合以戀軒思幄策蹇磨鉛畢命爲期在公無倦但緣攝生罕妙從役久勤齒髮既衰精神亦耗少私寡欲敢言君子者乎多病愛閑方謂古人是也智力不可強進寵章不可濫行實覺妨賢只宜求退今者肅清鳳闕撲滅梟巢麩弓矢以銷兵永除戎備垂衣裳而致理廣任賢才如某者寒灰罷燃智

井誰顧往歲之南征北伐雖忝當仁此時之尸祿素餐逾慙非據既失行驅十乘豈能臥護六軍輒貢表章懇辭爵位伏惟軍容察以有犯無隱之義難進易退之規仰贊帝俞俯從愚願敢有脅肩諂笑固無沒齒怨言幸逢四海之昇平願指一丘而養老干黷清德兢惕實深伏惟云云

都統王令公賀冬至

伏以律管潛吹星躔改候觀臺望瑞雲物呈祥伏惟令公每布祥雲常懸愛日三軍殫弩挾楚續以忘寒五夜枕戈擁孫衾而達曙必資景福早建殊功惟當



肅殺之時便遂討除之勢四方聳耳佇聆大捷之音  
萬乘傾心永致中興之運某末由陳賀但切禱祈

浙西周寶司空

伏以禮慶履長傳標視朔夷夏契混同之運乾坤叶  
交泰之期伏惟司空相公浙水流恩吳山變俗既睹  
趙衰之日永洽物情願親傳說之星早環帝座末由  
拜賀但切禱祈云云

前宣歙裴虔餘尚書

伏以禮稱迎日傳載書雲當寰中賀聖之晨是水外  
寢兵之際宜陳善祝仰薦殊祥伏惟尚書政報褰帷

慶資溫席已捧徵黃之詔固諧夢說之期人仰板輿  
羨老萊之榮養帝留金鼎待伊尹之來調某雖戎律  
拘身而清規在想末由拜賀但切禱祈

幽州李可舉太保

碾玉排方腰帶壹條並金魚袋壹枚金花銀  
合盛重一百六十兩

右件腰帶體資廉潤功就琢磨雖慙鄂坂之金稍勝  
延陵之縞珪璋比德宜親佩劍之腰霜雪呈華願近  
生松之腹動則金章躍鯉靜乃寶匣盤龍既當屈以  
求伸唯望服之無斃謹專寄獻遠表依攀伏惟恩私



特垂檢納

銀結條燈籠一枚

承燈蓋白盛荷葉一漆木匣盛金銅鑲鑰並全

金花平脫銀裝硯臺一具

垂鈔香囊五枚漆木匣盛金銅鑲鑰

全具

金花平脫銀裝硯匣並硯几一具

銀硯水瓶等四事硯

几在第二匣內

右伏以持異物而奉異人嘗聆斯語覽遠書而愧遠客亦驗古詩志常切於攀鴻事不慙於獻鵠每逢珍玩則繫懇誠前件燈籠硯臺等鑄鑲成功披砂潤色運巧而靈絲綴藻標奇而霞藥雕華高懸謂雲蓋凌

風遙視疑露盤含日龍膏豹髓偏宜卜夜於歡筵鳳筆鵝牋亦可依仁於末席加以謝囊分掛孔硯深藏虛心而只待含香蘊器而終能處默是敢徵美言於舉燭寄微慊於濡毫伏惟無思宋殿葛籠僻敦儉約或逞張旭草聖許近恩輝必可遠耀九光深滋五色隔飛蛾而救物仁化彌彰研含麝以傳書德馨增馥非無所採粗有可觀必望眷私俯垂容納幸甚云云  
金花陷銀柘裏合大小共三具  
銀接頭紅牙匙筋一十對  
犀杓子四隻已上大合內盛銀裝茶椀四隻



在中合  
內盛

犀樛子二十片在小合內盛金花銀脚螺杯  
一隻

右件匙筋犀合茶碗螺杯等雖愧金盤粗勝棘匕鈿  
玫瑰之表異固讓魏銘詠玳瑁之標奇敢徵潘賦所  
貴者煙排翠點霞染纖條掌握增榮不慮劉使君見  
失指蹤任意或希柳御史自攜况乃水族殊姿天成  
雅器永免蜘蛛寄跡能將鸚鵡齊名稍謂珍奇遠思  
寄獻伏惟靜籌帷幄許接罇罍對郭隗於高臺深傾  
露液遣甘需於仙闕勝醉霞漿伏惟恩私特賜檢納

幸甚云云

織成紅錦繳壁兩條 暖子錦三疋

被錦兩疋 西川羅夾纈二十疋

真紅地絹夾纈八十疋

右件繳壁錦纈等龜城傳樣鳳杼成功張廣幅而宛  
見虹舒疊綵繪而免慙鮫織雖五十里之誇步障則  
難可爭光而四十疋之製戎衣則或堪入用亦冀備  
會稽守晝行之服換平津侯夜寐之衾不咎輕微特  
垂容納于浼斯甚兢慙實多云云

安南開海路圖一面



西川羅城圖一面 並八幅紫綾緣

右竊以事畏人知功慙自衒孟側奔殿終著美於魯  
論郗至驟稱果興譏於晉乘妍媸可鑒今古何殊頃  
者銅柱南標金墉西建開八百里之險路則雲將驅  
石雷師劈山築四十里之新城則水神滲泉地媪供  
土蓋乃感忠誠於上鑑標壯觀於外藩敢言簡在帝  
心實匪率由人力今則八蠻歸化萬乘省方既能有  
備無虞亦所當仁不讓去年嘗傳雅旨欲覽微功乃  
徵於墨妙筆精遍寫彼長途峻壘宛如縮地不止移  
山遠遣寄呈略希展閱必謂桂陽衛颯誠瑣瑣焉亦

知蜀國張儀是區區者恃深眷而不拘小節激壯圖  
而無訝大言伏惟云云

徐泗時司空

物色

右伏以縞帶紵衣魯史乃先其所出投桃報李周詩  
用表於相知永言沼沚之毛豈讓琅玕之寶蓋防闕  
禮只貴申誠前件物等雖曰土宜亦由波及實慙華  
麗况至鈔微難把八行盡寫傳心之語唯憑一介聊  
陳藉手之儀伏惟眷私特賜檢納云云

田令孜軍容送器物



右竊以氛曠未銷道途尚梗久乖專信略達微誠每  
憂於遠莫致之不敢以多爲貴者前件器物貨非難  
得器實易盈雖慙鏐銑之名願接罇壘之列輒將寄  
獻遠表依攀伏望無掛意於四知幸流恩於一諾特  
垂容納云云

振武赫連鐸尚書謝馬狗

右特蒙眷知遠有惠賚無庾亮的顱之害有陸機黃  
耳之能敢謂備於左牽右牽實爲馴於執勒執縶寧  
唯致遠况解防姦旣驅策之有期固指蹤而無失仰  
承重貺倍荷殊私末有報酬益多愧悚伏惟云云

幽州李可舉大王

青氈帳一口 金銅裝鉸具

右伏蒙恩私特賜惠賚委之專介衛以壯夫遙陟危  
途得張官舍不假棟梁交構能令戶牖全開出觀則  
一朵蓮峯入玩則千重錦浪加以頂標曉日額展晨  
霞靜吟而筠箔搖風俯視而地衣鋪雪舒卷皆成其  
壯觀行藏永佩於深仁莫不衒沙漠之奇模駭江淮  
之衆聽臥龍竊譽固當高枕無憂虜豹成功必可運  
籌決勝唯期尅捷全賴庇庥荷戴所深啓陳何及伏  
惟云云



桂苑筆耕集卷之十

國家圖書館, NATIONAL CENTRAL LIBRARY, TAIWAN, R.O.C.





桂苑筆耕

三

國家圖書館, NATIONAL CENTRAL LIBRARY, TAIWAN, R.O.C



桂苑筆耕集卷之十一

檄書四首書六首

都統巡官侍御史內供奉崔致遠 撰

檄黃巢書

招趙璋書

告報諸道徵會軍兵書

告報諸道徵促綱運書

答浙西周司空書

答江西王尚書書

答徐州時溥書


答襄陽却將軍書

浙西周寶司空書

浙西護軍焦將軍書

檄黃巢書

廣明二年七月八日諸道都統檢校太尉某告黃巢  
夫守正修常曰道臨危制變曰權智者成之於順時





愚者敗之於逆理然則雖百年繫命生死難期而萬事主心是非可辨今我以王師則有征無戰軍政則先惠後誅將期剋復上京固且敷陳大信敬承嘉諭用戢奸謀且汝素是遐毗驟爲勅敵偶因乘勢輒敢亂常遂乃包藏禍心竊弄神器侵凌城闕穢黷宮闈既當罪極滔天必見敗深塗地噫唐虞已降苗扈弗賓無良無賴之徒不義不忠之輩爾曹所作何代而無遠則有劉曜王敦覬覦晉室近則有祿山朱泚吠噪皇家彼皆或手握強兵或身居重任叱吒則雷奔電走喧呼則霧塞烟橫然猶暫逞奸圖終殲醜類日

輪閣輾豈縱妖氛天網高懸必除兇族况汝出自閭閻之末起於隴畝之間以焚劫爲良謀以殺傷爲急務有大僣可以擢髮無小善可以贖身不唯天下之人皆思顯戮抑亦地中之鬼已議陰誅縱饒假氣遊魂早合亡神奪魄凡爲人事莫若自知吾不妄言汝須審聽比者我國家德深含垢恩重棄瑕授爾節旄寄爾方鎮爾猶自懷鳩毒不斂梟聲動則齧人行唯吠主乃至身負玄化兵纏紫微公侯則犇竄危途警蹕則巡遊遠地不能早歸德義但養頑兇斯則聖上於汝有赦罪之恩汝則於國有辜恩之罪必當死亡



無日何不畏懼于天况周鼎非發問之端漢宮豈偷  
安之所不知爾意終欲奚爲汝不聽乎道德經云飄  
風不終朝驟雨不終日天地尚不能久而况於人乎  
又不聽乎春秋傳曰天之假助不善非祚之也厚其  
凶惡而降之罰今汝藏奸匿暴惡積禍盈危以自安  
迷以不復所謂燕巢幕上漫恣騫飛魚戲鼎中卽看  
焦爛我緝熙雄略糾合諸軍猛將雲飛勇士雨集高  
旌大旆圍將楚塞之風戰艦樓船塞斷吳江之浪陶  
太尉銳於破敵楊司空嚴可稱神旁眺八維橫行萬  
里旣謂廣張烈火熱彼鴻毛何殊高舉泰山壓其鳥

卯卽日金神御節水伯迎師商風助肅殺之威晨露  
滌昏煩之氣波濤旣息道路卽通當解纜於石頭孫  
權後殿佇落帆於峴首杜預前驅收復京都剋期旬  
朔但以好生惡殺上帝深仁屈法申恩大朝令典討  
官賊者不懷私忿諭迷途者固在直言飛吾折簡之  
詞解爾倒懸之急汝其無成膠柱早學見機善自爲  
謀過而能改若願分茅列土開國承家免身首之橫  
分得功名之卓立無取信於面友可傳榮於耳孫此  
非兒女子所知實乃大丈夫之事早須相報無用見  
疑我命戴皇天信資白水必須言發響應不可恩多



怨深或若狂走所牽酣眠未寤猶將拒轍固欲守株  
則乃批熊拉豹之師一麾撲滅烏合鴟張之衆四散  
分飛身爲齊斧之膏骨作戎車之粉妻兒被戮宗族  
見誅想當燃腹之時必恐噬臍不及爾須酌量進退  
分別否臧與其叛而滅亡曷若順而榮貴但所望者  
必能致之勉尋壯士之規立期豹變無執愚夫之慮  
坐守狐疑某告

招趙璋書

都統太尉馳問趙璋古人有言曰大厦成而燕雀相  
賀湯沐具而蟻蝨相吊審其賀之與吊由彼依之與

違且爾同惡相成異謀斯構遽爲犯順尙敢偷安今  
我水陸徵軍天人助信久審風雲之會遠揚雷電之  
威卽當行展豹韜立擒梟帥剋收城闕靜剗烟塵想  
計爾曹具知吾意但以先春而後秋者天之道重賞  
而輕罰者君之恩遂乃馳吾咫尺之書問爾方寸之  
事爾等依憑大憝猾亂中朝罪已貫盈理須誅剪然  
若黃巢狠性能改雄心自新望其國封建彼家社勳  
業可超今邁古恩榮可付子傳孫必爲致之速相報  
也如或螳螂努臂猘狗磨牙輒欲拒張必當撲滅爾  
須審詳至理勸誘元兇欲令天下知名早申忠節柰



何草間求活終作叛徒况居成筭之中即在覆巢之下死生有命禍福無門唯審是非可知成敗所謂燕雀相賀蟻蝨相吊實在於知與不知順與不順良時易失嘉會難逢生爲有害之人死作無知之鬼深可恥也深可痛也勉惟去就早副指蹤悉之

告報諸道徵會軍兵書

中和二年五月十二日具銜某謹告某州府節度使逆賊黃巢自亂天常亟移星律縱使擢其賈髮詰罪難窮未能春彼狄喉稔奸斯極神誅可俟鬼恠何憑而敢鴟張鳳城熊據龍闕至於五尺童子猶欲請纓

况在四方諸侯忍爲投袂偶屬朝廷密施廣畫先倚甸侯不勞十道徵驅必謂一麾蕩定豈料軍令雖殊於兒戲將名莫驗於童謠未暇舉旗旋聆反旆遂使犬猶狂吠猿不驚號徒招翫寇之譏孰擅弭兵之譽聖上暫飛日馭親省風謠蔭暘行恩睿慮則雖勞罪已慕羶結望羣情則却怨後予然而自幸龜城久停轡輅秦雲遠隔蜀柳再芳每興霜露之懷聖情可想未滅烟塵之患臣節何安某去年羽檄先馳牙璋後舉唱義聲於遐邇養勇氣於偏裨於是廣徵陶侃之船久握辛毗之鉞畫鷁齊飛於雪浪檣烏高轉於烟



空必欲帆張曉風旗寢夜月纔離楚岸便到漢江直  
驅背水之師永破滔天之孽而乃未施豹略頻降鳳  
書已知諸道進軍不許遠藩離任詔旨云爲朕全吳  
越之地遣朕無東西之憂是以再閱綸音遂回組甲  
蓋乃仰遵帝命固非敢緩師期今則萬里專征誰能  
奮翼三年縱敵尙許磨牙賊巢雖戲鼎中已居机上  
搖尾狗子輒曾發狂斷頭將軍難可釋怒某幸忝握  
兵之要固當仗義而行近奉詔條遍徵戎旅一呼巡  
屬四集驍雄不唯被練二千實有控弦十萬已取今  
月十八日部領兵士發離本鎮必得直趨汴道徑入

潼關立刻梟巢去迎鑾駕引舜風之無外覩漢日之  
再中况都統王令公暗運智機別操戎柄已提勁卒  
卽展奇功足可相應軍謀共興王略諸道自從賊盛  
皆峻官榮尸爲食土之毛盡思効命矧乃荷天之寵  
豈合安身且大丈夫之在世也壯氣難伸良時易失  
苟或美事讓他人之手殊恩負聖主之心則莫測肺  
肝何施面目固應各勤訓練同願誅鋤瞻帝輦而魂  
飛擁戎軒而皆裂早看行色勿懷兒女之悲須把戰  
勳永作子孫之福謹告

告報諸道徵促綱運書



謹告某州節度使夫忠於國者無以家爲是故漢代  
微臣有傾產助邊之請魏朝烈士有舉宗陳力之言  
况乃邊寄榮身兵符在手遇大朝之多難見上宰之  
董戎而不能役致泛舟令行挈畚使戰士猶多飢色  
將軍未獻捷書但忝分憂實爲忍恥某昨從中夏再  
集大軍不慙素飽之名已誓無譁之衆仍差都押衙  
韓汶先賫金帛百萬疋救接都統令公軍前旣裝運  
船將扣飛檄言遵汴道徑指圃田必值徐戎來侵淮  
口扼斷河路攻圍郡城近者又擁兇徒直衝近境敢  
憑蝟結欲恣鯨吞當道旣見阻艱暫須停駐遂乃揀

徵驍勇往討頑兇佇靜封疆便登道路必可豁通綱  
運廣備供輸行稱東道主人非無意也立斬南陽太  
守竊有志焉諸道久荷深恩各居重任縱以家門寶  
貨猶合贍軍况將州縣賦輿豈宜壅利其宣武忠武  
天平昭義泰寧平虜河陽等道盡發雄師咸從統命  
其依饋運各已通流其浙東浙西宣州江西鄂州荆  
南湖南嶺南福建等道今欲踰年未聆發運若由水  
路須入汴河如此稽畱何因濟集必計杜畿美化遍  
得人心任峻奇謀兼施兵力速請同勤饋輦繼發綱  
船齊至都統軍前早期收復京闕其徐州實爲國蠹



豈止鄰讎蓋以天暫容奸地猶聚隱昔爲龐勛叛亂  
早合豬宮昨因時溥猖狂更宜塗地偶屬朝廷未誅  
大憝不問小瑕貴悅軍情驟加爵賞而乃時溥罔遵  
詔旨尙構奸謀去年曾犯淮山今夏又侵泗水乃作  
黃巢外應久妨諸道進軍先須剗當路之豺狼後可  
殄壞堤之螻蟻冀使隋皇新路楊柳含春無令漢祖  
舊鄉荆榛撲地凡承寵寄共察忠誠謹告

答浙西周司空書

某白忽覽來示驚憤兩深是何見事之乖如此發言  
之過且趙公約者背軍逃走行怙追擒遽投跡於貴

藩遂偷生於逋藪今則異端斯構細作爲名若能懷  
上士之心豈可信下人之口譚何容易事不酌量來  
示云位極上公權尊都統別興異見遽起他謀以何  
悔尤欲爲燒劫此乃稍殊雅責僅涉穢詞鼠尙有皮  
蓋譏無禮駟難及舌亦誠慎言豈是不爲虐兮誠非  
所可道也司空晚歲縱不以學識爲從事雋才亦合  
以智謀相贊虛成啗飯難望和羹未諭是非須陳本  
末具標五信無貯一疑且此三世立功無非報國四  
方出鎮曾不安家身持將相之權手握恩威之柄豈  
獨撫淮邊之俗終期安海內之人方切緝綏何言侵



相苑彙編卷十一  
伐其可信而不合疑者一也况今黃巾尚熾翠輦未歸方驅貔虎之師欲破豺狼之窟遠離槃鎮深託善鄰臨危而猶冀依憑守靜而更除損害其可信而不合疑者二也司空早聯中外永保初終言既馥於芝蘭操彌貞於松桂曾無釁隙每有音書偏深魯衛之情永絕張陳之事其可信而不合疑者三也浙西始爲交代未得多時陶公之官柳誰移召伯之遺棠不讓至於賊壘猶將信義招降况是舊藩豈以兵戎侵逼其可信而不合疑者四也昨自師過江浦令肅雪霜軍門則擊柝夜嚴行路則銜枚晝靜豈有任從海

則登舫趙公約則隔簾通報既不難爲指麾又何易得直至上流嘉客不瑕接迎是何下等健兒敢來親近其可信而不合疑者五也粗申大較可察中心何乃憑叛卒之讒詞失賢人之事體以此陳奏聖主以此傳告諸侯非我無辭是誰有過細尋來旨莫測貴懷爲當老耄所侵末年多變爲復狂迷偶作忠節遽乖夫耳不辨五聲曰聾目不分五采曰昧司空久當重寄已謂元臣因何妄發莠言或似自懷蓬性不知彭寵此時有按劍之疑却恐廉頗他日無負荆之處噫將帥則空榮列土君王則尚遠蒙塵更無匡復之



誠唯有猜嫌之事祇隔一條水脉便興萬種風言必計心虛遂成口實大凡獻酬以禮來往爲書理失其中事生非小且須審諦勿恣豪強於此難盡私誠其他備載公牒無遺後悔併棄前功某白

答江西王尚書書

十二月六日某白閣下遠捐長書深貽善諭一覽而發皇耳目再窺而驚越神魂是何詞彩之彬彬能致言端之懇懇既知約我以禮方信起予者商况乃事徵於美里聖人道媿於首陽義士切磋雖至刻畫何勝敬佩良箴專銘鄙抱然慮虛聲易應眞寶難知弄

唇吻以鑠金衆皆妙手拭瞳眸而辨玉多是清盲苟非原始要終則必唱子和汝是以略陳梗槩用察根源匪欲廣援古今所希暫曉左右僅同伐善豈免興慙君其審之僕所望也僕與浙帥周司空早於鳳里相識亦爲鴿原往還接載笑載言之時展如兄如弟之分况作建旗交代眞爲結綬相知既睦比鄰罷肩外戶江南江北祇鬪行春三楚三吳盡喧來暮方謂憑我友歲寒之節解吾君宵旰之憂豈料蒼烏高飛翠華遠狩僕以久叨重寄便決專征偶緣兵力未加人心尚囁遂於春首先發羽書仍請都統判官顧雲



協律議共成之事謀相見之期固非閱被廬之軍徵  
夾谷之會實欲親謀歃血方寫痛心若能接濟師徒  
粗得振揚聲勢而乃周司空却自棄同卽異不能捨  
短從長忽疑惑於澠池謂矜誇於踐土便見戒嚴城  
壁阻塞津途構猜嫌而信有小人遺故舊而曾無大  
過僕雖逢彼怒但守吾真及至中夏出軍外方多事  
冀安弊鎮旁倚近鄰又合幕客過江請爲都統副使  
豈銜弓旌之禮邀辟元戎祇憑鈇鉞之威撫綏近境  
周司空確乎阻意莞爾興譏不從固請之言自惜有  
餘之刃頻移曩顧但積沉猜見此初屯下瀨之師未

設中流之誓猶淹水道久候天風軍聲旣振於四鄰  
人意自防於兩岸偶有背軍官健趙公約者走投浙  
西釣以巧言構爲細作便移長牒妄說異端其書云  
位極上公權尊都統別興異見遽起他謀以何悔尤  
欲爲燒劫僕以趙襄子之忍辱念茲在茲藺相如之  
慎微有始有卒遂馳書牒具述事情聞司空尙發怨  
言自懷忤色與宣護景虔貞徐帥時溥者暗資積釁  
相應密謀各興梗路之兵戈遍告沿江之郡邑以至  
練成戰陣鎖斷征途僕若不辭險阻之虞必致殺傷  
之患坐甲而未期破竹迴車而用待負荆尋屬繼奉



絲綸不令離鎮遂驅組練却已班師雖云帝命斯遵實乃鄰兵所阻彼宣州者亦有所因春初寇犯黔州勢侵旬水况值前廉已去新帥未來既無禦捍之權恐落奸兇之便遂差押衙馮綬暫令安撫郡城蓋緣曾奉詔書特許便宜從事凡於制置得以指麾景虔貞常侍菽麥不分蘭蕕莫辨謂言專輒遽有侵凌殺害軍人劫掠財物馮綬幾臨死所劣得生還自此隋國怨興謝城信絕將投彼鼠其如有礙之時欲償於豚又是無端之事且爲含忍未及通和必知橫被織羅巧成貝錦傳之于遠誰曰不然噫滔滔者天下皆

同君子所恥泛泛如水中自樂壯夫不爲但問事之若何則知曲之在彼今則特垂教督益驗獎憐自緣有理可申豈便無辭以對固非飾過不敢憑虛莊生不云乎其智適足以知人之過而不知其所以過若非辱殷勤之旨何以息睚眦之詞僕也不能嫉惡如讎唯以用和爲貴但以賢愚共惑本末未彰復書而不覺詞繁比事而終慙理短身修三省勉尋曾子之規心敬一言永荷伯陽之惠幸垂鑒志某頓首

答徐州時溥書

六月十六日某白僕射足下特辱長牒仍移公牒細



詳來旨頗涉多端有同戲以前言無乃驚於衆聽雖倚兵強力壯其如作僞心勞且泗州舊隸仁封新標使額固非郡守專輒蓋是朝廷指揮爲在頃年獨全忠節遂編名於防禦永傳賞於驍雄近者久結鄰讎蓋遵國典獨行直道固守危城嘗膽爭先斷頭非苦此亦古人云寧爲忠鬼不作叛臣之義也况于尙書有定國恩威有栗磾武勇自安疲俗甚洽羣情每將勾踐單醪均沾無黨不獨臧洪薄粥分啜有餘固當散三年之儲充一日之費寡能敵衆安可待勞豈比於築室反耕杜門却掃者哉忽覩來示云泗州獨阻

淮河自牢城壘使四方多阻諸道莫通而又每於朝廷妄爲訛謗今有城中將校潛來計圖請少振兵戎即便期開泰者大凡人事莫若自知足下去年忍携不禁求榮頗切暫奮橫行之氣果成順守之權是以累受國恩遠膺藩寄豈可尊身忽物是已非人偏致嫌於藺生終歸過於季氏其於淮河久阻道路不通皆因貴府出兵不是泗濱爲梗是非可辨遠近所聆去歲夏初早蒙侵伐呼蟻軍於漣水拒虎旅於淮山此緣將援親仁難逃善戰爰謀薄伐用救倒懸君異荀吳莫振受降之譽僕慙呂布有虧解鬪之言泗州



以實奏陳豈爲謗讟僕也雖慙知己嘗敢薦賢亦曾錄詔寄呈必合垂情見悉誰料旣踰望始翻起釁端甲兵繼興疆場頻駭所云泗州城中將校頻來計圖此乃巧飾虛辭遍行長牒盡知譎詭孰肯詭隨朝廷以足下身處雄城刃多餘地委摧綱運冀濟權宜但自戢斂兵車必得通流饋輦今則却云奉朝廷意旨收徐泗封疆廣出師徒難窮事意必若足下訓戎勇銳報主忠勤何不親摠全軍往殲巨憝早立非常之効以酬不次之恩而乃知僕再次西征卽謀北渡便侵泗境來犯淮壩負國家之寵榮搆州縣之患害幸

其賊勢阻此師期未諭雅懷何辜聖獎言但繁於枝葉事莫究於根源來示又云比聞廬州海州皆爲背叛累來投款不遣措詞者強謂恩情形於書札顏雖不厚心且何安彼東海廬江偶聚奸惡異端斯起旣非鄭有人焉同氣相求盡是跖之徒也足下已居重任不徇危謀自守詔條何煩飾說僕累將軍食頻救臨淮爲分逆順之蹤令保始終之志實以泗州曾非杞子之無禮亦類展禽之有詞每當告急告窮唯以行仁行義唯望足下暫息餘怒深量遠圖且先報國之誠無急伐鄰之役兼覩詔書獎諭請與忠武協和



足見睿情俾銷微憾在於臣子合更慎思求將安撫  
氓黎速自追廻士卒苟或上負君命下違物情隔礙  
征途侵凌近境則亦難辭借一用試當千必見傷禽  
易驚困獸猶鬪悔須防後險已居前矧乃泗州以抱  
節爲名貴鎮以翫兵爲務泗州則唯遵王化貴鎮則  
虛構牒詞以較否臧可知曲直是敢遠申忠告冀絕  
後誣正當聖主蒙塵未除禍難何忍諸侯列土更起  
兵戎猛發忠言懶爲諂笑勉思大體勿暴小瑕必因  
此日所箴却得後時見謝幸從誠信無損功名某官  
某頓首

答襄陽郟將軍書

中和二年七月四日具銜高某謹復書于將軍閣下  
某側窺前史嘗慕古賢贈人以至言則老聃垂誠成  
我者良友則管仲知恩但恨季俗寢訛芳規僅喪豈  
期今日得覩餘風將軍唯恐掩瑜欲令磨玷特勞彩  
翰遠辱長牋初尋歸美之獎詞汗驚浹背後覽扶危  
之箴諭淚迸沾頤旣乃粲然可觀焉敢率爾而對輒  
憑毫素仰疏血誠終冀恩私略垂採覽幸甚幸甚某  
自去年春知寇侵秦甸帝幸蜀川欲會兵於大梁遂  
傳檄於外鎮練成軍伍選定行期便被武寧忽興戎



相苑彙編卷一  
役先侵泗境後犯淮壩聲言則狼顧舊封實意則鯨  
吞弊鎮長驅猛陣直犯近疆是以分遣偏裨果殲兇  
醜及當中夏乃出大軍既知其北路阻艱遂決於西  
征利涉尋奉詔旨云卿手下甲兵數少眼前防慮處  
多但保淮南之封疆協和浙右之師旅爲朕全吳越  
之地遣朕無東南之憂言其垂功固亦不朽某以兵  
機固難自滯君命有所不從已事征行必期進發占  
風選日只欲奮飛又奉七月十一日詔旨云諸道師  
徒四面攻討計度收剋朝夕可期卿宜式遏寇戎饋  
輦粟帛何必離任則是勤王或恐餘孽遁逃取要先

事布置以此再承綸旨遂駐舟師唯廣利權宜供戎  
費殊不知進退唯命始終無虧却被近鎮讒誣聖朝  
猜慮食馱馱之良肉何敢望焉絆騏驥之駿蹄無能  
爲也遂使忠誠未展睿獎難期非敢自辜海內之人  
心但養淮邊之兵力詢之於理良有所因將軍以泗  
州舊屬彭門謂某妄爲占護必慮未詳狡計或採浮  
詞且徐州昨自併張更無戢斂威權既盛暴虐轉深  
見某自五月初再謀征討已排勁卒欲援令公兼差  
都押衙韓汶先賫一百萬貫救濟都統軍前盡載舟  
船將臨道路又興兵甲來擾疆陲把斷淮河蒞成寨



柵是以行計猶阻羣情莫安細察徐州所爲是作黃  
巢外應不然則何以每見當軍臨發却將兇黨奔衝  
又乃執稱泗濱阻絕汴路且臨淮則城孤氣寡劣保  
疲羸彭門則地險兵強恐行狂悖以茲斟酌可見端  
倪况無諸道綱船曾過泗州本路今則皆因此寇却  
滯諸綱近則浙東浙西遠則容府廣府並未聆饋運  
何濟急難某見發楚師俾誅餘孽一則遵行詔旨救  
援鄰封二則得靜長淮欲登征路固非貪泗民之租  
稅排徐帥之兵戎蓋分曲直之端將保初終之節泗  
州二年閉壘一境絕烟織婦停梭耕夫釋耒滿城軍

食猶仰給於弊藩闔郡賦輿固難徵於疲俗將軍謂  
某藉其地利搆此鄰讎細閱來言難知深意泗州不  
獨咸通之際得振雄聲曾於天寶之中亦遵直道况  
于濤尚書政條旣舉武略兼精收百姓之歡心得三  
軍之死力將軍便令棄而不問理復如何徐州實有  
大憊固非小患若將助虐豈謂輸忠某今所俟者戮  
當道之豺狼奮乘秋之鷗鷺星言夙邁電擊專征必  
與王令公腹心見知首尾相應齊驅虵陣豁展豹韜  
剋復上京奉迎大駕亦不敢負秣陵之節度爭強弩  
之功名所冀得繼前勞自防後患使藺相如之謙德



不損雄威費無極之讒徒皆歸顯戮捨此之外餘無所云敬佩良箴豈離愚抱伏惟監察某再拜

浙西周寶司空書

昨奉公牒云當道臨淮叛卒過江來投集衆廣場已受降訖三復來示言難不酬且降之爲名其理甚大虞舜之七旬苗格晉侯之三日原歸此皆以干紀亂常起兵動衆緩之則稔成患害急之則橫致殺傷遂假小慈終施大信能敷德化俾革奸兇若有偶聚萑苻敢爲榛梗者共須撲滅勿使晏安今相公幸此鄰災樂其軍禍莫能嫉惡翻欲惠奸恐乖杖鉞之威虛

銜倒戈之捷且如去年陳儒徒伴唐突貴鎮封疆僅有六萬餘人宣州日告危急此時相公何不招諭致令侵凌却見瑣瑣頑兇卽自勤勤誘引莫測高旨實辜衆心傳不云乎召缺外盜書不云乎爲逋逃主稍

詳至理無信虛詞昔漢朝匈奴叛黨來附景帝便欲與之封周亞夫曰彼背其主而見賞何以責人臣之節以小喻大可量事情况臨淮一郡早從淝上行營及淮邊戰敵每有優賞曾無偏頗自是臨財則競起貪心遇賊則皆無鬪志旋爲逗撓猶與矜寬昨又請換都頭已依衆請殊不知犬易興於狂癩豕難制於



喧逐未盡誅擒便謀奔竄幸且未離近境固合同塞  
奸源在此既已不忠於彼亦應非利石祁子所云天  
下之惡一也惡於宋而保於我保之何補其在茲乎  
况凡鄰府事宜一彼一此互相救援同致安寧是以  
前年六月中貴鎮有天平潞府元從兵士背叛奔逃  
數僅百人爲患非小遂蒙移牒請爲追擒當使羌都  
將梁楚部領馬軍所在討襲並各帖管內諸州令差  
精兵同力捕逐尋卽諸鎮及東塘遊奕使相次收獲  
三十八人纔見擒來便令押送續得梁楚狀報到濠  
州界趁及殘孽殺得三十餘人其餘漏網之徒盡以

傷弓而走所生擒之兇黨皆就戮於貴藩能致彼之  
快心實賴此之勞力今則却見臨淮叛卒特向沿江  
招呼便稱受降仍缺補職累牒咨請不送過江蒐隱  
何多養奸斯甚敢言以怨報德實恐在安忘危詩云  
投我以木瓜報之以瓊琚匪報也永以爲好此乃國  
風遺訓昭晰可觀相公通仁略賜詳度無自賈天下  
之戮笑也其他已具廻牒伏惟俯賜照察

浙西護軍焦將軍書

昨有臨淮背叛兵士誅擒不盡奔迸過江便蒙貴鎮  
相公特許歸降遍加補署兼移公牒頗構虛詞既乖



七縱之謀誰謂三驅之禮蓋是幸災樂禍固非撫士安人自古受降之爲義也叛而伐之服而捨之忠信能敷德刑乃就或以賊數則動盈千萬奸謀則難測二三若欲戰爭恐多傷殺或吹笳感動或書箭招呼免致膏鋒俾從肉袒其或蕞爾兇狡率然叛離兔奔網而終必自顛鼠失穴而欲將安往在於接境合與同擒不料豁開叛換之門深作逋逃之藪慰安螻蟻雖欲好生訓練熊羆有何用處纔招稔惡之輩遽銜受降之名蘊豹韜而略不施張對龍節而恐須慙愧魯史云晉楚設誓無相加戎同卹災危備救凶患若

有害楚則晉伐之在晉楚亦如之交贄往來道路無壅謀其不協而討不庭此則古時敵國猶保話言今日善鄰豈傷師律况晉楚則各在遠地揚潤則只隔長江曾無交惡之端豈有相欺之事實驚衆聽甚爽遠圖已無蠶女爭桑永安兩境宜效農夫去草靜剗本根伏惟將軍遠護兵符共成王事必不欲和之如響知而不言唯望稍致良箴終除巨弊永使必誠必信誰云莫往莫來此既無嚙啗以背憎彼亦免忸怩於顏厚幸垂採聽特惠終始伏惟云云



桂苑筆耕集卷之十一

國家圖書館, NATIONAL CENTRAL LIBRARY, TAIWAN, R.O.C.



桂苑筆耕集卷之十二

委曲二十首

滁州許勅

昭義成璘

廬江縣令李清

淮口鎮李質

光州李罕之

楚壽兩州防秋廻  
將戈士

歸順軍孫端

楚州張雄

楚州張義府

滁州許勅

壽州張翺

廬州楊行敏

和州秦彥

廬傳

戴盧

光州王緒

楚州營田判官綦母夔

鄆州耿元審



海陵鎮高霸

淮口李質

滁州許劼

報許劼得狀知妻劉氏將從征討願效勤勞嘉尚之  
懷諭言不及吾常覽後魏書見楊大眼者武伎絕倫  
戰功居最其妻潘氏頗善騎射至於攻戰遊獵之際  
潘亦戎裝齊鑣並驅及至遠營同坐幕下對諸寮佐  
笑言自得大眼時指諸人曰此潘將軍也吾思見若  
人爲日已久不期今夕得舉妙才此亦可謂劉將軍  
矣想鼓鼙方振琴瑟相隨旣在同心可知竭力教戰  
則必欺孫武解圍則可假陳平勉致殊功卽行懋賞

悉之不具云云

昭義成璘

報成璘大夫魯史云臣一主二漢書曰一心可以事  
百君則知下有離心蓋爲上無全德姪孫僕射夙虧  
家訓驟荷國恩累忝藩方曾微績効每於撫俗略不  
隨時恩威豈得並行寬猛無由相濟况近關西之賊  
窟持山北之兵權戰伐旣勞緝綏莫至固知軍情潰  
散物議喧張大夫名旣超倫事能從衆息貔貅之憤  
怒慰黎庶之疲羸實謂有三雋才誰云犯五不韙古  
之所有今也何疑遠遣專人迎取家口儻或行程齟



齒且令彼處婆娑如能斷送出來便與支持發遣一  
踣墜履猶能牽念舊之心百口孤孀何忍見含愁之  
色必應慰暖免至飢寒倚望所多諭言無及彼但勤  
修政理佇荷寵榮不令外盜侵凌必見大君委寄冬  
寒慎爲將息節級各與安存悉之

廬江縣令李清

報李令昔有桓榮祖者少曾學武或曰何不學書答  
云上馬橫槊下馬談經方可謂不負飲食矣若無自  
全之伎何異於犬羊乎昨見所申衆情可獎昔也一  
百里之疲俗託在神君今則十八砦之義兵請爲軍

師若非寬將猛濟惠與威行則何以鯁鮪懷仁各能  
遂性熊羆聚黨盡得降心姑拋堂上之琴便握匣中  
之劍所謂文一變而至於武者也况李令族聯天派  
名比水源才機爲一代之雄心術是萬人之敵足得  
以指麾銳卒掃蕩叛徒不惟除郡邑之災亦可定國  
家之難然而軍務旣常獨理職銜須有可稱未見所  
求固難抑致爲復願兼知戎役却守縣曹爲復欲改  
轍從知乘機立事察斯二者決取一途專期奏論早  
與飛報且如班超投筆蒯恩捨荔當池蛟得水之秋  
有天驥追風之便古詩云寧爲百夫長羞作一書生



信知倜儻之人懶守低徊之節勉成勳業永荷寵光  
戎務方殷善自將息諸寨將士各與慰問悉之

### 淮口鎮李質

報李質覽所申狀慰愜良多李再興未革狼心敢張  
蜂目搆稱虛事違負本軍初憑逐寇之名却設起戎  
之計賴質深懷智策善審兵機一唱義聲四圍逆黨  
狀疾風之掃危葉如烈火之熱飛蓬再興將見誅夷  
果當懾竄然既是傷弓之物必爲釁鼓之資兼知質  
男裕黃口小兒血氣未定偶虧嚴父之訓以涉叛夫  
之謀質又徇公絕私捨曲取直愛而知惡義以滅親

削其舐犢之言遵彼烹臯之理若非忠勇何得如斯  
古語有之蝮蛇在手則壯士斷其節是乃忍小痛而  
除大患也况石碣傳芳於魯史日磬載美於漢書故  
事斯存令名不朽足以見質有大丈夫之氣有真君  
子之心權兵而動必成功鎮境而靜能守節前勞後  
効日就月將固當榮盛可期勿以滯淹爲恨勉安軍  
旅善保勳名以古况今惟吾知汝悉之

### 光州李罕之

報李罕之成覲有言彼丈夫也我丈夫也然則成功  
立節不獨古人仗順輸忠正當今日近奉勅書手詔



無非激勵衆心兼除王令公充都統西門軍容充都  
監此乃藩鎮功虧朝廷計盡遂將大任專付老儒雖  
漫傳聲必難濟事此去年齊驅猛銳將掃頑兇尋奉  
絲綸俾安淮海詔書云爲朕全吳越之地遣朕無東  
南之憂遂乃旋師不敢違命然則審詳物議叅酌軍  
期關中有執斧之徒闔外無枕戈之志誰能竭力實  
可痛心吾若不行衆將焉往今欲直趨汴路便入潼  
關佇復鳳城奉迎鑾駕永使流傳萬代終能肅靜四  
方罕之已處分憂久爲養勇必欲揀精練銳以期伐  
叛摧兇今錄勅書手詔白寄往仰窺聖旨必勵忠誠  
便決征行共圖富貴時不可失吾子勉之故此告知  
速宜飛報悉之

楚壽兩州防秋迴戈將士

報王承問等久勞防戍又役戰征知得遠歸良多慰  
愜詩稱束楚不免怨思傳載及瓜亦嘗憤恚古之難  
事今見忠誠况承問限過三年訓齊一旅值國家之  
多難息鄉井之懷歸言下忘身軍前効命遂得永別  
伍符之列高登八座之榮固知實勤豈慮虛擲且往  
年被練而去今日衣錦而迴孫權努力之言已成顯  
驗王昶寶身之誠更慎操持深秋遠行善自將息節



級將士遍與安存遣此不具

歸順軍孫端

報孫端將軍自從歸投久處閑散想多鬱悒不暫弭  
忘但以端職秩已高官資須稱使司累具奏薦朝廷  
則有指揮且仰安撫師徒佇迎恩命古人貴其晚達  
君子誠其速成王化旣無偏無頗寵章必盡善盡美  
勉期順守勿念躁求秋晚其涼切慎將息節級遍與  
慰問悉之

楚州張雄

報張雄中丞得狀知己點練兵士兼請出軍西去討  
逆賊徒憤氣勃興忠詞懇切覽之嘉歎深寘于懷且  
每值寇戎稍侵疆圉雄必心騰勇略首唱義聲去年  
已建殊功今日又申丹請不辭危於馬革願展用於  
豹韜實謂起予者雄始可與言兵已矣則帝委之以  
郡侯吾待之以國士永揚茂績固在良時然彼州司  
事力猶困未可便謀征役且宜更候指揮兵士各與  
慰安秋深善自將息馳此不具

楚州張義府

報張義府得狀兼送罰錢引咎自責足驗用心古語  
有之人誰無過過而能改善莫大焉饋餼之儀春秋



所重在於屬部豈可外交勿爲飢則附人別欲申於  
知己將滅白圭之玷遂以金作贖刑細覽來詞似懷  
他慮膚受之愬固不行焉但慎始終永圖富貴悉之

### 滁州許劾

報許劾語曰兵食可去無信不立則知守信之道乃  
是立身之本歟苟若壞墮自爲顛覆訪知近日浙西  
周相公頻差上元鎮使馬暨專賚書曲兼將金銀送  
到和州說誘秦彥令歸浙岸許授雪川信使繼來事  
情甚細則未知秦彥終欲如何且浙西素乏勲勞驟  
沾恩寵謂得長久遽爲驕矜殊不知人盡指楹鬼多

瞰室惡旣天稔道唯日亡今更阻絕我通津動搖我  
屬郡已乖衆議可見前途以劾直木千尋精金百鍊  
固無憂於邪曲終不改於貞剛况乃邦媛相隨家肥  
是保永除異慮必享同榮或恐未審浙西所爲先此  
告示悉之

### 壽州張翺

報張翺知己部領兵士將赴令公軍前言念遠征倍  
所加念且杖鉞者皆誘閩外分珪者略滿寰中而乃  
顧家產爲遠圖剗國讎爲閑事唯矜肉食孰肯身先  
今則翺首唱義聲躬提銳卒騁大丈夫之志氣副上



宰相之指蹤况知素蘊機謀久施訓鍊佇伸壯節必  
樹奇功當五馬離鄉遠地之芳聲獨振及六龍歸闕  
前程之變化難量暫且苦辛善爲將理今附衣段銀  
器茶藥等往到宜檢領春寒慎爲行李將士倍與慰  
安馳此不具云云

廬州楊行敏

報楊行敏使至得狀送芝草圖一軸覽之嘉歎喜有  
餘懷且草木之祥異也雖自天成皆因地秀物有所  
應吾何以堪行敏始假郡符已彰瑞牒天其誠爾爾  
宜慎之况鄉號千年村名穀祿足驗一百年之壽與  
二千石之資固保前程之富貴矣將酬美貺更勵忠  
誠非恡獎詞慮驕銳志悉之夏熱切好將息使廻附  
此不具云云

和州秦彥

報秦彥尚書使至得狀兼送羊五百口勤誠斯展其  
數實繁所謂爾羊來思我愛其禮况彥雖榮建隼能  
効懸魚遠傳廉慎之名深舉撫綏之政而乃特申懇  
悃倍所歎嘉既無慮於觸藩勉致功於荷篋使廻附  
此不具

盧傳



報盧傳殿中監裴尙書將到洪州武寧縣人吏百姓及僧道等狀舉論傳前後戰敵賊徒保全縣邑功績一十五件細覽事實慰愜滿懷傳不云乎公侯子孫必復其始傳能資餘慶無怠聿修自值危時便揚壯節一呼義旅四討兇徒兄弟二人義聲俱唱遂得疲毗獲賴廉使見知始提百里之權尋假六條之寄忠誠所至寵命非遙勉慎始終穩圖富貴所希薦舉必不弭忘悉之

### 戴盧

報戴盧殿中監裴尙書經過彼縣日得百姓僧道等

狀舉論盧自乾符五年主鎮兼知縣事課績一十三件事皆撫實情切舉能詞理燦然良增慰愜盧竭誠報國傾產忘家糺集義軍訓齊宗族撫寧羸瘵捕襲寇戎六年于茲一邑獲賴有功不伐唯善是從遂領縣曹永安鄉黨古者田稱續命邑號義興求之於盧未足多也既增嘉歎不忘薦論勉保忠誠終邀美命悉之

### 光州王緒

報王緒天不容奸人唯助順苟違至理必亂常刑知緒昨因顏璋久藏禍心果致衆怒璋既誅戮緒乃奔



逃何不束手戎場投身義域而敢更謀嘯聚尙恣喧  
張自招相鼠之譏莫識牽羊之禮未知爾意終欲奚  
爲此乃先惠後誅武經所重好生惡殺王化斯行豁  
開誘善之門俾躡歸仁之路遂加誨諭試問端倪速  
仰割捐本情指陳他望待詳來狀卽與指麾禮云志  
不可滿傳曰惡不可長緒之今日其意若何勿驅齊  
眈枉入罪網秋冷切好將息節級各與慰問悉之

楚州營田判官綦母績

報綦母評事夫欲均調兵食固須妙選公才供億旣  
多料量非易評事自匡郡政甚洽物情剴割而案無

滯詞淬磨而筆有餘刃今委兼判順國軍糧料舉牒  
同封寄往孔聖猶爲委吏蕭何亦作功曹唯託幹能  
無辭猥屑欲令小人懷惠佇看君子勞心悉之

鄆州耿元審

報耿元審古來名將多是耿家綦賈秉旻徽音相繼  
永言苗裔固瞻機謀元審雖名異雙聲而志能獨立  
佇申忠勇別竢恩榮况逢危難之秋實建勳業名望  
勞三字疑衍之日勉存終始慎守行藏其他並令樊谷面  
述今寄衣一副烏觜茶二斤到宜一一領之秋涼切  
好將息悉之



海陵鎮高霸

報高霸得進奏院狀報知轉授右散騎常侍永言欣  
愜霈然滿懷昔周盤龍破虜有功繼霈爵賞齊世祖  
戲之曰卿着貂蟬何如兜鍪對曰此貂蟬乃自兜鍪  
中出耳當時以爲名對前史標之美談今此官榮實  
彰君寵唯在專勤戍遏固守邊陲更俟大來永揚忠  
節知之

淮口李質

報李質得進奏院狀報知質轉授右衛大將軍且自  
數年君恩溥合官榮職賞可謂均沾然而成功可爲

受爵無愧者屈指而數能復幾人唯質久戍淮壩遠  
防寇擊勤勞最至品秩尚卑今授大將軍之名乃滿  
烈丈夫之望更宜慎守無慮湮沉慰愜歎嘉不離懷  
抱遣此不具云云



桂苑筆耕集卷之十二

國家圖書館, NATIONAL CENTRAL LIBRARY, TAIWAN, R.O.C.





桂苑筆耕集卷之十三

舉牒廿五

首內行墨首

行墨勅授散騎常侍

授盱眙鎮將鄒

唐御丞

授楚州刺史張雄將軍

授高霸權知江州

州軍事

許勅妻劉氏封彭

請節度判官

李瑄大使

請副使李大

請高彥休少府

充鹽官

請泗州于濤

尚書充

使

王燦端公攝右司馬

右司馬

王燦端公攝

官

前邵

州錄事參軍顧

令

海陵縣令鄭杞

前宣州

當塗縣令王

令

柳孝讓攝滁州清

流令

前婺州

金華縣尉李

尉

前浙西館驛巡官鄉貢三傳張咸攝山陽縣丞



前潁上縣主簿鄭綬攝盛唐縣丞 諸葛殷知權酒務

李昭望充奉國巡官 柴巖充洪澤雨塘巡田官楚州營

許權攝觀察衙推充官洪澤巡 王棨端公知丹陽監事

臧澣知鹽城監事 趙詞攝和州刺史

行墨勅授散騎常侍

勅淮南節度鹽鐵轉運等使東面都統兼指揮京西京北神策諸道節度兵馬制置等使牒某官乞右可檢校右散騎常侍餘如故如將軍須言員外置同正員牒准今年二月九日詔應諸州有功刺史及大將軍等如要勸獎者從監察御史至常侍便可墨勅授

訖分析聞奏者大君降命元帥從權但云能立勤勞特許先申獎勸漢祖則手無列印不阻論功武侯則心若懸衡必能舉職用示軍中之賞式資闕下之恩前件官夙蘊壯圖久從戎事將救焚沉之患固憑擒縱之能桓榮祖之馳名不唯馬稍周盤龍之受爵允稱貂冠事須准詔授檢校右散騎常侍仍具申奏並牒知者故牒云云

授盱眙鎮將鄒唐御史中丞

廣明二年六月十二日使兼都統檢校太尉平章事燕國公授盱眙鎮將鄒唐御史中丞



牒准詔云云將軍分閩大夫出疆可專未請之權况奉已成之命高懸懋賞用報奇功前件官術繼白猿名齊赤兔夙歸信義備察忠良雖遷柱下之官尚慊軍中之望宜昇專席更勵枕戈爾其心保清廉好對暎淮之月力誇驍銳無慙破浪之風事須准詔行墨勅授御史中丞

授楚州刺史張雄將軍

牒准詔云云見功必賞漢高祖之殊恩承制無疑鄧司空之故事前件官材標落落韻稟錚錚自假使符已揚政績理股肱之名郡登耳目之高官信義相從

功名愈振佇擅外臺之寄宜昇大樹之資爾其益勵忠規仰銜成命用副劉弘之善舉無嗟李廣之難封事須准詔行墨勅轉授右武衛將軍員外置同政

授高霸權知江州軍州事

牒准詔應諸州刺史如有軍功卿量加爵賞如有罪犯卿宜書罰別差人知州具狀申奏者大元帥之權既資成命古諸侯之任宜選良才前件官蛟躍池中虎蹲岸上用軍以義守節唯忠不辭白刃之危累挫黃巾之衆或短兵鬪勇或圓陣呈奇動有所成往無不利今以九江闕牧一郡思春將活疲氓固憑幹吏



爾其過強撫弱削弊蠲苛無登庾亮之樓空知翫月  
好把袁宏之扇且學移風稍展政聲佇沾恩命事須  
准詔行墨勅差知江州軍州事仍具事由申奏並牒  
知者

許勅妻劉氏封彭城郡君

牒奉處分古者官至大夫室稱命婦遂有從夫之貴  
乃爲處世之榮而况靜則能慎內言動則克從外役  
躬擐甲冑志凌雪霜功名旣異於常流封拜豈拘於  
成命以滁州刺史許勅妻劉氏英才天授貞節日彰  
平欺後魏將軍洛陽失行仰慕聖朝公主司竹興兵

一昨專命良夫討除叛卒遽陳丹赤固願同征手驅  
組練之羣遠攻城壘身脫綺羅之色久犯氛埃四德  
有餘六韜可試豈獨家之肥也實謂邦之媛兮夫旣  
冠其銀鐙婦宜榮於石窈豈可使松標峻影早致凌  
雲蘿抱柔姿猶嗟委地先行茂賞用報前功軍中之  
命爵策勳與人從欲天上之錦賤鈿軸待鳳銜來事  
須准詔行墨勅封彭城郡君仍表次錄奏並牒知者  
請節度判官李瑄大夫充副使

牒大夫天芝稟秀霜桂含貞蔚爾芳猷每見用和爲  
貴凜然直氣終能嫉惡如讎信知賢良實救凋弊頃



者再握一同之政曾標三異之名既發縣花佇分郡  
竹而乃鷓鴣自滯羔鴈相從鉅野卑栖劔川遠役察  
俗而唯資婉畫犒師而不乏豐儲果得入奏玉墀出  
懸金印泊某暫臨江陸旋鎮海門永言移節之難咸  
假運籌之妙一來淮甸四換星霜判官德以潤身固  
爲已任恩能濟物不欲人知莅事實繁在公匪懈筆  
直而吏多畏色鞭輕而獄絕冤聲見君子之盡心實  
古人之用意十二年之弘益久而彌芳千萬里之追  
從永以爲好雖將徐榻別設猶恐燕臺未高今已假  
小秩宗兼大司憲不遷職位何稱官榮幸屈跡於副

車冀揚威於戎幕陳寵宣詔條無失嘗賴功曹呂虔  
致郡俗永安亦憑別駕若言今日彼在下風事須請  
攝節度副使表次錄奏

請副使李大夫知畱後

牒大夫劔橫天外珠媚水中雄稜則仰決浮雲溫潤  
則芴無枯草深藏利器久佐遠藩每施婉婉之謀共  
化蚩蚩之俗五鎮相倚一紀于茲嘗於折獄按刑唯  
遵直道縱至旬休節暇不離公門敢言知己之難實  
荷成人之美今已三年翫寇尙恣俯張十道徵師遞  
相逼撓若不專征鈇鉞何因倒載干戈遂驅養勇之



相列全卷一三  
鋒佇破稔奸之窟代行拙政畱託長才慰八郡之疲  
羸察四鄰之動勦冀使袁宏黎庶粗識詠歌無令陶  
侃賓僚只耽閑戲數年臥理今日出行皆資裨助之  
功聿保始終之惠事須請知觀察畱後

請高彥休少府充鹽鐵巡官

牒少府學麟成角詞鳳傳毛偶輕桂客之遊暫樂梅  
仙之侶鶴唳而月籠寒野萬里清音鵬飛而雲簸長  
天九霄高躅幸聯宗黨得接徽猷敢興念於維駒無  
見辭於絆驥稍假縱橫之術終匡幹運之權雖慙燕  
國之金臺願接謝家之玉樹同姓必親於異姓今人

何讓於古人事須請攝鹽鐵巡官表次錄奏

請泗州于濤尚書充都指揮使

牒尚書洞究儒經劻探武緯指清道於萬里牧遠羣  
於三年旗看隼飛輶待鹿挾慰疲毗以仁政捍寇盜  
以智謀克歸合浦之珍曾散曲堤之衆今者徐戎遺  
燼敢恣侵凌楚卒精鋒佇期掃蕩終免致包胥之哭  
况非奪晉鄙之軍但以鷹犬呈功能熊羆就列須俟指  
揮之命仍申搏噬之能實託威權遠希統攝俾瞻馬  
首皆知進退之宜永滅梟聲用審心臧之律事須充  
都指揮使其應援諸都及寧淮盱眙淮陰等三鎮將



士悉受指揮

王綬端公攝右司馬

牒端公烏衣茂族鶴竇清流早列官榮頗精吏術口中金石常聆直韻之高手下銅鹽曾展長才之妙事既同於外舉理無愧於芻求今則秩挂方書職參典午雖云承乏且欲試能憲府威稜他日見豺狼懾伏郡庭閑散此時樂魚鳥畱連事須差攝右司馬

右司馬王綬端公攝鹽鐵出使巡官

牒奉處分且權筦之設也本資戎事將贍軍須既當薄伐之期實藉均輸之利能成重務固選良才端公

韻振維山慶流淮水靜處五常之域勤尋六義之門每覽緣情備知守節繼委當仁之任皆傳幹吏之名已爲歷試諸難可謂多能鄙事今以仰裨國用芻濟兵儲權課方殷句稽匪易官居典午旣已優閒志在推公無辭冗屑佇縻幕職立展籌謀雖見王晞長寄心於方外何妨裴楷暫勞力於俗中事須請攝鹽鐵出使巡官句勘當司錢物

前邵州錄事參軍顧玄夫攝桐城縣令

牒前件官善水無壅謙山自高腹飽詩書口含鋒刃厚利唯勤於耕道閒情素懶於釣名爲疎奔競之門



尚處卑栖之地既能潔已何惜愛人州主簿之提綱  
昔嘗留意邑大夫之製錦今可呈功永言不憚勤勞  
方謂克承闕乏稍念時危而慎守勿云俗弊而難除  
一門多詠雪之才衆推儒慶百里渴象雷之理勉振  
政聲事須差攝舒州桐城縣令

海陵縣令鄭杞

牒奉處分字人之政爲吏所難欲俟三年有成同須  
一日必葺永言委任實藉賢能前件官深於詩敏於  
行不近劉輿脂膩唯資謝朓膏腴累假一同備彰三  
善睠彼東吳之近境實爲南兗之奧區昔也承乏多  
勤去思猶在今可以舉舊令尹之政修真君子之誠  
均調政刑遍慰黎庶展驥終希於得路割鷄無憚於  
發硎行乎敬哉勿墮乃力事須請攝海陵縣令

前宣州當塗縣令王翽攝揚子縣令

牒奉處分宰字之術若驅羣鷄緩之則散急之則亂  
此言雖小其理甚中知者非難行之不易况乃隋城  
近邑楚岸通津螟蝗則久待消除蠲鉅則每思養育  
前件官相門積慶儒室推賢早登廉孝之科嘗歷句  
稽之任雖棲下位不墜令名果逢連帥之知再假字  
人之秩雉誰忍捕鵲自停喧陶潛之腰腹缺孔奮



之膏腴下潤今以楊子一同繁劇四達要衝每當使  
命交馳實託宰僚勤幹遂重責成之寄况逢多事之  
秋而乃有令患風請告踰月若言考秩亦合替移固  
選長才俾修闕政其在上瞻夏日下視春冰宜無憚  
於徒勞佇有成於歷試苟有經年沉醉必虧莅事之  
能如將終夕清談亦失相時之理勉於二說慎自三  
思事須差攝楊子縣令

柳孝讓攝滁州清流縣令

牒奉處分今世之獎邑大夫也多以河陽花彭澤柳  
爲美士永言至理我則不然唯某在其視人如傷潔

已以仕能懷冰蘖之操迴掩花柳之名實難其才得  
副吾意前件官展禽苗裔言偃政能曾宰濟陰克安  
屬邑久依江徼靜守窮居數年而雖甚食貧直道而  
未嘗改節今將歷試俾假缺員無興喧鵲之譏勉致  
驅鷄之術事須差攝滁州清流縣令

前婺州金華縣尉李涵攝天長縣尉

牒奉處分夫縣尉之設也其官雖卑其務甚重動則  
推詳滯獄靜則慰撫疲甿是以佐僚能無其直聲宰  
尹亦懷其畏色永言至理實繫長才前件官性習五  
常身資一命嘗佐金華劇邑頗傳玉潔高名久見退



修誠思進取俾助養蠅之政且昇化鮪之資其在蘖  
作朝飡冰爲夕飲高懸曹棒靜和宓琴譽能息於鵲  
喧勢必登於鴻漸云云

前浙西館驛巡官鄉貢三傳張咸攝山陽縣丞  
牒奉處分前件官族資鵲印業練麟經未躬壯圖嘗  
從碎職既精簡牘之事寧辭州縣之勞習傳之體有  
三能詳正義在公之心無二宜慎爾官往矣敬哉賞  
罰斯在事須差攝山陽縣丞

前潁上縣主簿鄭綬攝盛唐縣丞

牒奉處分凡城一邑皆列六曹雖云具體而微豈可  
從心所欲况縣丞之佐理也貪長憚其糺摘猾吏稟  
其規程苟能自強何患不立前件官康成求己季智  
奉公會申潁上之勤勞遂見渭陽之論舉桓譚貳政  
且宜肅彼奸豪殷浩吟詩無用傷其貧賤事須差攝  
壽州盛唐縣丞

諸葛殷知權酒務

牒奉處分權酤之權起於漢代會計之利著在周經  
既當預備闕懸難可不從改作將成重務固選良才  
前件官隱豹含章臥龍襲慶潔已則隋珠無類在公  
則庖刃有餘昨分孔僅之重司已成歷試今躡魯匡



之良策何憚專勤無辭鄭驛之卑棲早致卓壚之餘  
利能資美祿必瞻雄師所期百姓無譁非阻三軍告  
醉事須差攝館驛巡官專知權酒務

李昭望充奉國巡官

牒奉處分昔孔子誠伯魚學曰其先祖不足稱其族  
姓不足道然而大以流聲後裔者豈非學之所致乎  
若然則先祖之與族姓也不唯時世所榮亦乃聖人  
所重前件官搢紳上品結綬中朝方襲芸香遽飄蓬  
跡遠逃虎口猶絆驥蹄今以一言爲賢三代可數但  
字缺二渭陽之族坐振重名漂流淮徼之居來求碎職

遂茲響應用試才能既知各有司存唯在聿修厥德  
事須補充楚州營田奉國巡官

柴巖充洪澤雨塘巡官楚州營田

牒奉處分三農就稔一漑推功苟非缺降雨之渠何  
以致如雲之稼俾無隳惰固藉專勤前件官壯志不  
渝公才可任承乏而善參軍事慎終而益見吏能今  
以洪澤近封雨塘美號徵小喻大昇高自卑爾其靜  
勗冰心潛窺水脉勉稟龔黃之令遠繼田曹無慙鄭  
白之名有虧地利高懸賞罰用試否臧事須差充楚  
州營田院洪澤雨塘專知官



許權攝觀察衙推充洪澤巡官

牒奉處分撫俗所先勸農爲最是以鄭渾則奪其獵具溫嶠則請置田曹仰順天時俯徵日力俾督畊夫之業須憑幹吏之才前件官歷試已多忠勤可獎令尹之功成製錦督郵之政克提綱但承闕乏之時皆有緝綏之譽今以山陽沃壤淮畔奧區地占三巡田逾萬頃非乏決渠爲雨尙虧多稼如雲蓋爲編毗不勤功於蔗藜縱當稔歲皆失利於稻粱知爾奉公勸民務本若使耨而不輟必期敏則有功委以農時假之使職永言從政實可與權無取潤於膏腴苟徇私

於毫髮勉施乃力廣諭衆心事須差攝觀察衙推充洪澤巡官兼都巡勘指揮奉國謝陽等巡務者

王榮端公知丹陽監事

牒前件官蹈冰守節飲水安貧靜吟而篋有新詩寂坐而門無雜客卓爾君子宛然古人今以將濟軍須誠資吏術少輟琢磨之業俾專鼓鑄之權想夷甫之不言無虧祖德思仲宣之未遇勉俟官榮事須差知丹陽監事

臧澣知鹽城監事

牒奉處分若官無直道則利有多門凡歷任於牢盆



或成資於潤屋而乃就此繁劇守其潔廉心誅則不  
惹脂膏智刃則能分髓髀嘗聆斯語罕覩其人前件  
官雅淡裝懷清勤縮務常握由拳之權課唯遵止足  
之規模休替未遙功勞可驗更資歷試必濟重難展  
才於近監之鄉守節於作醜之地不須對雪空中吟  
謝朗之詩只在熬波言下見張融之賦事須補充權  
糶使巡官知鹽城監事

趙詞攝和州刺史

牒奉處分昔張緒子充少好遊獵右臂鷹左牽犬緒  
見而謂曰一身兩役無乃勞乎充跪答曰丈夫三十

而立今二十九矣請至來歲緒曰過而能改顏氏子  
焉其後折節修身終爲賢達則古之豪俊今可規模  
前件官脫跡迷途投身義路永除惑志可獎悛容旣  
能資父事君是得居官理務俾叅上佐用試忠誠况  
當缺榮之時好縱安居之樂詞其勉輸後効善補前  
愆已銷九族之憂無起一朝之忿事須差攝和州刺  
史



桂苑筆耕集卷之十三



國家圖書館, NATIONAL CENTRAL LIBRARY, TAIWAN, R.O.C.



桂苑筆耕集卷之十四

舉牒二十五首

淮口鎮將李

質充沿淮應接

使

淮陰鎮

將陳季連充沿淮應接副

使

宋再雄差充

水軍都知兵馬

使

蘇聿補衙前虞候

曹威轉補散兵馬使

許勅授廬州刺史

孫端權知舒州軍州事

朱鄘補討擊使

郝定補衙前兵馬使

客將哥舒璿兼充

樂營使

王處順充鹽城鎮使

張晏充廬州軍前

催陣使

歸順軍補衙前兵馬使

安再榮管臨淮都

呂用之兼管

山陽都知兵馬

使

獬豸都將

宿松

縣令李敏之充招討都知兵馬

使

張雄充白沙鎮將



安再榮充行營都指使 徐莓充權酒務專知

柳孝謙知白沙場權務 行營都虞候

曹鵬知行在進奏補衙 朱祝大夫起復

上都昊天觀聲讚大德賜紫謝遵符充淮南管內威儀指揮諸宮觀制置

淮口鎮將李質充沿淮應接使

牒奉處分用兵之難擇利而動不論遠者近者須賴  
掎之角之在安思危有備無患前件官名超廣利勇  
繼雄飛自提外戍之軍每審中權之要彼徐寇以屢  
侵吾圉莫戢其鋒急之則鼠竄彭墟緩之則豕豕楚  
岸遂徵眾旅俾剗羣兇豈從援溺之權將助焚枯之

勢爾其指呼順命擒縱成功終令入海之波偏能流  
惡乃使暎淮之月早見洗兵茂賞高懸良時倏往勉  
思委寄勿負利終事須差充沿淮都應接使便仰量  
出兵士討除賊徒

淮陰鎮將陳季連充沿淮應接副使

牒前件官勇於戰賊樂在從軍操戈而只待椿喉發  
箭而曾無曠目自居遠戍久練雄兵每聆捍蔽之勞  
能息奔衝之患今則未殲彭孽猶役楚軍將資首尾  
之權是成虵陣固藉爪牙之利共展豹韜爾其跡脫  
伍符身居貳職專防險道佇靜長淮雖云迴遶之川



未是縈紆之地坐思前哲猶傳跨下之蹤立取奇功  
好豁胷中之氣勉期竭節實謂逢時事須差充沿淮  
都應接副使便仰量出兵士討除賊徒

宋再雄差充水軍都知兵馬使

牒奉處分舟楫施利干戈騁威自古爲難在今所急  
固托縱橫之略始成捍蔽之功前件官學劍有成彎  
弧自許啗彘而當年逞俊曳牛而是處爭雄高列軍  
門深遵義路久居江戍妙練舟師今以泗上流災淮  
中聚寇旣犯觀風之境頗昏暎月之流爾其摠握雄  
兵遠張秘策陸殲虵豕水截蛟螭早令賊壘皆平永  
使驚波不起用官物而討官賊吾不爲難探虎穴而  
拔虎雛爾當自勗事須差充水軍都知兵馬使部領  
諸兵馬討除淮內賊徒

蘇聿補衙前虞候

牒奉處分古之有言以小諭大則祈奚之請老也旣  
當問嗣能自舉親情不涉於阿私事何妨於委用前  
件官早從吏役久習武才父也暮年旣思休退子之  
壯氣可代勤勞且令職在於早趨乃欲功歸於歷試  
無爽聿修之訓勉成負荷之規事須補充衙前虞候

曹威轉補散兵馬使



牒前件官勇而好禮勤以從戎比者逞陳衆之言詞  
傳郭維之訊問果驅險浪皆赴順風尋值沛戎來侵  
楚壤首登鶴列深挫豺牙摩壘而每能率先殷輪而  
不欲言病忠誠勵已壯節驚人今則郡守論功材官  
受賞俾昇峻級用報前功事須轉補散兵馬使

許勅授廬州刺史

牒奉處分良二千石古難其人屬郡之中吾有所試  
勤修靜理今得人焉前件官自舉六條已踰四載邑  
無吠犬境絕飛蝗外令丘井乂安內致闔門肅睦政  
聲則有口者歌詠仁譽則無翼而奮飛遠達宸聰果

霑殊寵美秩已題於龍劔雄威愈振於隼旗旣銷滁  
水之災來作廬江之福分憂救瘼能諧聖主之心紅  
旆碧幢豈落他人之手事須准勅授廬州刺史

孫端權知舒州軍州事

牒奉處分昔李弼有言大丈夫生世須履鋒刃以取  
功名安可碌碌依階求仕是乃蓄志能壯謀身克成  
夕脫羔裘朝驅熊軾不慙往哲其在茲乎前件官族  
繼興公術傳武子能揚俊氣久練雄師常安乞乞之  
徒果就循循之誘今則委之郡政試以公才旣逢豹  
變之秋善守龍舒之境爲邦致理必見三年有成向



國輸忠勉令百姓無患卽迎帝賞更峻官榮事須差  
權知舒州軍州事

朱鄴補討擊使

納助軍錢遂加職賞

牒奉處分漢有卜式者輸家財助軍費遂乃出自牧  
羊豎子終爲司憲大夫忠誠所施其利甚博前件官  
石非硤硤鐵實錚錚知義重而財輕願忘家而報國  
天龍地馬不藏私室之中尺籍五符可列軍門之下  
俾昇峻級以諷頑毗既有賴於金多無自驚於銅臭  
事須補充討擊使

郝定補衙前兵馬使

能手射七十步

牒奉處分弧矢之利武藝所先號猿而永播嘉聲落  
鴈而能傳妙技况乃只憑五指能伐六勻豈唯邁古  
超今可謂神功聖術前件官早攻手射善應心機必  
彎三百斤弓能發七十步箭紀昌若見必想張弦呂  
布相逢固慙撚筈旣抱非常之伎佇成可久之功換  
滑臺之舊資陟隋苑之高級事須補充衙前兵馬使  
客將哥舒璿兼充樂營使

牒前件官動彰毅勇靜保謙冲早成學劍之功不墜  
爲裘之業頗經歷試無怠聿修久委賓司旣見與言  
之可使俾兼樂職必期飾喜之克諧爾其有禮爲先



無荒是誠迎送於燕臺鄭驛指蹤於迴雪過雲勿使  
英賢或發養痾之誚須令艷麗先緘笑蹙之聲事須  
兼充樂營使

王處順充鹽城鎮使

牒奉處分夫藩鎮之爲制也中屯銳師外列諸戍用  
備腹心之患固憑爪牙之勤前件官深蘊壯圖挺生  
勇氣姜維若在未占雄兒焦度相逢應饒健物每展  
報恩之節累申伐叛之功眷彼鹽城居于海幸苟或  
一同失理實爲四遠多虞遂徵處順之名俾守防奸  
之任爾其效勇夫之重閉致危俗之安居暫固封疆

無念及瓜之限但逢寇孽勉揚破竹之聲事須補充  
鹽城鎮使

張晏充廬州軍前催陣使

牒奉處分師克在和兵貴在速若許緩其善陣誠爲  
挫彼奇鋒用之則行時不可失前件官志能傳略名  
可止啼待逢盤錯之難願展縱橫之術今則舒猶叛  
楚衛已伐邢雨雖潤於興師雲未銷於結陣遂使魚  
麗猛勢阻掃氛埃蟻聚頑徒敢安窟穴爾其驅之以  
馬箠訓之以豹篇事唯託於一麾功必成於百勝將  
迎軍賞佇送捷書事須差充廬州軍前催陣使



歸順軍補衙前兵馬使

牒奉處分前件官身榮豹飾志習龍韜奮心於擊鼓其鏜騁力於挾輶以走早歸信義無憚勤勞去正寇據屬城兵徵諸郡共諫微孽各誓前驅既遵令於牙璋宜陟名於甲騎聊遷職秩用報軍功爾其勿替忠誠更邀上賞事須補充衙前兵馬使

安再榮管臨淮都

牒奉處分西魏王羆率衆拒寇乃杖白梃大呼而詬曰老羆當道臥穉子那得過敵見威勇果自驚奔則知猛將之名能奪叛徒之魄前件官夙精韜略歷試

機謀嘗犯重圍決成獨戰實可謂神出鬼沒豈唯

缺

左旋右抽今之武力雖衰壯心益勵臨事而猶能強飯卽戎而寧欲素飡蠢彼頑兇騷然侵擾雖徵衆旅未建奇功眷彼臨淮處于要地其在訓之以三令激之以一呼審詳於彼竭我盈成就於先難後獲老驥免嗟於伏櫪無令駑馬爭先秋鷹旣遂於下韉勿使妖狐得便事須差管臨淮都

呂用之兼管山陽都知兵馬使

牒奉處分仲尼云寬則得衆信則任人焉嘗聆斯語今見其人前件官慶襲玉璜業精金版遵直道而利



有攸往奉公家而知無不爲是以晉作新軍權資處  
右齊行勇爵衆許居先乃裨察俗之規動叶安民之  
策遂得晨羊罷飲夜犬停喧永除奸濫之源深得撫  
綏之道今以屬城多難散卒無依窮猿旣切於投林  
飛鳥猶思於擇木羣情所附戎略可嘉俾安其質貿  
然來實倚其多多益辦無辭兩役用展長才事須兼  
充山陽軍都知兵馬使

獬豸都將

牒奉處分凡標軍額須警衆心如指喻之非宜則訓  
齊而何在况乃均霑好爵共荷殊恩跡雖限於柳營

秩盡昇於栢署宜加一等俾異三行前件官壯氣挺  
生忠誠卓立曠弩則前無強敵荷戈則動有成功累  
建戎勳遂霑爵賞今以狼星未滅鯨浪猶翻將申戮  
暴之能用示觸邪之號爾其勉思一角永息二心佇  
銷封豕之災勿失神羊之性事須補充獬豸軍都知  
兵馬使

宿松縣令李敏之充招討都知兵馬使

牒奉處分昔來護者立性卓犖初讀詩至擊鼓其鏜  
踴躍用兵羔裘豹飾孔武有力乃捨書歎曰夫人在  
世固當如是會因滅賊以取功名安能區區專事筆



硯其後果申壯志累逢殊勳則知奇才所爲何代不  
有前件官精詳吏道劻習戎機假百里之威則疲毗  
獲賴作萬夫之長則義旅知歸遂得縣道肅清鄰藩  
倚賴欲破蘄春之狡窟遙分江夏之兵權罷從役於  
驅雞佇承乏於建隼聊加職賞俾振軍聲是乃丈夫  
雄飛君子豹變勉驅甲騎遠應羽書旣設援於他邦  
必保安於吾圉事須補充節度衙前兵馬使兼充西  
南招討都知兵馬使

張雄充白沙鎮將

牒奉處分昇高自卑君子所以勵素志辭大就小古  
人所以傳令名但能守節不虧固在相時而動前件  
官密懷義勇深貯謙和頒條而政有嘉聲馭衆而軍  
無愠色今以新恩未降銳旅何安眷彼古津實爲要  
路是成鎮務乃在江壩旣居使府之要衝宜假公才  
而管轄况兼場貨可贍軍須且卷豹韜共養斬蛟之  
勇佇迎鳳詔別遷建隼之榮事須差權句當白沙鎮  
務兼知場司公事

安再榮充行營都指揮使

牒奉處分昔曹公爲樂府歌云老驥伏櫪志在千里  
烈士暮年壯心不已今猶古也我得人焉前件官百



戰成功一麾出守曾安海俗永振風聲而乃不求更握虎符唯願終申豹略豈覺老之將至每俟用之則行今以大憝未殲外方多難諸藩命將無非竹簡探名遠道徵師或是葵丘仗義苟虧忠勇何蕩妖兇遂付重權佇觀奇策其在身先行伍顧指軍兵勉揚矍鑠之名無致遷延之役時不可失往矣敬哉事須差充行營都指揮使赴壽州西面備禦討逐黃巢徒黨者

徐莓充權酒務專知

牒奉處分前件官發跡戎行研心吏道忠勤所至幹濟可觀今則舉漢代之權宜搜杜康之利潤贍吾軍用藉爾公才既非若處先登無與衆人皆醉事須差句當天長縣權酒務

柳孝謙知白沙場權酒務

牒奉處分前件官直道立身公途勵志學已窺室家之富任曾致州縣之勞今以備食三行搜資六物豈使弊歸於下只令利在其中勉稟條章早申績効俾不欺於釀具無自陷於醉鄉事須差知白沙場權酒務

行營都虞候



牒奉處分前件官勇而好禮敏則有功膂力甚強腹  
心可委今以齊驅勁卒俾剗羣凶爾其糾摛行間防  
虞境外宜拘小節善事上官勿謂忠貞有乖輯睦能  
成勤効不愆甄酬事須補充行營都虞候

曹鵬知行在進奏補充節度押衙

牒奉處分藩侯所任邸吏爲先能傳萬里之音不墜  
九霄之命固憑幹濟方付重難前件官魯劇長材魏  
仁雄族雖處干戈之列早閒刀筆之能遂使遠赴行  
朝專司遞務覩六龍之仙蹕每審巡遊傳九鳳之王  
言曾無阻滯以茲歷試深可獎酬今已秩亞憲卿官

昇典午身得趨於輦路職未稱於轅門俾假牙璋遙  
分甲騎慎達上天之旨以安外地之心爾能竭誠吾  
不愆賞事須改補攝節度押衙依前知行在進奏

朱祝大夫起復

牒奉處分事繁金革禮奪苴麻魯公制之於前晉侯  
行之於後蓋乃從權順變是爲移孝就忠苟不忘家  
將何報國前件官方從戎役每藉公才遽鍾風樹之  
悲永違霜槿之養能勤泣血唯懼奪情然以羣寇未  
殲列藩多事確執三年之愛仰辜萬乘之恩况承勅  
命指揮已許軍前驅使出如綸之睿旨旣俟成功衣



夫錦之格言豈同前哲時異事異念茲在茲揚名顯親竭力從命孝之終也往矣敬哉事須牒舉起復差往五嶺已來領會軍前公事

上觀昊天觀

聲讚大德賜紫謝遵符充淮南管內成儀指揮諸宮觀制置

牒大德真璞混成靈源廣潤淘俗態於心水瑩仙姿於面冰蓬島神仙應待銜杯之樂茅家兄弟敢攀執袂之遊猶思救苦於寰中尚阻追歡於物外屬以陣虵出穴戎馬生郊每勤齋敬之心深假護持之力達聖聰而有謂施醮禮以無虧今則秦嶺烟昏難尋四老楚淮月皎幸伴八公但以桂苑繁華楊都壯麗既

見星壇月殿處處荒摧難期鶴駕霓旌時時降會欲設精嚴之備須資揚統之權白馬將軍方設大朝之元帥青牛道士暫充下界之仙官比年既遂於攀畱他日必同於輕舉事須請充淮南管內威儀兼指揮諸宮觀庄田等務



桂苑筆耕集卷之十四

國家圖書館, NATIONAL CENTRAL LIBRARY, TAIWAN, R.O.C.





桂苑筆耕集卷之十五

齋詞一十五首

應天節齋詞三首

上元黃籙齋詞

中元齋詞

下元齋詞二首

上元齋詞

中元齋詞

下元齋詞

黃籙齋詞

禳火齋詞

天王院齋詞

爲故昭義僕射齋

詞二首

應天節齋詞

道士某乙言伏以聖人降生王者嘉應包天地之大德啓日月之殊祥是以電繞虹流克符龍質握乾披



震允叶龜書伏惟聖神聰睿仁哲明孝皇帝紫府眞宗丹陵寶命孝理而勤修一德化成而胥悅萬方偶以犬吠堯威熊驚漢御猶軫泣辜之念暫勞展義之行今者風振南薰方在長贏之節星瞻北極乃當誕慶之辰莫不山靈供萬歲之歡聲河伯獻千年之瑞色仰資聖壽敢設仙齋廣成子之微言旣傳衆妙華封人之善祝實繫羣誠伏願德乃日新禍當天悔暫興時雨遍洗妖氛高整鸞旗早廻鳳輦然後搜濟汾之詠撰封岱之儀傳芳於玉葉金枝積慶於天長地久使蠻戎率服蠢植咸蘇仰沐華胥之風齊登仁壽

之域普天率土永賀昇平

又

道士某乙言伏以父天母地帝道所以爲尊貫月繞星靈符於是乎在况覩一人有慶固知萬壽無疆伏惟皇帝陛下龍握丕圖鳳資聖紀播休聲於里社標盛禮於高禩今者風調舜琴日緩羲轡曆草舒芳於八葉丹陵降瑞於千齡謹設仙齋仰陳善祝伏願塵銷九野波息四溟早廻西幸之儀便舉東封之禮一千年之休運高建武功三十世之昌期倍延福祚允諧大定永賀中興



又

伏以瀨鄉白鹿旣掛仙蹤函谷紫雲果資王氣積慶  
於天長地久傳葉於聖子神孫耀玉京而我李長春  
演金籙而莊春永茂伏惟皇帝陛下三無稟德萬有  
覃恩叶感星夢日之祥掩四乳八眉之瑞上天降聖  
爰乘解慍之風列士修齊况值晏陰之月伏願峒山  
順軌汾水廻鑿迎萬歲之巖音歸九重之天闕享七  
百年之休運寰宇中興守五千字之格言兵戈大定  
仰祈玄鑒永護皇居

上元黃籙齋詞

年月朔啓請如科儀伏以有德不德無名可名自施  
儻忽之功莫究希微之旨是以紫府乃修心可到玄  
關非用力能開臣志慕真風躬行正道但以漢良前  
筓猶勞戰伐之謀越蠡扁舟未遂優閒之望旣榮人  
爵須報主恩誓殲無賴之徒久練不祥之器動拘俗  
役慮犯玄科今則節已及於上元災未銷於下界謹  
修常醮仰貢微誠所願梟覆頑巢鳳廻仙駕帝座與  
三台永耀王畿與九牧皆安雷驚而蟄戶全開風掃  
而妖氛靜息俾臣靈根日茂至業天成虎符提闔外  
之權終安澤國虹節指壺中之境得認家山臣無任



虔肅禱祠懇悃之至謹辭

中元齋詞

年月朔啓請如科儀伏以道本強名固絕琢磨之理  
身爲大患深驚寵辱之機能審自然而然必知無可  
不可是以雕詞贊美則乖妙音於混成矯志求真則  
爽奇功於積學冀標玉籍在守金科臣才謝半千雖  
慙賢路心凝正一早扣玄關齋誠於八節三元鍊志  
於龍緘鳳蘊但屬鯨翻逆浪蛟噴毒沙數年興蠹螫  
之災萬姓抱瘡痍之苦三尺劔高提在手須救危時  
六銖衣輕掛於身未諧夙願今謹因中元素節大慶

良辰依寶壇而醮設常儀企仙闕而拜申精懇伏願  
真風蕩滌玄澤滂流吾君享萬歲於巖音賢相耀六  
符於渭訣調舜絃之美化永復昌期漏湯網之兇徒  
咸歸顯戮然後戴髮含齒鱗潛羽翔不知日用之功  
各遂天成之樂俾臣代勳善繼真位高遷畱形於烟  
閣雲臺縱賞於芝田蕙圃鑄金追想終榮聖主之恩  
叱石閒遊得效仙人之術儻非過望敢不精修臣某  
無任祈恩謝過虔禱懇悃之至謹辭

下元齋詞

年月日啓請如科儀伏以教資妙用無爲而無不爲



道在勤行不厭是以無厭苟得捧持三寶必能拯護  
萬靈須憑善建之根株始覩混成之閭闕故曰大丈  
夫處其厚而不處其薄居其實而不居其華者也臣  
雖塵役拘身而雲裝挂志大成是望上達爲期每依  
郭璞詩中精調五石願向葛洪傳上得寄一名所以  
仰欽象帝之先豈在他人之後聽爛柯翁之說則倍  
惜光陰覽抱朴子之言則不虧忠信但以卑棲俗累  
深握兵符政刑之得失難調賞罰之重輕易忒暗惟  
僖咎莫補精修况叨眞位之榮恐負玄科之責是以  
三元八節顯醮遙祠唯期致力於九層未曾妨功於

一簣今則天吏扣應鍾之候水官攬玄轡之時月數  
就盈日辰在望仰投靈地敬設寶壇備儀於琳几瓊  
盤注想於金臺銀闕冀感通於良夕能濟援於危時  
伏乞太上三尊十方衆聖曲垂玄鑒俾遂丹誠早廻  
翠輦於長安復振皇風於正始秉陶勻者永諧德化  
仗節鉞者共戢兵戎波濤靜寢於四溟氛霧豁開於  
九野樹下有推功之將草間無求活之徒至於翔翼  
躍鱗跂行喙息偕登仁壽之域不躡昏迷之途使臣  
深結道緣遙申齋願望三清於通路資一概於良田  
此時枕越石之戈暫妨高臥他日把浮丘之袂豈訝



後來臣某無任瀝懇投辭虔禱惶切之至謹辭

又

年月日啓請如科儀臣伏以測管窺天雖乖曠望揮  
戈駐日蓋感精誠苟爲山之力不虧則至海之期何  
遠仰玄門之善閉遵妙道以勤行但以爲子爲臣曰  
忠曰孝旣增榮於國祿願無忝於家勲手握玉符且  
救寰中之難志棲金籙唯思象外之遊每慮政失務  
三法虧畫一雖慎撫綏於南甕尙多僣咎於北豐况  
當剪寇爲期弭兵未暇今則月就盈數日臨下元遙  
倣真儀敬陳齋法儼星壇而稽首想風馭以馳魂伏

乞太上三尊十方衆聖玄慈見蔭良願克諧翠華早  
耀於秦雲皇祚永興於漢日百官多慶八裔同歡寇  
戎則銷燧象之災幽滯則假燭龍之照然後使臣世  
官貞吉道業滋成遺榮待泛於五湖企想潛通於三  
島作人間之都尉蒯訓無心拜天上之侍郎沈羲有  
望唯願在家必達終能直道而行臣無任祈恩懺罪  
虔切惶恐之至謹辭

上元齋詞

年月日啓請如科儀臣仰察玄經乃見道資衆甫俯  
稽聖典則知神應至誠是以早詳病病之言每勵賢



賢之行五音五色實除耳目之娛六甲六丁潛致爪  
牙之役願躡輕飛之路常敲衆妙之門但屬戎馬生  
郊陳蛇奔穴無苟免而臨難不得已而用兵蓋報主  
恩慮虧臣節只誓顯誅寇孽寧知暗積僣殃雖軍律  
克申而真科是懼今以日延和景月滿初元遇吸新  
吐故之辰懺啄腐吞腥之罪儼陳醮禮敬薦齋誠燈  
耀九光燼焚百和寂寥塵外幡幢靜設於星壇髣髴  
雲中環珮似傳乎風馭冀銷妖祲仰告威靈伏乞大  
降玄慈下從丹懇萬乘永資於萬壽百官皆荷於百  
祥戰場則荆棘叢生農壤則麥禾茁茂凡云蠢動盡

獲昭蘇然後俾臣援溺功成奉身以退冲靈道遂鼓  
腹而遊飽瓊蘂之糗糧就瑤臺之蹊徑遇圯上者終  
諧素志自有前蹤入壺中者蓋感專心寧無後望旣  
殊捕影敢憚勞形臣無任悔過祈恩虔切惶恐之至  
謹辭

中元齋詞

啓請如科儀域中之四大難名字之曰道物外之三  
清在想心以爲齋豈圖滋福於一身唯願洽恩於萬  
彙臣生逢聖日志慕真風寧貪久視之門有覬輕飛  
之路但以行先不殆德貴有餘每虔一氣以存思非



止三元而展敬今則雲摧火影風戛金聲當中元積  
慶之辰謹修常醮以下界罹災之事仰告玄慈一昨  
夏景既闌秋成甚邇而乃曠野則飛羊斂翅深泉則  
黑蜃藏鱗嗷嗷之黔庶何依烈烈之蒼穹莫訴雖近  
沾美澤而尙慊農郊伏乞太上三尊十方衆聖下從  
精懇大庇生靈使風雨常調煙塵永息興聖祚於千  
秋萬歲振歡聲於四海九州然後俾臣功名則與國  
同休道業則在家必達水中泛泛謝時態之澆浮雲  
外飄飄逐仙蹤而騫翥旣探珠而有望寧種玉以無  
因臣不任祈恩救災懇禱虔惕之至謹辭

### 下元齋詞

啓請如科儀伏以混成至道本在勤行衆妙玄門唯  
資善閉故曰修之身則其德乃貴修之國則其德有  
餘旣能事少功多可謂暫勞永逸臣雖手提金鉞而  
心寄瑤臺飄飄然自有良期擾擾者誰知積學是以  
三元致敬一氣存思佇天上之雞聲潛懸素望待海  
中之鶴信每瀝丹誠終冀用之則行豈言深不可識  
今者謹賫薄禮仰贖玄慈所願轉茂靈根漸拋俗界  
餌崦嵫之奇草飲沆瀣之仙漿漢代淮王終遂仙遊  
之樂周時柱史何妨吏隱之名苟保天成奚言日損



景仰於其中有象願知於此外無求臣無任投辭懇  
迫虔禱兢越之至謹辭

黃籙齋詞

啓請如科儀臣身拘俗網志仰真筌雖窈窈冥冥至  
道則無形可扣而勤勤懇懇精心則有感必通是以  
每勵焚修敢安晷刻所冀學海而終歸巨海好龍而  
不懼真龍豈貪輕舉之名但效勤行之旨然以早分  
相印久握兵符當扶危靜亂之秋有戮暴誅奸之役  
伏慮政條失所刑律乖宜僣違暗積於玄司殃咎難  
逃於黑籍今則景銷木德節啓火威稽首昊天叩心

靈地跼蹐而謹陳薄奠禱祠而仰獻微誠伏乞太上  
三尊十方衆聖俯矜丹悃深降洪慈使電滅千災雲  
興百福永資玄蔭漸茂靈根掃闔外之烟塵早成勳  
業玩壺中之日月免役夢思臣無任悔過祈恩懇迫  
惶恐之至謹辭

禳火齋詞

年月日啓請如科儀於紫極宮內修建洞淵妙齋三  
日四夜轉經行道爲禳當府火災祈恩投辭上詣虛  
無元始天尊伏以波蕩四溟塵昏九野遂見綿區匝  
宇未能滅禳消氛臣雖志悅道風而身沾睿澤早託



山河之誓久臨淮海之封每慎撫綏不遑寧息粗安一境已涉五年齋誠仰貢於上玄妖氣願銷於下界豈料天心悔禍必俟時期地分罹殃難逃曆數方當暮月始起融風遽興鄭國之災難施燿學將救成都之急誰喫酒杯所炊既多俱焚是慮衆力猶勤於撤屋羣心免駭於燎原今則每念傷人唯知罪己仰投靈宇敬醮寶壇祓禳夔異於四郊寧拘古禮祈禱遠瞻於三島但獻精誠伏乞太上三尊十方衆聖曲流玄澤大挫陽精使回祿知非祝融請罪閭閻撲地皆除火宅之災道路生風永作水鄉之福烝黎樂業師

旅懷安構陰謀者自就消亡歸善化者各資榮泰齊登壽域仰望仙鄉臣無任歸罪乞恩虔禱懇迫惶恐之至謹辭

天王院齋詞

唐中和二年太歲壬寅正月望日具銜某敬請僧某乙設齋于法雲寺天王院謹白言舍利佛大慈大悲觀音菩薩伏以欲界將傾魔軍競起九野塵昏於劫燼四溟波蕩於狂飈諸侯志慕於宋公星無三徙聖主德齊於漢帝日未再中不知天養鴟梟地容螟螣力鬪之羣兇得便義征之衆旅摧威某也手握兵符



心抱將略欲展焚枯之力願成拯溺之功是以景仰  
三歸勤行十善深憑護念敢啓邀迎宇內瘡痍略假  
醫王之術世間疲瘵遍希慈父之恩今則幸遇初元  
精修美供春露洒琉璃之境曉風吹薜蔔之香想其  
舍衛城中長老盡携弟子水精宮裏天王便作主人  
伏願舍利佛大慈大悲觀世音菩薩教旣東流跡能  
西降遠救閻浮之地暫離兜率之天問疾語言不競  
維摩之說稱名功德可逃羅刹之災唯願共泛慈航  
齊揮智劍寢驚濤於苦海掃妖氣於昏衢則乃慧燈  
照天帝之心法鼓破波臣之膽靜銷諸惡暫開方便

之門廣庇衆生無惜慈悲之室謹疏

爲故昭義僕射齋詞

中和二年七月二十三日爲故昭義姪孫僕射及二  
孫子敬設齋于法雲寺聊憑法疏用寫悲詞以昭義  
姪孫幼蘊壯圖長居重任不掃一室有志四方手運  
豹韜旣是吾家之事身持龍節累沾聖代之恩至於  
越海征蠻對河分陝立戰功於遐徼傳理化於近藩  
慎守詔條能諧物議遂移上黨實委外權尋屬戎馬  
生郊陣虵出穴遽令寇孽直犯京華頻興伐叛之師  
稍急訓戎之令上將則雖期徇難欲竭忠誠小人則



多是幸災潛興狡計叛徒忽至橫禍斯侵弘演納肝  
其誰能繼豐舒傷目所不忍言噫道則日彰志惟天  
奪征旌永卷飛旒遠來言念彫零莫勝悲慟但以推  
尋佛理抑割俗情既知前世因緣粗解此時冤痛况  
乃父立忠節子揚孝名古賢所稱今我何恨俾資冥  
福敬設妙齋所願慧炬照迷慈航援溺早推誠於貫  
日終致樂於生天子子孫孫永絕怨讎之本生生世  
世常逢安泰之期謹疏

又


中和二年七月二十七日某官某乙奉太尉處分爲

故昭義僕射於法雲寺設三百僧齋並寫金光明經  
五部法華經一部永充供養蓋聆佛修慧力普濟羣  
迷人發信心終成善願苟得影從至教必能響答虔  
誠伏以昭義僕射夙振雄圖繼分重寄將軍投袂練  
兵而方切專征天子剪衣飛詔而唯憑妙略佇建  
中之勳業忽罹意外之災殃不吊昊天奪我良胤今  
則敬投蓮宇虔設桑門仍缺貝葉之真蹤仰奉法華  
之妙義伏願乘茲功德解彼冤讎災星昔照於預州  
已推定分慧日今懸於覺路永絕良緣謹疏



桂苑筆耕集卷之十五

Blank columns for text in a traditional Chinese book format.



國家圖書館, NATIONAL CENTRAL LIBRARY, TAIWAN, R.O.C.



桂苑筆耕

四

國家圖書館, NATIONAL CENTRAL LIBRARY, TAIWAN, R.O.C



桂苑筆耕集卷之十六

祭文書記疏共一十首

都統巡官侍御史內供奉崔致遠 撰

祭五方文

築羊馬城祭土地文

祭楚州陣亡將士文

寒食祭陣亡將士文

移浙西陳司徒廟書

手札

西州羅城圖記

補安南錄異圖記

求化修大雲寺疏

求化修諸道觀疏

祭五方文

年月日具銜某謹以清酌庶羞量幣之奠敢昭告于五方神之靈傳不云乎五行之官是謂五官封為上





公祀爲貴神社稷五祀是尊是奉木正曰勾芒火正  
曰祝融金正曰蓐收水正曰玄冥土正曰后土是以  
禮云共工氏之霸九州也其子曰后土能平九州故  
祀以爲社然則神主順天靈功莫測諸侯列土祀典  
宜行惟夫人寔統陰祗廣含坤德身爲萬物之母首  
冠五方之君職奉軒皇功標缺社殷湯罷改遷之議  
漢武陳祠祭之誠是知神鑑則無偏無頗物情則以  
享以祀昔平九土既能疏決江河今處五方豈不庇  
安淮海靈其調和於金木水火驅役於風雨雪霜使  
春夏秋冬永息災殃之氣東西南北靜除氛祲之源

牢幣具陳庶羞甚潔致敬不虧於中雷施恩幸滿於  
大藩唯候豐穰冀神報塞尙饗

築羊馬城祭土地文

年月日具銜某以兵戎未息禦備是勤乃命修築羊  
馬城遂遣某官某乙告于土地之神曰夫城郭之設  
邑居所憑陋之則狡者或缺美之則寡能固守况今  
豺聲競發虺毒遍吹易動難安何處能爲樂境暫勞  
永泰此時須建良功遂乃揣高卑議遠近便令百堵  
皆作終可三旬而成徵名於伏櫪觸楹接勢於長雲  
斷岸不假龜行之跡豈須龍見之期衆旣叶心事無



費力神其德惟博載道實流謙勿辭板築之喧勉致  
金湯之固使雲蓋雷杵遠振歡聲烏堞隼墉高標壯  
觀北吞淮月南吸江烟平欺鐵甕之名迥壓金甌之  
記有備無患神其聽之

祭楚州陣亡將士文

爾等尺籍從軍寸心報國羔裘武飾既以力稱馬革  
雄圖早將身許爰有徐擊來侵楚封捲喉之壯氣未  
申失手之冤聲遽起始見荷戈就列翻爲復矢成行  
然而功其可稱死且不朽有狼曠之君子無羊斟之  
小人昔時之重義輕生不求苟活今日之名存身喪

豈貯遺悲魂其有知各歆薄酌

寒食祭陣亡將士文

嗚呼生也有涯古今所歎名之不朽忠義爲先爾等  
曠弩勞身蒙輪逞力奮氣於熊羆之列忘形於鵝鶴  
之前能行勇於干戈固免慙於牀第今也野草綠色  
林鶯好音杳杳逝川空流恨而無極累累荒塚誰驗  
魂之有知我所念兮舊功勞我所傷兮好時節俾陳  
薄酌用慰冥遊共謀抗賊於杜回無效懷歸於温序  
能成壯志是謂陰功

移浙西陳司徒廟書



滔滔逝水幽顯雖殊凜凜雄風古今何讓苟或同心  
立事必能異代論交司徒壯節奇功備載外孫之碣  
靈恩顯驗高傳太伯之鄉譚揚而不假再三徵引而  
難窮萬一今則冀動玄鑑直書素誠旣當可舉而行  
固在不言而信且此誓除國難齊命舟師將泛西江  
卽離北岸練鋪一水指疆界以雖分黛列千山望威  
靈而如在今於弊境已立嚴祀敬迓來儀迺酬前願  
幸移玉趾無戀石頭桂檝蘭檣早決遷居之計鸞絲  
鳳管佇申迎奉之儀况乃近境無虞芳筵不絕但得  
禍淫福善何妨捨舊從新北渚烟花休起別離之恨

東塘風月好追歌舞之歡必能依統帥指揮永可振  
司徒勲業特差專价用啓至誠昔之青骨標奇已謂  
陰陽不測今也赤眉稔惡豈宜征戰無功將申烈烈  
之威實假冥冥之助所冀八公山上遍設雄師五里  
霧中能呈異術則必陰子春之破賊吳大帝之封王  
共立功名若合符契無誤會稽之軍備有慙卽墨之  
神謀早詳禴祭之言永副里仁之義某白

手札

風烟雖邇雲霧難披景仰靈威遙申誠願今已靜搜  
勝地高創壽宮永可安居謹令咨迓便請挈家速至



專當掃席相迎且鐵甕城低金陵地狹能施百福無  
滯一方此欲劔拂妖星旗迎聖日必期大捷永致中  
興幸其來助陰兵共成王事目極東流之雪浪心馳  
北顧之烟峯神兮移來哀江南某白

西州羅城圖記

西州羅城四仞高三尋闊周三十三里乃今淮海太  
尉燕公所築也粵若梁州別壤蜀國雄都內跨犍犛  
外聯蠻貊左臨百濮右挾六戎咽喉之控引寔繁唇  
齒之輔依難保自昔鼈靈流異龜跡標奇藩籬始建  
其一城肩鐻猶虧於四郭莒子則既忘重閉衛人則

唯慮徙居蠢彼狗封恣其狼戾每至草乾棘道浪縮  
瀘河則必推紒橫侵撥羣驅隊編毗懾竄巷哭街號  
戎兵以拔旆爲中權府尹以閉關爲上策稔成氛稜  
積有歲時洎乾符初偶絕羈縻大興叛換白虎之狂  
災漸盛黃龍之舊約難尋兵力莫申帝心有寄以公  
慶傳渭夢業練圮書交趾銘勳則永威八詔鄆城報  
政則不待三年屬蠻寇加囂王師告老遂飛急詔請  
救倒懸由是自東徂西以晝繼夜走單車於外境豈  
煩龔遂獻書受戎輅於中塗莫掩晉侯稱伯公鄆行次咸陽

除授西川節制

遙銜睿略倏達成都于時驃信屯兵逼郊隊



而纜踰一舍黔黎失業焚里閭而何啻萬家彼則舉國而濟師此則闔城而受弊外熾崑岡之焰噴酒無能內枯疏勒之源指梅何益莫非枕倚墻壁誰堪擐執甲兵公至止之日豁啓城扉若開籠檻威振而寧勞利器邪膽皆摧化行而如嗅新香驚魂盡返蠻王以鑿耳飽聆其異略鏤膚畏挂於嚴誅恟然觀電懼雷歛爾烏飛魚散公尋令選銳暫使追逃乘其垂翅之時展我燎毛之勢數俘莫記執馘居多爾後因閱地圖得搜天險是猿狖養高之窟爲豺狼伺隙之蹊乃令一剗雄關一標巨防

修功峽關置平夷鎮  
疊賊要路固守無虞

危堞

則憑巒助峻長溝則導澗資深宛成善閉之機實扼間行之徑丸泥可固斷知無得而踰燿火罷驚坐見不爭而勝仍尋水道別建河營

大渡河側  
置防河營

遠方猾夏

之徒難謀航葦均發戍申之卒免詠流薪疆陲永保於覆孟廛閉唯矜於列鼎卿雲邦彥閒吟搜吐鳳之詞卓鄭鄉豪靜坐貯蹲鴟之利公以寢處戎闔夢想扁舟將申遠慮於無窮豈立空言爲不朽乃曰彼蠻之習也外癡內黠朝四暮三雖莊叔此時功已成於長狄而季孫他日憂必在於顛輿詎可虛號錦城尙無羅郭守民之制非我而誰啓抱而神欽至誠飛章



而帝允丹請時有賓寮進難將校獻疑皆云公孫述躍馬雄臨非無意也諸葛亮臥龍崛起亦有志焉但以曩築子城猶資客土九年方就百代所難蜀缺無

儀築子城輦土於學射山日役往返九載後始成况今將興廓落之基恐致

遷延之誚公曰術缺先定事當速成必能終簡天心

豈謂虛穿地脉於是郡侯奔告邑尹樂從乃使揣高

卑議遠邇慮材用量事期採時候於魯書倣規模於

周令引長江而剋長塹夏禹慙能對高巘而劃高墉

秦皇失色矧乃命五丁而嘯侶運六甲以驅僮天吳

則燥水於寒泉地媪則變沙為美土蜀地穿未盈尺泉源漲起至是

土出沙中城缺如舊實謂百靈幽贊萬姓悅隨鋪聚雲鋒杵騰

雷響不見烈風凌雨又令簋飽觴酣登登而只競歡

呼屹屹而便如湧出百堵皆作三旬而成然後郢匠

勞功素材變質優人展妙頰壤凝華攢空而烽櫓高

排架險而闔閣聳起橫分八尺結雕甍而彩鳳聯飛

檻徹四隅擁繡堞而晴虹直挂罩一川之佳景籠萬

戶之歡聲遠而望焉則巍巍峨峨若雲中之疊嶂錦

霞縠霧隱暎乎其上也而察也則赫赫燁燁想海畔

之仙山金臺銀闕焜耀乎其間始自庀徒終於解役

不假朽緡於官稅無資剖粒於軍租築板所費錢一百五十六貫米



一十九萬石皆由智計不破上供

皆聚羨財儼成壯觀遂使蠻酋褫

魄賓旅歸心不敢言摩壘而旋無因致入郛之役爰

徵繪事仰貢九重旋降綸言過褒一字宣睿旨於翰

林才子綴妍辭於黃絹外孫

築城碑今租庸王相公承旨撰詞

公雖

迎金鳳銜書未議石龜戴版蓋乃謙冲自牧恥其功

伐驟稱及蒼鳥高飛翠華遠狩儼仙遊於玉壘安聖

慮於金墉故得親覽宏規益欽忠節特傳瑤檢徵進

碑詞遂命雕鐫永揚威烈實萬古未聆之事乃四方

無比之榮美矣哉龍以雲興魚因水樂誰不仰公智

周物表事照機先凡施權謀若合符契則昔全蜀未

城也天畱盛績日待英才所謂有非常之人然後有

非常之事有非常之事然後有非常之功是以非常

者固非常人之所覬也致遠雖丘堂覩輿師冕何知

而秦國斂賢由余不棄謹成實錄敢記殊庸所冀四

海梯航閱雄圖而稽顙九州旄鉞望法駕而安心中

和三年龍集癸卯八月二十五日記

### 補安南錄異圖記

交趾四封圖經詳矣然而管多生獠境邇諸蕃略採

俚譚用標方誌安南之為府也巡屬一十二郡

峯驪演愛

陸長郡諒武定 武安蘇茂虞林 羈縻五十八州府城東至南溟四百



餘里有山橫亘千里而遙邃穴深巖為獠窟宅蠻蠻  
 之衆六種星居鄰諸蕃二十一區管生獠二十一輩  
 水之西南則通閩婆大食之國陸之西北則接女國  
 烏蠻之路曾無亭埃莫審塗程跂履者計日指期沉  
 浮者占風定信二十一國雞犬傳聲服食所宜大較  
 相類管內生獠多號山蹄或被髮鏤身或穿胃鑿齒  
 詭音嘲嗜姦態睚眦其中尤異者臥使頭飛飲於鼻  
 受豹皮裹體龜殼蔽形擣木絮而為裘獠子多衣木  
皮熟擣有如  
 續編竹苦而作翅生養則夫妻代患長成則父子爭  
 雄縱時有傳譯可通亦俗無桑蠶之業唯織雜彩狹

布多披短襟交衫或有不縫而衣不粒而食死喪無  
 服嫁媵不媒戰有排刀病無藥餌固恃險阻各稱酋  
 豪遠自漢朝迄于隋季荐興邊患頗役遐征馬將軍  
 標柱歸時寸分地界史摠管倒碑過後略靜海隅洎  
 咸通初驃信挺災元戎喪律鷓鴣嘯於跼鳶之地豕豕  
 於東馬之塗摧兇欲快於搥喉拯溺唯思於援手先  
 帝以今淮海太尉燕公威宣大漠政洽上都時公防  
禦秦城  
 剗平醜虜才歸輦下出鎮安南乃請出鎮龍編立身豹略剗彫題而  
 卵碎活黔首以肌豐復壁壘於一麾拔封疆於萬里  
 有蠹皆削無冤不伸朱道古稔姦於外杜存凌恣虐  
於內皆為安南巨患公乃誅滅



無遺故褚令公遂良竄歿日南子孫彫零公時表洗雪

然後使電母雷公鑿外

域朝天之路山靈水若偃大洋沃日之波

安南經岸口天威神

功所開播在遠邇

遂得絕蠻謀之北窺紆漢軍之南戍乃鳳

傳徵詔鷁泛歸程至於洞獠海蠻莫不醉恩飽義遠投聖闕請建生祠則知善政所行殊方可誘既見馬如羊而不取縱令蟻若象而何虞足以驗四夷之時或不賓九牧之任不得所也有柔遠軍從事吳降嘗集是圖名曰錄異叙云久觀遐蕃目擊殊形手題本事然則信以傳信斯焉取斯缺閱前詞退而嘆曰愚之所以為異者其諸異乎人之所異曰六合之內何

物則棄至如鼠肉萬斤鰕鬚一丈既知南北所產永釋古今之疑則彼獸性羣分鳥聲類聚誠不足異也頃太尉燕公受三顧恩用六奇計使獷悍歸服邊陲晏然今聖上省方蒙王獻歎不敢弄吠堯之口永能除猾夏之心皆由燕公收交州鎮蜀郡威振於犇魑走魅功成於金壘湯池所謂蘊先見之能察未來之事呼吸而陰陽不測指蹤而神鬼交馳實為天工人其代之斯實可為異矣聊補所闕敢貽將來時翠華幸蜀之三載也

求化修大雲寺疏



大雲寺募緣求化重修建瓦木功價等詳夫教列爲  
三佛居其一其如妙旨則暗裨玄化微言則廣諭凡  
流開張勸善之門解摘執迷之網然則欲使衆心歸  
敬須令像設莊嚴有感必通無求不應墾情田而種  
福游法海而淘殃不可思議於是乎在當州城西大  
雲寺雖臨楚甸實壓蜀岡舊創仁祠高標兌位雨洗  
烟窓之外萬朶前山風敲月砌之聲千株古木在一  
郡乃偏爲勝境於四時則最稱芳辰至如春水綠波  
雜花生樹都人士女以遨以遊不勞聽法之緣自得  
消憂之所則與城東禪智寺雙肩對聳兩耳齊張夾

煬帝之遺宮擁淮王之仙宅壯茲樂土倚彼福田前  
年偶值飛蝗未能避境旋憂聚蟻或欲毀堤故護軍  
特進以將隔妖氛忽興猛焰遂使琉璃之界翻成煨  
燼之餘雖菩薩焚身固爲常事而苾芻住足盡失安  
居可惜祇園便同隙地今幸遇太尉將驅衆旅佇滅  
羣兇旣逃過去之災或補未來之福欲安盛府許葺  
精廬欲使爐續朝香鍾迎夜梵樹宿獼猴之友林棲  
鸚鵡之王蓋尋貞觀之中曾傳帝語豈效太清之末  
酷信伽譚所願廣運慈航徐搥法鼓深資功德靜剗  
妖魔百官榮從於鸞旌萬乘遄歸於象闕次願太尉



廓清寰宇高坐廟堂演伽葉之真宗龍堪比德舉儒童之善教麟不失時克興上古之風永致大同之化凡於戴髮含齒鱗潛羽翔皆荷慈悲盡能解脫但以一毛可拔先求信義之心百足不僵須賴扶持之力既難獨辦固託衆緣無吝羨財合資洪福富者不仁之說自古所譏積而能散之規于今可誠謹疏

求化修諸道觀疏

紫極宮重修城下諸宮觀求化瓦木等價伏以苦縣誕靈神州演法真性乃聖朝之祖強名爲至道之宗玉葉金柯耀芳陰於萬代瑤函瓊笈傳妙旨於四方

遂得齋醮有歸科儀無墜神宮靈宇宛寫諸天秘殿精壇嚴修勝地當州東吳麗俗南堯雄藩鮑參軍則賦衍精妍揚執戟則箴誇夭矯而乃至道少勤行者玄門無善閉之味澹口中動成大笑義深目外誰信上昇福庭則草沒塵侵仙室則雨傾風壞况值梟聲競噪虺毒強吹到處星飛但見羽書之急經年霧集唯聆甲騎之勞俗既喧驚教增寂默未有葺修之暇非無捨施之緣今幸遇太尉德繼猶龍道深有象黃石公之妙訣雅稱帝師赤松子之勝遊佇迎仙友是故出則以六奇制敵入則以九轉服勤靜除閩外之



烟塵閒對壺中之日月三元遵敬一氣精修果見眞  
位高遷殊祥荐降彩雲片片飛來楚岫之風玄鶴雙  
雙唳向隋宮之月又乃前年則江寇南逼去歲則淮  
戎北侵蟻皆恃於成羣虵欲矜於結陣伏賴太尉雄  
威坐振衆孽奔亡四鄰戴信於桓公八郡感恩於召  
父覩耕農之蔽野聽歌吹之沸天古人有言爲可爲  
於可爲之時則可其城下宮觀今欲旋集良工增修  
舊址擬金室銀堂之制處處騰光俾星冠月帔之徒  
人人潔跡微功若就良願克伸龍圖早耀於中興虎  
旅永摧其大盜次願太尉運籌佐漢迥掩張良拊棹

遊湖靜追范蠡石畱馬跡臺挂鳳音蓬島花開春醉  
而閑乘白鹿芝田雨過曉耕而長任青牛罷吟小桂  
之句獨邁大春之壽然後仰從翔翼俯至潛鱗凡曰  
含虛悉能蒙福但以所修宮觀荒摧旣久經費甚多  
無因獨辦資後唯仰衆成功德迦譚之難捨能捨猶  
見樂輸道教之自然而然幸無輕諾謹疏



桂苑筆耕集卷之十六

國家圖書館, NATIONAL CENTRAL LIBRARY, TAIWAN, R.O.C.





桂苑筆耕集卷之十七

啓狀一十首

初投獻太尉啓

再獻啓

謝生料狀

獻詩啓

附詩三十首

謝職狀

謝借宅狀

出師後告辭狀

謝令從軍狀

謝借舫子狀

謝許奏薦狀

初投獻太尉啓

某啓伏以嶽之高與海之深物所歸而人所仰迥拔  
千仞平吞百川其如巘嶸擎天波瀾蘸日豁四方之  
眼醒萬族之魂是宇內之所歌謠匪毫端之能贊詠



伏惟司徒相公獨抱神略一匡聖朝譽洽於良哉康  
哉名標於可久可大龔黃德政則郡民有遺愛之碑  
韓白功勳則國史有直書之筆况某劣同窺豹淺比  
傾螺難將篆刻之詞輒頌陶鎔之業但以間生賢哲  
年當五百之期廣集英豪客滿三千之數旣納之似  
水則來者如雲斯乃司徒相公鏡於心而寬兮綽兮  
秤於事而無偏無黨網羅雋彥籠罩驍雄於儒則沈  
謝呈才於武則關張效力遂使弓旌招隱士巖谷爲  
之一空介冑降叛夫烟塵爲之四息豈獨分憂於閩  
外實惟稱慶於寰中莫不信齊於春夏秋冬恩播於

東西南北但日月照臨之所是風雷變化之時然則  
尼父堂中亦有他鄉之子孟嘗門下寧無遠地之人  
片善可稱前賢不讓永能執大邦之政豈欲遺小國  
之賓是以敢寫微衷輕投朗鑑某新羅人也身也賤  
性也愚才不雄學不瞻雖形骸則鄙年齒未衰自十  
二則別鷄林至二十得遷鶯谷方接青襟之侶旋從  
黃綬之官旣忝登龍敢言絆驥今者乍離一尉欲應  
三篇更願進脩且謀退縮獨依林藪再閱丘墳課日  
攻詩虞訥之詆訶無避積年著賦陸機之哂笑何慙  
俟其敦閱致功琢磨成器求魚道在垂竿而不掛曲



鉤射鵠心專撚筭而冀銜後鏃端操勁節佇望良時  
竊見萬物投誠八紘嚮德不謁相公賓閣不遊相公  
德門者詞人之所懷慙羣議之所發誚某固敢隳肝  
瀝膽進牘抽毫不避嚴誅輒申素懇謹錄所業雜篇  
章五軸兼陳情七言長句詩一百篇齋沐上獻冒犯  
尊威不任戰懼之至謹啓

再獻啓

某啓某今月五日謹以所學篇章五通貢于賓次雖  
慙獻豕輒覬攀龍脩客路以心摧望仁風以目斷乍  
覩秦雲之態或似美人細看燕石之姿恐爲棄物伏

蒙司徒相公光逾愛日煦及寒灰念以遠別海隅久  
沉江徼特垂豐餼俾濟朝飢自驚樗櫟之材已荷稻  
粱之惠雖龜魚投水驟喜命蘇而蚤蝨負山深憂力  
敗且某也兔絲雖絡蛛網自營萬計尋思不如學也  
百年勤苦猶恐失之所以未競宦塗但遵儒道筮仕  
而懶趨塵土卜居而貪憶林泉人間之要路通津眼  
無開處物外之青山綠水夢有歸時所願更淬鉛刀  
終求鐵印斂跡而跼藏學藪安身而跌宕詞林嘗誦  
古詩還符此意云志士惜日短愁人知夜長某旣懷  
志士之勤又抱愁人之苦聊憑毫牘敢述肺肝且如



榻苑筆耕卷一  
蹋壁冥搜杜門寂坐席冷而窓風擺雪筆乾而硯水成冰欲爲尼父之絕編無奈羲和之促轡卽可知指萬卷之經史恨三冬之景光及其凍枕傷神孤燈伴影寒漏則滴殘別淚遙碁則搗破羈心空勞甯戚之悲歌莫繼陸機之安寢亦可想貯千端之鬱邑過五夜之寂寥然則志士之勤也旣如彼愁人之苦也又如此况某家遙日域路隔天池投客舍而方甚死讎持何門而欲安生計唯慮道之將廢豈言人不易知不敢以陋質凡姿覲相公清嚴之德不敢以片言隻字希相公採錄之恩所望者或以其萬里地遠來十

餘年苦學稍垂惻憫得濟困窮則必堅背水之心終爲勇士決移山之志不讓愚公伏以某譯殊方之語言學聖代之章句舞態則難爲短袖辯詞則未比長裾舌無三寸之能空緘壯氣腸有九回之懇但戀深恩干浼尊嚴下情無任感戴兢惶涕泗之至謹啓

### 謝生料狀

某啓某昨日伏蒙仁慈再賜生料恩垂望外喜集愁中安貧而已瞻晨炊感德而惟知宿飽遂使范家釜甑免恨長閒顏巷簞瓢倍加其樂伏以某雖楊曾穿葉而蓬且斷根空把利錐冀遇大賢之鑑豈將長缺



先興下客之歌一昨輒貢蕪音累塵尊聽窺德宇而  
燕雖相賀望威風而鷁恐退飛豈料司空相公俯念  
海人久爲塵吏特垂記錄繼賜沾濡生前之溝壑無  
虞飢寒雖濟頭上之丘山漸重負戴難勝依投而旣  
類窮猿展效而願同病雀下情無任云云

獻詩啓

某啓某竊覽同年顧雲校書獻相公長啓一首短歌  
十篇學派則鯨噴海濤詞鋒則劍倚雲漢備爲贊頌  
永可流傳如某者跡自外方藝唯下品雖儒宮慕善  
每嘗窺顏冉之墻而筆陣爭雄未得摩曹劉之壘但

以幸遊樂國獲覩仁風久貯懇誠冀伸歌詠輒獻紀  
德絕句詩三十首謹封如別定王拙舞適足自嫌嫫  
母濃糝轉爲人笑不足贊揚休烈翻憂浼黷尊威然  
聖人以激勸誠深不間互鄉童子學者以揣摩志切  
皆投鬼谷先生伏惟特恕荒蕪俯垂采覽所冀趨仁  
化於江北終得傳美譚於海東唐突藻鑑下情無任  
戰慄之至謹啓

附 七言紀德詩三十首謹獻司徒相公

兵機

惟將志業練春秋早蓄雄心剗國讎二十年來天



下事漢皇高枕倚畱侯

筆法

見說書窓暫臥龍神傳妙訣助奇鋒也知外國人  
爭學惟恨無因乞手蹤

南朝蕭子雲善書百濟使人求手蹤以爲國寶

性箴

波澄性海見深源理究希夷關道門詞翰好傳雙  
美跡何須更寫五千言

雪詠

五色毫編六出花三冬吟徹四方誇始知絕句勝  
聯句從此芳名掩謝家

射鵰

能將一箭落雙鷗萬里胡塵當日銷永使威名振  
沙漠犬戎無復吠唐堯

安化

班筆由來不暗投旋驅熊隼待封侯郡名安化能  
宣化更指河湟地欲收

練兵

隴水聲秋塞草閒霍將軍暫入長安太平天子憐  
才略曾請陳兵盡日看

潘溪



刻石書蹤妙入神一廻窺覽一廻新况能早遂王

師業桃李終成萬代春

伏觀相公播漢詩云及到王師身已老不知辛苦爲

何人又經號縣詩云手栽桃李十餘春今日經過重建勳

### 射虎

鉅牙鉤爪礙王程一箭摧斑四海驚白額前驅羌  
膽碎方知破石是虛聲

### 秦城

遠提龍劍鎮龍庭外戶從茲永罷肩掃盡邊塵更  
無事暮天寒角醉吟聽

### 生祠

古來難化是蠻夷交趾何人得去思萬代聖朝青  
史上獨傳溪洞立生祠

### 射鞭

休說戟枝非易中若言楊葉是難穿須看立節沙  
場上永得安邊爲射鞭

### 安南

西戎始定南蠻起都護能摧驃信威萬里封疆萬  
戶口一麾風雨盡收歸

### 天威徑

鑿斷龍門猶勞身擘分華嶽徒稱神何如劈開海



山道坐令八國爭來賓

峯口徑

濟物能廻造化心驅山偃海立功深安南真得安  
南界從此蠻兵不敢侵

收城碑

功業已標征北賦威名初建鎮南碑終知不朽齊  
銅柱况是儒宗綴色絲

碑今度支裴僕射撰詞

執金吾

一陣風雷定八蠻來趨雲陛悅天顏王孫仕宦多  
榮貴心爲匡君不斲閒

天平

海岱烟塵匝鄆城遙揮一劍落欃槍征旗不動降  
旗盡永使天平地亦平

釣魚亭

錦筵花下飛鸚鵡羅袖風前唱鷓鴣占得仙家詩  
酒興閒吟烟月憶蓬壺

伏觀相公在鄆州詩云酒滿金缸花滿枝雙娥齊唱

鷓鴣詞又釣魚亭詩云水急魚難釣風吹柳易低

相印

早說休徵應佩刀台星光接將星高欲迎霖雨歸  
龍闕看滅妖氛展豹韜



西川

遠持龍旆活龜城威懾蒙王永罷兵應笑爨巴嘖  
杯酒雨師風伯自歸行

平蠻

邛峽關東蠻塵絕平夷鎮扼蠻地裂又築羅城變  
錦城蠻兵永滅功不滅

築城

一心能感衆心齊鐵甕高吞劍閣低多上散花樓  
上望江山供盡好詩題

荆南

虎吼龍驤出峽來福星才照陣雲開遙思屈宋忠  
魂在應向風前奠一杯

漕運

濟川已展爲舟業煮海終成富國功能與吾君緩  
宵旰爲資心計四方通

浙西

九江賊膽望風摧萬戶愁眉向日開楚舞吳歌一  
何樂相逢相賀相公來

降寇

唯將德化欲銷兵長笑長平恣意坑更想太丘行



小惠何如言下濟羣生

淮南

八郡榮超陶太尉三邊靜掩霍嫖姚玉皇終日留

金鼎應待淮王手自調

劔南荆南淮南乃天下名鎮相公累移節制西戎南

發東鄙賊起相公皆自討除

朝上清

齊心不倦自朝真豈爲修仙欲濟人天上香風吹  
楚澤江南江北鎮成春

陳情

俗眼難窺冰雪姿終朝共詠小山詞此身依托同

雞犬他日昇天莫棄遺

謝職狀

右某今月二十五日伏承公牒特賜署充館驛巡官  
者恩降台階光生旅舍承命而吟魂乍懾叨榮而病  
骨能蘇攀依有心荷戴無力伏以某樗生曠野莠託  
荒田豈惟良匠不窺抑亦農人見棄風欹弱植難舉  
勢於凌雲塵纖纖莖但懷愁於委地昨者不慙狷者  
輒效狂生累貢巴詞仰瀆秦鑑伏惟司徒相公念以  
來從異域遠寓樂郊俯愛似龍不嫌非鳳拔衰英於  
糞上搜滯刃於獄中許廁嘉賓仍沾厚俸神仙見顧



稍親郭隗之臺駑蹇何施得主鄭莊之驛况乃念子襟之志業辱華袞之褒詞刻畫恩深已能長價琢磨志切終願成功修身則飲水懷冰鍊思則吟烟嘯露唯當勵節以謂報恩謹詣衙門祇候陳謝下情無任感激彷徨榮懼之至謹狀

謝借宅狀

右某昨日客司奉傳處分借賜官宅安下者仰聆尊旨俯省庸才既榮投跡之有門唯恨殺身之無路伏以某自趨龍旆免泣牛衣職奉非輕書糧頗贍嘗讀魯論語曰學而優則仕仕而優則學是以望東開之

閣永誓依仁坐北面之窓唯期肄業非敢隱居而不嫁祇將直道而自媒今者幸寓樂郊况棲靜室簞屨則不勞涉遠簞瓢則永遂安貧豈謂愛閒誠堪養勇三年就學非<sup>缺</sup>慕蘭之心一日成功願滿依劉之志下情無任感恩激切兢惕之至謹詣衙門祇候陳謝謹狀

出師後告辭狀

右某伏念來從異域託在德門昔曾名列桂科未知稱意今忝職居蓮府始覺榮身恩既厚於稻梁跡能安於萍梗日增學殖月贍書糧豈期市駿之金榜沾



駑蹇唯愧封侯之印未效禎祥今者屬以大憝逋誅  
中朝多難頃煩豹略佇滅豺聲伏惟太尉相公身耀  
福星均臨庶類手傾霖雨遍洗妖氛遠命舟師重興  
國祚華夷則望風競扑蠹植則剋日當蘇若某者空  
有肺腸方重禱祝恨無羽翼一遂奮飛望龍節以魂  
銷窺虎威而股慄雖則熊羆之力共喜安人其如犬  
馬之心常增戀主下情無任攀依激切涕泣之至謹  
狀

謝令從軍狀

右某適見客司奉傳處分令借舟船隨從行李者深

恩旣降壯氣潛伸勵心而願效驅馳感德而難勝踊  
躍伏以某塵中走吏海外腐儒五能非自濟之資一  
割無可施之處唯增慷慨已分沉淪豈無投筆之心  
時應未偶空有請纓之志力且難成誰謂忽被殊私  
不遺賤跡許隨旌旆借賜舟航蹇足無堪敢望維駒  
之念麼姿何幸遽叨泛鷁之榮况當泣路之時永荷  
濟川之賜下情無任感戴欣躍兢惕之至謹狀

謝借舫子狀

客司奉傳處分借賜舫子安下者某方脫窮鱗得攀  
畫鷁自慙跡在塵吏忽訝身爲水仙則彼甘寧割錦



纜而呈奢顧愷毀布帆而無恙豈若榮棲德宇又泛  
仙舟風波無失所之憂烟月有搜吟之暇况清流滿  
望暑氣銷威每當定志安神則乃銘肌刻骨謹課七  
言長句詩一首齋沐上獻于瀆台塔下情無任荷戴  
兢惕之至謹狀

謝許奏薦狀

右某昨日見衙前兵馬使曠師禮奉傳處分特賜慰  
問兼許奏薦令自修狀本來者俯慙蓬跡仰聽蘭言  
喜抃而身輕欲飛兢惶而心戰難遏何者某職叨鄭  
驛已謂極榮名達堯階實爲過望憑何展效佩此恩

光况乃朗鑑冰開英才霧集所宜倒屣則先迎王粲  
築臺則次接劇辛如某者輟耕海上之田來泣塵中  
之路雖云游學尙未成功豈料勤勞莫副於指蹤將  
念已全於卵翼許令伐善將使警愚每思郟子之驟  
稱深慙速謗欲效黃公之多讓又恐失時冀緝拙詞  
仰遵嚴命南宮适之問宣父實有所歸東方朔之對  
漢皇寧辭自責旣忝風雷之變化佇期雨露之沾濡  
下情無任感戴榮抃兢灼之至謹奉狀陳謝謹狀



桂苑筆耕集卷之十七

國家圖書館, NATIONAL CENTRAL LIBRARY, TAIWAN, R.O.C.





桂苑筆耕集卷之十八

書狀啓二十五首

賀破淮口賊狀

賀高司馬除官狀

謝職狀啓二首

謝加料錢狀

謝衣段狀

謝借示法雲寺天王狀

謝示延和閣記碑狀

謝改職狀

謝探請料錢狀

與恩門裴秀才求事啓

前湖南觀察巡官裴啓

獻生日物狀五首

端午節送物狀二首

謝新茶狀

謝櫻桃狀

謝冬至節料狀

謝寒食節料狀

謝社日酒肉狀





謝正段狀

賀破淮口賊狀

右某昨日竊聆淮口鎮狀報今月八日諸軍合勢殺戮狂賊已盡者伏以徐州賊黨偶因嘯聚敢恣喧張鷓臬同巢勢必不久蟻蝨相吊生能幾何猶懷拒轍之心未有返轅之意伏賴太尉相公雄聲遠振妙略潛施謀安四方決勝千里遂使淮山樂境長承虎豹之威泗水孤城免作鯨鯢之餌功著於暫勞永息計資於彼竭我盈小盜旋除中興可望三軍之勇氣方振百姓之驚魂再蘇但仰恩威咸增抃躍謹祇候陳

賀謹狀

賀高司馬除官狀

某啓伏承司馬二十五郎榮膺寵命伏惟感慰伏以漢朝美仕稱太傅少傅之榮晉代高流誇大阮小阮之譽然而但欲脫身於利祿無非縱志於歌吟於臣則虧報主之誠爲子則失榮親之節豈期太尉相公重言天應美命風行遂令司馬二十五郎掛綵衣披朱綬動高堂之喜色振德宇之嘉聲佐理多閒藹餘芳於玉樹連官獨貴掩前哲於竹林某每愧小儒忝棲大厦覩鷓鷯之逸勢貯燕雀之歡心下情無任抃



躍之至謹奉啓陳賀謹啓

謝職狀

右某志雖求已藝不及人伏蒙太尉相公仁慈肉被摧骸翼成瘕卵難飾片言隻字粗伸感德懷恩今則久貯血誠敢憑毫素先甘鼎鑊仰黷旌幢謹具長書咨陳下情無任戰灼之至伏惟特寬罪誅俯賜念察謹狀

長啓

某啓某伏以短綆不可以汲深頑鋒不可以剗滯是故不能者止周任有言自宜量力而行豈可從心所

欲某東海一布衣也頃者萬里辭家十年觀國本望止於榜尾科第江淮一縣令耳前年冬罷離末尉望應宏詞計決居山暫爲隱退學期至海更自琢磨俱緣祿俸無餘書糧不濟輒携勃篋來掃膺門豈料太尉相公迥垂獎憐便署職秩跡趨鄭驛身寓陶窓免憂東郭之貧但養北宮之勇去年中夏伏遇出師忽賜招呼猥加驅策許隨龍旆久倚鷁舟每恨布鼓音凡鉛刀器鈍縱傾肝膽莫副指蹤遽蒙念以慕善依仁特賜奏薦重言天應忝獲超昇若非九重倚賴於功名十道遵承於法令則其恩命亦豈肯許某自江



外一上縣尉便授內殿憲秩又兼章綬且見聖朝簪  
裾烜赫子弟出身入仕二三十年猶掛藍袍未趨蓮  
幕者多矣况如某異域之士乎昔有一日九遷無以  
及斯榮盛某嘗讀魯論見仲尼使漆雕開仕對曰仕  
進之道未能究習善其深志夫子致悅某雖慙不敏  
竊有慕焉昨蒙恩慈特賜轉職尋已具狀陳讓兼納  
所賜公牒伏奉批誨卽有勅命但請收之某旣蒙未  
允至誠固且仰遵嚴旨立愧形影坐驚神魂每當夜  
對寒釭曉窺清鏡感激而頤橫涕雨憂惶而背浹汗  
漿雖榮擺脫於風塵倍赧汚瀆於門館伏以太尉相

公雄名峻望碩德茂勳不唯雲覆九州抑亦風揚萬  
國寓目傾耳仰爲指南儒武所歸一人而已是以諸  
道景附馬首是瞻其如都統巡官須選人材稱職外  
塞四方之望內資十乘之威若今某塵玷恩知尸素  
缺位但恐買戎狄之笑沽史傳之譏昔漢朝金日磾  
常在武帝左右帝欲別加寵遇日磾辭曰臣外國人  
且使匈奴輕漢某今日之請實在於茲諸廳郎官早  
陳公議蓋以賤無妨貴欲令夷不亂華某伏自前年  
得在門下更無知識唯謁諸廳幕中垂情幸而獲宥  
竊聆太尉相公去年夏於東塘顧問某之時諸郎官



同力薦揚和之如響遂沾厚遇遽竊殊榮昨者繼陳  
讜言不徇尊旨實乃惜太尉相公之名望存淮南藩  
府之規儀事體不虧裨贊斯在冬末面奉處分欲使  
別開院宇雖承恩諾轉切憂懷何者六韜曰人才大  
小猶如斗也不可盛石滿則棄矣故孔子云孟公綽  
爲趙魏老則優不可以爲滕薛大夫今者甘寘嚴誅  
輒傾真懇乞解所職官謗可也伏惟太尉相公特賜  
允從今得其所儻蒙未垂擯棄猶許依棲則望成別  
補冗員或薄支虛給一枝數粒可養羽毛斗水尺波  
得安鬢鬢固非矯飾廉讓爲名實願揣量分涯免成

負累恩德春秋傳曰齊侯使敬仲爲卿辭曰羈旅之  
臣免於罪戾施於負擔所獲多矣敢辱高位請以死  
告使爲工正不失令名故事昭彰卑誠悃悞守道而  
得無慳矣登門而免見刑之但願藥白畱恩終有凌  
雲之望著簪掛念永無委地之愁干冒台威下情無  
任懇迫憂兢之至謹啓

謝加料錢狀

右某今日某官奉傳處分每月加給料錢二十貫者  
某厚沾職俸過贍書糧羝羊之角且不羸鼯鼠之腹  
能易滿唯憂福盛難報恩深豈料筆端乏白鳳之詞



日無可效囊底獲青鳧之術月有所增但懷臨谷之心恐敗負山之力唯願除供陋巷之食分濟遠鄉之親同感厚恩永傳遐俗或成浮費必速幽誅下情無任荷戴兢惶涕泣之至

謝衣段狀

某啓伏蒙恩慈賜及生衣段一十疋者伏以風雖解愠日可畏威始當蒸鬱之時忝受鮮華之賜敢效八公之侶欲銜六銖但隨百姓之歡同歌五袴况乃某幸趨台階榮託德門實資千載之遭逢每濟四時之服飾愍念而情踰父母稱揚而禮異賓僚今者輕縠

衫材細練構制俾趨黔幕許曳鄒裾雖恩耀遠人足呈妍於鮫室而名慙奇士甘致刺於鵝梁下情無任感戴之至

謝借示法雲寺天王記狀

某啓昨日伏蒙恩慈借示修法雲寺天王碑綵毫乍閱俗眼初醒唯慙鐵印之傭流忽覩銀鈎之妙迹既成國寶豈許家藏竊聆將勅貞碑始揮神筆風亭減暑天酒呈祥固知垂露之蹤便成甘露况假崩雲之勢永耀法雲宜乎琬琰之詞鎮彼琉璃之地共傳嘉瑞遠振芳聲然則隋煬帝之故都永爲寶窟謝將軍



之舊宅終作福田下情無任捧讀祠禱榮懼之至其  
碑謹專諮納謹狀

謝示延和閣記碑狀

某啓昨日觀察衙推邵宗奉傳處分賜及延和閣記  
碑本一軸者跪展真蹤仰窺臣節對銀鉤而手舞足  
蹈望玉輦而魂飛膽揚伏以太尉力贍補天心勤捧  
日遂啓遷都之議佇聆徒蹕之期恭候宸遊儼成壯  
觀但以尋章摘句素非吳王之心進牘抽毫唯在陳  
王之命爰令幕客謹撰碑詞支使侍御丘門顏回融  
帳盧植能揮直筆妙寫尊襟叙三年望幸之丹誠則

鼓傳衆聽述一片勤王之忠節則鏡照羣迷實乃酣  
飫德馨備陳事實永使奇功祕略皆令陋古榮今太  
尉相公志切迎鑾喜勝覽檄旣贊美於凌雲百尺將  
掩能於入水八分遂乃親染綵毫俾鐫翠琰隨手而  
龍蛇旋活迎鋒而劒戟交橫畫玉點珠豈可比蘭亭  
醉本撇雲挑霧只宜示蓬島真仙誰料末儒亦叨殊  
貺輒敢覬覦將顧是知誘諭庸庸何則名題桂官跡  
隸蓮府雖忝一時之有遇實無萬代之可稱今者支  
使侍御以好善心得稽古力騁真才子之藻思辱大  
丞相之筆蹤推爲賓席殊榮別是儒家盛事則彼郭



隗受黃金厚禮虞卿沾白璧深恩強欲比方却成浼  
瀆然則四方舐墨含筆之士也莫不競效顰眉之態  
潛希唾口之恩仰脩脩然勤慥慥爾如某者學海至  
海雖云有心執柯伐柯猶恐傷手持斲筭而徒增健  
羨遇神錐而便欲投降唯願讀五千卷之書庶幾入  
室把十九年之刃無愧發硎每覩仙書更敦壯志稍  
希異闕黨童子何敢望儒林丈人其所賜碑唯慎捧  
持敢矜披閱待過天池之外遍誇日域之中想彼驪  
龍領下之珠永當減價巨鰲頭上之客必欲偷看下  
情無任寶玩師仰之至

謝改職狀

右某伏蒙仁恩特賜公牒改署館驛巡官令隨旌旆  
西去者雖命重難荷而身輕欲飛稱心懷捧檄之榮  
滿口詠從軍之樂唯慙幽劣有辱獎憐感恩而既識  
海深舉步而但憂冰薄况無孫搴之精騎自比顏峻  
之小兒將何以剖析事機游揚德業然所願者得睹  
龍飛玉劔豹掣牙旗風雷振大捷之聲日月照中興  
之運則某也有望於一言長價或爲天上之人萬里  
從知免作池中之物行唯踴躍坐則禱祠下情無任  
榮抃兢灼之至謹齋沐祇候陳謝



謝探請料錢狀

某啓某頃者西笑傾懷南音著操蓬飛萬里迷玉京之要路通津桂折一名作金榜之懸疣附贅乃是常常之事徒云遠遠而來海隅未覺於榮家江徼况勞於佐邑由是詠南陔而引咎望東道以知歸伏蒙太尉念掃德門許遷代舍濡毫染牘深慙雪苑之清才頂豸腰魚遽忝霜臺之峻秩傳天上披衷之命榮日邊垂白之親以宣父見知則實同陳隼以遠人多幸則不讓漢貂雖乖就養無方久想宗族稱孝然而烟波阻絕難申負米之心風雨淒涼空灑梁山之泣旣

疎溫清又闕旨甘但切責躬敢言養志况又無鄉使難附家書唯吟陟岵之詩莫遇渡溟之信今有本國使船過海某欲買茶藥寄附家信伏緣蹄涔易竭溝壑難盈不避嚴誅更陳窮懇伏惟太尉念以依門館次三千客別庭闈已十八年旣免行傭有希反哺特賜探給三箇月料錢所冀祿遂及親遠分光於異域志能求己永投跡於仙鄉干瀆台階下情伏增感泣兢慙懇迫之至其請錢狀別具上呈云云

與恩門裴秀才求事啓

某伏念身托德門光生異域雖池蛟得雨無沉埋末



路之憂而海燕含泥有點汚畫梁之罪跡賤而兢惶  
倍切恩深而展效何期豈合更寫卑誠仰塵尊德但  
以事非獲已情或可哀不辭鈇鉞之誅冀滿斗筲之  
望伏緣某昨聆座主侍郎主銓東洛道路不通且在  
襄州行李極困早欲發遣專使切緣力未副心今有  
諸兄弟裴瓌遠將窮懇相告輒具別狀干瀆台階下  
情無任戰灼之至

前湖南觀察巡官裴瓌啓

右件人是某座主侍郎再從弟某去乾符三年冬到  
湖南起居座主侍郎之時見於諸院弟兄中偏所記

念自數年繼遭剽劫生計蕩盡骨肉凋零久在江南  
近投當府願披情懇泣告尊慈駐留多時不幸疾苦  
遂且扶持發去云欲逕往襄陽迎接侍郎今得書云  
行至滁州前去未得道途既阻溝壑是虞况乃孤孀  
三十餘口更無產業未卜定居伏緣某家寄日邊路  
踰天外杳無來信固絕他圖既無寸土以分耕寧有  
尺波而假潤是以不量僭越輒具薦論命懸沸鼎之  
中目斷台階之下非不知捋虎鬚之險非不知探龍  
額之難但緣既忝門生豈論賓貢鴛鸞之與螻蟻感  
恩皆同多士之與遠人報德何異伏乞太尉相公念



以程窮計盡缺其柱促聲哀特賜於廬壽管內場院  
或堰埭中補署散職所冀月有俸入便獲安家裴瓌  
卽自到襄州令弟壽仰副驅策不度涯分浼瀆尊嚴  
下情無任感泣兢懼之至

獻生日物狀

某啓伏以降跡仙山爲行恩於俗界挺神維嶽期定  
亂於危時是以杞梓材長松春壽永名字已標於金  
籙兵符暫理於玉鈐伏惟太尉相公員嶠稟靈尼丘  
誕質大任天降中庸日彰四夷識傾膽之門遠棲仁  
蔭萬姓歸返魂之域盡飽德馨况今秦甸停氛鎬京

聚孽息虎旅奔沉之患望豹篇擒縱之機暫施決勝  
之謀永致昇平之運則必坐寧環海後當去會瑤池  
五色輕雲鎮隨行止千年素鶴競效驅馳獨保長生  
却登眞位調鼎佐玉皇之命銜杯聽金母之歌自此  
漢室公卿仰羨而空知望斷仙家朋友相逢而不訝  
來遲某居近鰲峯遇深驥坂每睹張良之術唯吟郭  
璞之詩喜對今辰敢陳善祝龜虵病骨叨承救活之  
恩鷄犬癡心竊有奮飛之望下情無任虔禱依攀欣  
抃之至輒以海東藥物輕贖尊嚴謹具別幅伏惟俯  
賜念察謹狀



又狀

某啓某聆天降賢人濟天下之人也是以材合地寶性契天和高關德門深匡帝室伏惟太尉相公漢師仙格魯聖儒機推心於三代之英鍊氣於五行之秀今者正融韶景共慶誕辰四方飽開閣之恩萬族獻稱觴之懇伏惟龍韜暫展靜卷妖氛鳳輦遄歸永興清運然後誠白石生之妙術從赤松子之勝遊鼇頭擎五色之雲久勞西望豹尾指二京之路斲事北征佇揚滅寇之勳便舉朝眞之禮某棲身大厦祝壽中春下情無任禱祠歌詠欣躍之至謹具別狀輒申微

誠伏惟恩慈俯賜念察謹狀

物狀

海東人形蓼一軀 銀裝龕子盛

海東實心琴一張 紫綾帛盛

右伏以慶資五福瑞降三清中春方盛於香風上德乃生於遲日凡荷獎延之賜合申獻賀之儀前件人蓼並琴等形稟天成韻合風雅具體而旣非假貌全材而免有虛聲况皆採近仙峯携來遠地儻許成功於藥臼必願捐軀如能入用於蓬壺可知實腹誠慙菲薄冀續延長塵黷尊嚴倍增戰灼伏惟俯賜容納



下情幸甚

蓬萊山圖一面

右伏以重陽煦景仙界降真雖長生標金籙之名而衆懇祝玉書之壽前件圖千堆翠錦一朵青蓮雪濤蹙出於墨池鯨噴可駭雲嶠湧生於筆海鼇戴何輕不愧瑣微輒將陳獻望臥龍而股慄隨賀燕以魂飛伏惟略鑑心誠俯賜容納所冀近台座而永安寰海展仙齋而便對家山許沾一顧之榮預報三清之信輕贖視聽下情無任禱祝歌謠兢灼之至

人蔘三斤 天麻一斤

右伏以昴宿垂芒尼丘降瑞始及中和之節爰當大慶之辰仰沐尊慈合申卑禮前件藥物採從日域來涉天池雖徵三極五葉之名慙無異質而過萬水千山之險貴有餘香不揆輕微輒將陳獻所冀海人之藥或同野老之芹伏惟特恕嚴誅俯容情懇續靈壽則後天而老駐仙顏而與日長新下情無任禱祝忻躍兢惕之至謹狀

端午節送物狀

織成鞍幪一條

右伏以晏陰將定令節俄臨遇天地之仁時睹江淮



之樂境伏惟太尉應五百年之運用八千歲爲春仰  
贊薰風高揚畏日不暇渡瀘之役自成匡漢之謀某  
忝在末寮合陳微禮前件鞍幪駕機呈妙獸錦成華  
當懋影於追風或資光於照地伏願鞍也助百福永  
安之慶幪也表四方率服之誠干瀆尊嚴下情無任  
禱祝兢惶懇激之至伏惟俯賜容納謹狀

雪扇一柄

右伏以星火揚輝雲峯聳影遇陳太守饗遙祠之節  
效華封人祝仙壽之誠前件扇細糝飛綿輕舖凍練  
雖假丹青之跡實含潔白之姿裁規則不學齊紈空  
誇圓月委質則願依孫閣得振仁風謹獻台塔無任  
悚慄伏惟俯賜容納百生榮幸謹狀

謝新茶狀

右某今日中軍使俞公楚奉傳處分送前件茶芽者  
伏以蜀岡養秀隋苑騰芳始興採擷之功方就精華  
之味所宜烹綠乳於金鼎泛香膏於玉甌若非靜揖  
禪翁卽是閒邀羽客豈期仙貺猥及凡儒不假梅林  
自能愈渴免求萱草始得忘憂下情無任感恩惶懼  
激切之至謹陳謝謹狀

謝櫻桃狀



右中軍使俞公楚奉傳處分伏蒙賜及前件櫻桃者  
伏以三春之下始閱羣芳百果之中獨誇先達綴仙  
露而堪教鳳食被德風而肯許鶯含遂令摘自喬枝  
分其美實豈期末品亦荷深恩捧持而色奪楚萍咽  
嗚而味欺蘇橘何必貯赤瑛盤上最宜對白玉樽前  
勻排萬顆之珠不唯眼飽似服一九之藥便覺身輕  
下情伏增感戴之至謹奉狀陳謝謹狀

謝冬至節料狀

右伏蒙仁恩特賜前件節料者伏以某忝棲德宇不  
愧異鄉萬里滄波雖恨絕東來之信三冬愛日且歡  
迎南至之辰豈料尊慈別垂厚賜玉粒既資於同穎  
霜華乃出於兩歧不勞大嚼之言却懷中聖之慮莫  
識酬恩報德唯知飽食醉吟下情無任兢懼之至謹  
狀

謝寒食節料狀

右伏蒙仁慈特賜前件節料米麪羊酒等者伏以  
人舉令回祿沮威正吟化俗之仁風又對順時之甘  
雨仰沾豐饌遇瞻新炊况乃蟻慕芳羶蛆浮清醞捧  
恩光而飽飫豈止三朝玩春色而醺酣可期千日祗  
知歌詠何報陶勻下情無任感戴之至謹奉狀陳謝



謹狀

謝社日酒肉狀

右伏蒙恩慈特賜前件酒肉等者伏以候燕應期句  
龍受祀一半之韶光欲老千般之旅思相攻只知吟  
樂國之春豈料捧仙家之賜陵分甘毳淮減香醲想  
田夫醉舞之場起海客狂歌之興敢效陳平壯志便  
發大言唯尋徐邈前蹤略判中聖其肉並酒謹跪領  
訖下情無任感戴之至謹狀

謝正段狀

緋羅 紫綾 紫天淨紗 紫平紗

黃平紗 黃綾 黃絹 熟綿綾袴段

右伏蒙仁恩特賜前件正段霞舒鳳縷雪疊鮫綃猥  
分絳帳之餘俾換褐袍之飾不學王尼巧說遽叨盧  
志殊榮唯慙螻蟻之姿不稱蜉蝣之什但願勵食蘗  
飲冰之節報披朱拖紫之恩下情無任感戴兢惕涕  
泣之至謹奉狀陳謝謹狀







桂苑筆耕集卷之十九

狀啓別紙雜書共十二首

上座主尙書別紙

賀除吏部侍郎別紙

賀除禮部尙書別紙

濟源別紙

迎楚州行李別紙首

五月一日別紙

謝降顧狀

與金部郎中別紙二首

與客將書

謝宋絢侍御書

答裴拙庶子書

謝高祕書亦長歌書

謝李瑄書

謝元郎中書

謝周繁秀才以小山集見亦書

與壽州張常侍書

賀楚州張義府尙書

與假牧書





上座主尚書別紙

不審近日尊體寢膳何似道惟滌慮德以潤身致五福之併臻迎百靈之所薦伏惟節宣無爽時望有歸某竊窺曩史之傳芳備載達僚之晦跡疏太傅登其祖帳僅涉沽名陶朱公泛彼栢舟未忘邀利豈若尚書中庸守志大隱存神表獨見之能察未萌之事遂得高揚素節夙避危時到處烟塵不污指鴻之目終年雲水能怡夢蝶之心然而宸鑑屢回物情猶鬱欲作山中宰相其如天下蒼生卽期大駕還京必赴上台虛位斯乃萬乘瞻矚四方禱祈某海燕含泥黍棲

雲屋池蛟得雨早脫塵塗感恩自比於互鄉仰德但思於闕里唯願泥沙賤質永資陶冶深恩卑情不任攀戀虔祝涕泣之至謹狀

賀除吏部侍郎別紙

某啓伏承榮膺寵命伏惟感慰張司空之一匡西晉則藻鑑無倫謝太傅之忽起東山則烝黎是念苟欲幽棲悅志獨處忘懷緘輝而恥耀秦臺蘊味而懶調殷鼎則乃智者仁者止傳樂山水之名賢才俊才盡失脫塵泥之望羣情久鬱美命遂行今者侍郎靜揖巖扉高提銓管萬族仰清通之譽一時進寒素之徒



致使關中之寇孽災消海內之英雄道泰近又竊聆  
風議仰測天心必謂文司再歸重德然則任賢得地  
既叶五百年之期好學趨門必盈七十子之數繼集  
仙遊於蓬島盛傳儒禮於杏壇既搜虹玉驪珠皆成  
國寶佇見臺鸞閣鳳永作家禽某伏思萬里無依久  
勞漂蕩十年有遇幸遂奮飛異鄉榮垂白之親達路  
忝披朱之飾昔名士爲李公御者喜抃猶多今遠人  
稱尼父生徒光輝無比陳至懇而喙輸三尺望深仁  
而腸結九回下情無任抃賀踊躍感激之至伏惟俯  
賜念察謹狀

賀除禮部尚書別紙

伏承天恩榮膺寵命伏惟感慰昔子貢曰夫子之文  
章可得而聞夫子之言性與天道不可得而聞也然  
則至於四科弟子窺測尚難况是萬里遠人鑽仰何  
及固不效尤於篆刻請益於琢磨強搜類鶩之詞是  
黷猶龍之德今者遠聆美命俯切歡心望峻中臺迥  
冠鴛鷺之列恩深大厦空傾燕雀之誠伏惟捨念雲  
泉拯民塗炭輔弼契千年之運奸雄避七日之誅某  
跡忝諸生身拘碎職末由陳賀下情無任抃躍兢惶  
禱祝之至伏惟俯賜念察謹狀



濟源別紙

不審近日尊體何似伏想孟津別壤沈水清源風晴而欹枕泉聲雲曉而卷簾山色既見境含秀麗固當道脫冲和伏惟每慎寢興早歸燮理顯驗月中之夢贊成天下之春卑情無任攀戀禱祝之至謹狀

迎楚州行李別紙

不審近日利涉長淮尊體寢膳何似伏以源滋桐栢浪接蓬萊雖漸臨鬱悞之期而宛對清虛之境開樂鏡而真同月映泛膺舟而况值風調誰言避地之行實叶濟川之業伏惟緩飛仙棹靜運真筌庶納休禎

每加遵護卑情懇望謹狀

又

某啓今月某日專使至伏蒙恩慈特降尊誨跪讀欣抃不任下情伏審尚書遠赴天庭將遵水道整蘭橈而思郭泰指桂苑而訪劉安睹神仙則楚俗皆驚聞雅頌則魯儒相賀况某材實慙於楛矢跡嘗列於蓬壺爲倚德門獲栖候府今者佇迎鶴駕卽覲龍章既知天幸遭逢唯切日深踊躍且曾哲陳浴沂之志只見虛談仲由悅浮海之言終非實事輒以管窺廷擊眞爲古陋今榮卑情無任攀戀欣抃兢惕之至云云



五月一日別紙

某啓伏以黃雀風高蒼龍星耀弄雨而梅雖應夏鋪  
烟而麥已驚秋時定晏陰缺資全德伏惟尙書處身  
無躁深守禮經視履考祥雅符易道恬澹則老聃讓  
美清虛則周顛懷慙冰光長泛於玉壺豈須獨映天  
意久畱其金鼎唯望親調方當鷁泛仙舟必見鳳銜  
睿筆入康帝室永福寰區下情無任虔禱鬱戀激切  
之至謹狀

謝降顧狀

某啓某未遂山棲尙從塵役所居官舍深在軍營雖

異衡門實同陋巷旣乏君章之蘭菊可襲馨香空餘  
仲蔚之蓬蒿偏資寂寞春日則蝶牽晝夢秋風則蛩  
助夜吟以此爲娛無他所覲今者方經離亂再獲起  
居但喜攀父母之恩却慙下兒女之淚况某叨榮秦  
爵就學漢儀姜維之膽氣雖麤鄧艾之口詞甚訥唯  
深感激莫備啓陳伏蒙尙書念以遠方察其獨立俯  
憐素志每煦溫顏聽及階及席之言佇銘骨銘肌之  
懇早來又蒙降三清之仙駕顧一畝之窮居方慙隨  
入室之賢豈料忝軾廬之念非所敢望將何自安莫  
不恩光遠耀於殊鄉卑迹永超於末路揣庸賤則華



夷有隔較輝榮則古今無倫數年乖豹隱之期常低俗眼此日覩鳳儀之後豁展愁眉下情無任感戴欣抃兢惕之至謹祇候起居陳謝謹狀

與金部郎中別紙

不審近日尊體寢膳何似既明且哲則詩美賢人視履考祥則易稱君子既樂持盈之道固安養素之機况屬遲日載陽光風遍煦燕歌鶯舞深資酌桂之歡智水仁山靜悅據梧之興伏惟永資景福早副急徵擲玄賞於烟霞濟蒼生於塗炭羣情禱望天下幸甚謹狀

又

某啓某仰審格言側窺性行人能弘道賢臣以致堯舜爲先世實須才俊士以效巢由是恥古者只傳於方策今也共仰於德門伏惟郎中大雅含清中庸處厚既以高名肅物能將全德鎮時柱晴空而嶽頂無雲瑩秋色而潭心有月比者蘭拋粉闥竹領朱轡出分天子之憂來慰海人之望况彼郡也戶吞越水窓列吳山得袁宏舉扇之風靈濤縮怒使謝運枉帆之路釣渚含春及其五袴傳歌百錢流譽尋迎睿渥遙陟華資懷寶令名誰發迷邦之間司珍正位佇成匡



相苑會稿卷十九  
國之謀而乃得之若驚直而不倨選勝於巖軒澗戶  
貪歡於酒賦琴歌久聆萬乘虛懷忍見四方失望今  
者梟聲向息鳳紀重興晉傅長才待示指南之制魏  
牟積戀佇申拱北之誠入覲奠塔坐調梅鼎豈止應  
月中之夢必期成天下之春然則致堯舜之大猷永  
匡宸扆效巢由之小節不介尊襟某遠賣鮫綃慙非  
重價仰趨馬帳忝預生徒下情無任攀戀禱祝兢惕  
之至云云

與客將書

某腐芥無依斷蓬自役長走而未離塵土獨行而轉

困路歧昨者遠抱危誠專趨朗鑒竽聲恐濫琴調空  
悲伏蒙將軍念以來自異鄉勤於儒道曲垂提挈得  
遂獻投指喻情深師冕不爲瞽者獎知言重卞和免  
作罪人荒淺何堪輝榮已極但以某無媒進取有志  
退居以詩篇爲養性之資以書卷爲立身之本却緣  
雖曾食祿未免憂貧趙囊則到處長空范甑則何時  
暫熱况乃家遙四郡路隔十洲窮愁則終夜煎熬遠  
信則經年阻絕時情冷澹俗態澆訛買笑金則易求  
讀書糧則難致天高莫問日暮何歸始知學者之心  
須託至公之力今幸遇相公山包海納雨潤風行有



片言可獎者稱譽出羣有小技可呈者隨材入用是以無一物不歸美化無一夫不荷深恩然則舉中國之人咸承煦育豈可令外方之士獨見棄遺某不揆庸才敢投清德豈料將軍許垂拯拔每賜吹噓他人之得喪榮枯皆推命分小子之昇沉進退只在恩私儻或特假重言終榮賤質唯托針能入線則同錐得處囊某已倚宦途粗諳吏道如能驅策未必跽藏終當富見室家豈憚職榮州縣實以流年易邁壯氣難申唯望庇庥得期變化所異燕棲雲屋永無巢幕之危鶴出塵籠稍識乘軒之便今欲專脩啓事再獻相

公少申感謝之懷預寫辭違之懇未知可否先取指麾且某也姜維之膽氣雖麤鄧艾之口辭甚訥縱申拜謁難具啓陳聊托牋毫代披肝膈未能患已先切求仁將軍之心若鏡焉無幽不察小子之身猶箭也唯命是從干浼旣頻慙惶益切伏惟終始俯賜念察謹狀

謝宋絢侍御書

伏蒙殊造俯念移居借賜官車得離旅館簞笈則免勞自負簞瓢則各識所安如承命駕之恩但勵抹輪之志今者卜鄰甚靜學殖可成唯肩袁粲之門不掃



陳蕃之室雖乘機立事輸他附勢之榮而守道安貧  
羸得愛閒之樂既諧素志但感深恩伏惟終始俯賜  
念察謹狀

答裴拙庶子書

某遠離海島宦江臯比者暫願退居稍期肄業來  
投樂國冀濟窮塗本望少瞻山資便諧谷隱伏蒙太  
尉念以雀有多病鶴自遠來特署職名俾趨恩化尋  
緣狂花有失腐芥無依轉知山鹿野麋唯宜退縮永  
謂鴻儔鵠侶不合攀瞻况乃器比斗筭之人身隨刀  
筆之吏旅舍既拘於雉堞閒門可設其雀羅自前年

伏承庶子暫阻朝天偶來避地便欲托金牌之幸會  
叙玉季之獎憐專候起居願搜誠懇蓋慮跡賤而動  
多悔吝才微而易見棄捐強自微攀舊恩是爲玷浼  
清德以此跼藏形影綿歷歲時雖知提筭有門唯恐  
負荆無路豈料庶子恕以未陳禰刺先降劉賤閱温  
言而楚纊覆身捧華翰而隋珠耀掌兼蒙賢弟起居  
未移曩顧遠賜榮緘不遺異域之人特辱同年之字  
金膏珠粉既垂摩拂之恩驥尾龍髯重有依攀之望  
莫不駑駘長價瓴甌生光不唯誇銜於親朋實所輝  
榮於遠俗謹當占筮撰日齋沐拜塵墮肝而盡瀝卑



相苑筆耕卷十九  
誠擢髮而少逃厚責其他所奉尊旨謹具別狀啓陳  
云云

謝高祕書示長歌書

伏蒙特飛榮誨寵示長歌玉海金山難測高深之本  
北方南國徒觀美麗之姿贊詠無塔師資有路但如  
青蓮居士唯誇散誕之詞白石山人只騁荒唐之作  
但以風月琴罇爲勝槩不以君臣禮樂爲宏規遂使  
千年萬年所流傳皆嗟大雅小雅之淪弊今覩四十  
三叔行出人表言成世資弄才子之筆端寫忠臣之  
襟抱在今行古旣爲儒室之宗憂國如家固是德門

之事天有耳而必當悔禍雲無心而亦可銷兵一言  
自此興危邦六義於斯歸正道則所謂陳平宰社爾  
曹何知鄧艾畫營其志不小永言他日足驗前程某  
畏影雖迷偷光匪懈旣知閱寶直若發蒙唯願將鵬  
舉篇章傳於異域豈獨以伯魚對答誇向同聲下情  
但增感戴欽仰降歎之至續專祇候陳謝

謝李瑄書

某啓某今月十日得祇候見太尉渤海風息蓬萊路  
通慙非席上之珍謬作壺中之客伏蒙溫顏見煦陋  
質增榮鳳翼龍鱗終容攀附癡鷹鈍犬特許指呼勉



其檢慎之心諭以獎憐之意此皆副使不遺薄藝累發重言始當獨臥北窓如蛙跳井豈料榮趨東閣似鶴乘軒風雲既識於因依冰谷不遑於安處感缺唯泣誠止無言伏緣既忝從軍難爲乞假不獲祇候陳謝

謝元郎中書

某啓伏蒙太尉恩慈特賜轉職不任歡慶某玄菟微儒焦螟瑣質早因慕善偶獲成名爾後客路多愁候門遼援麻衣始染於藍色竹簡尋摧其桂香伏自去年刺謁燕臺職叨鄭驛皆蒙郎中推心獎念假力薦

揚使孤根無委地之虞短翮有凌雲之望今者忽忝非常之遇深慙不稱之譏雖樂從軍敢安尸祿且鷄披隼翼已覺非宜鷄處鶴羣固當自責時日已具狀辭讓以此未敢祇候陳謝伏蒙恩私特降榮誨奉讀欣抃不任下情

謝周繁秀才以小山集見示書

昨日早謁玄成晚歸弊止覺戶庭之發光彩聞机案之散馨香遂因驚訊僕夫果得捧承畱示温辭一幅粲然受益之規雅什九篇蔚矣患多之思莫不振紀綱於六義飾冠冕於七言既崇大雅之基實播中和



之響伏以諸從事鴻儔鵠侶鳳翥鸞翔集桂苑之名  
都占蓮池之雅望二十三官卽先輩備觀周樂深閱  
楚材各陳贊詠之詞能展縱橫之作筆皆實錄機不  
虛張始窺八首之前只謂衛多君子終覽九華之後  
方知魯出聖人某今所以禱望者翠輦早遇東巡白  
環免勞西獻二十三官百步穿葉一飛冲天姮娥則  
迎入桂宮王母則引歸蓬島然後輟勝遊於御氣展  
長筵於濟時來登郭隗之臺坐弄陳琳之筆則乃今  
朝麗藻已掩八仙公之名他日賓筵必盈七才子之  
數見丘門之請禱待陳榻之解懸某使欲銜璧乞降

摳衣請益但以志勤詞戰雖將築室反耕道拙世塗  
僅類杜門却掃未獲面申感謝謹專修狀啓陳云云

與壽州張常侍書

當今聖天子在上賢丞相在下然而宿德令望而推  
者唯我上公暨滑臺中令兩地而已初常侍靜芟前  
弊權握使符我上公以理狀聞請爲真守帝惟曰俞  
後常侍撫安郡俗振肅兵威大元帥以雄才薦請貳  
前驅帝亦惟曰俞是得弄印分榮剖符行化踰月報  
政盡活疲毗實謂壽之人永居壽域矣則乃常侍遇  
賢丞相之知入聖天子之用乃武乃文多才多藝固



以播在四海某豈敢一二而談詠也今所禱願者碧  
幢紅旆高引前途相幕將壇別張勝地謂予不信神  
之聽之

賀楚州張義府尚書

國家自兵興已來爵賞既多官榮甚峻然而常恐授  
受之未能宜稱盡善盡美固當有待今則尚書以累  
世勲望以數年戰功始假使符旋迎真命某將趨清  
德獲聽好音欣抃之來雀躍而已則非獨喜尚書展  
龔黃之美政實乃賀聖天子之得良二千石也伏惟  
云云

與假牧書

伏以近日俗尚書題言矜贊祝苟非全德多是愧辭  
某執性近愚處身斯直以目所覩以耳所聆方敢詠  
歌固無諂笑某自達仁境如歸故鄉見百姓之安則  
知三軍之樂也見鄉閭之泰則知郡邑之肅也若非  
常侍寬猛相濟恩威並行則何以至村落之居室家  
相慶自近及遠嬉嬉然喜遇慈父然則政成一境名  
達九重卽計冠簪豐貂旗翻建隼榮膺真拜大洽羣  
情某每聽謳謠深增禱祝伏惟照察謹狀



桂苑筆耕集卷之十九

國家圖書館, NATIONAL CENTRAL LIBRARY, TAIWAN, R.O.C.





桂苑筆耕集卷之二十

啓狀別紙祭文

詩共四首

謝許歸觀啓

謝行裝錢狀

謝再送月料錢狀

謝賜弟栖遠錢狀

上太尉別紙五首

祭嶠山神文

陳情上太尉詩

奉和座主尙書三首

歸燕吟獻太尉

酬楊瞻秀才送別

行次山陽謝太尉

賜衣段

畱別女道士

酬進士楊瞻送別

謝楚州張尙書相迎

酬吳巒秀才惜別

絕二句

石峯

潮浪

沙汀





野燒

杜鵑

海鷗

山頂危石

石上矮松

紅葉樹

石上流泉

和友人除夜見寄

東風

海邊春望

春曉閒望

海邊閒步

將歸海東嶠山春望

和金員外贈嶠山清人

題海門蘭若柳

謝許歸覲啓

某啓早來員外郎君奉傳尊旨伏蒙恩慈念以某久

別庭闡許令歸覲者仰銜金諾虔佩玉音雖尋海島  
 以榮歸古今無比且望煙波而感泣去住難安伏緣  
 某自年十二離家今已二九載矣百生天幸獲托德  
 門驟忝官榮仍叨命服一身遭遇萬里光輝是以遠  
 親稍慰於倚門遊子倍榮於得路唯仰趙衰之冬日  
 深暖旅懷豈吟張翰之秋風遽牽歸思且緣辭鄉歲  
 久泛海程遙住傷烏鳥之情去懷犬馬之戀唯願暫  
 謀東返迎待西來仰託仁封永安卑跡今即將期理  
 但切戀軒下情無任感戴兢灼涕泣之至謹奉啓

陳謝云云



謝行裝錢狀

伏蒙仁恩特賜錢二百貫又令辦行裝者謹依處分捧領訖伏以某學虧力行事過心期燕鷲銜泥點汚常慙於廣厦鼇頭抃嶽低徊暗避於連鉤每慎行藏深規躁靜豈謂謙而受益或希屈以求伸今者果逢尊慈令將遠命榮歸故國免挈空囊比陸生南說之橐裝倍多輝煥異孔氏東還之輜重豈慮焚燒且彼虞卿白璧郭隗黃金徒欲耀名終非濟事是若念其就養愍以食貧減二十日之堂封濟數千里之家信累載莫申其勞苦一朝頓贍於旨甘寧親而旣佩銀

章倍榮衣錦戀德而但垂珠淚願效賣綃下情無任感恩榮抃涕戀兢惕之至云云

謝再送月料錢狀

某啓昨日軍資庫送到館驛巡官八月料錢伏緣某將命逮方已奉公牒暫離候館卽指歸程旣蒙別賜行裝豈令字缺二職俸缺難領受遂便送還不知庫司具狀申上上伏奉字缺二者筆飛雲鳳顯示深恩緝躍天龍仰資厚字缺二遂還家之望實驚潤屋之言遠地賤微雖有慙於字缺二故鄉親識必致敬於金多通神則益驗魯褒執癖則字缺四伏以尊卑禮隔辭讓無由



檇外筆錄卷二十  
謹依處分跪領訖下情無任感恩戀德激切徘徊兢灼之至云云

謝賜弟栖遠錢狀

某啓某堂弟栖遠比將家信迎接東歸遂假新羅國入淮海使錄事職名獲詣雄藩將歸故國昨者伏蒙仁恩特賜錢三十貫者伏以崔栖遠遠涉烟波大遭風浪僅存微命唯有空身雖志切鵲鴿竊慕在原之義而譽慙騏驥難期得路之秋銜蘆而但喜聯行泛梗而免虞失所今者某已榮奉使則遂寧親貨泉沾潤之名實稱子母歸路光榮之事皆屬善人下情無

任感恩欣躍兢惕之至

上太尉別紙

某啓昨以鄉使金仁圭員外已臨去路尙闕歸舟懇求同行仰候尊旨伏蒙恩造俯允卑誠今則共別淮城齊登海艦雖慙李郭之譽免涉胡越之言遠路無虞不假琴高之術巨川能濟唯懷傳說之恩下情無任感戀之至云云

又

某啓伏奉手筆批誨一行人並善將息穩風濤者俯顧微流仰窺尊念望淮海則陟遐自邇指風波則視



險如夷遍洒温言盡叨恩於挾纊缺敷至懇願無愧  
於賣綃下情無任感激攀戀兢灼之至云云

又

伏奉尊誨藥帑子懸於船頭不畏風浪慎勿開之者  
仰掛青囊遠踰碧海必使天吳息浪水伯迎風既無  
他慮於葭津可訪仙遊於蓬島唯願往來無滯忠孝  
克全萬里安流永缺濟川之力百年苦節不欺臨谷  
之心下情無任感戴兢灼之至

又

某舟船行李自到乳山旬日候風已及冬節海師進

難懇請駐留某方忝榮身唯憂辱命乘風破浪既輸  
宗慤之言長楫短篙實涉惠施之說雖仰資恩煦不  
憚險艱然正值驚波難踰巨壑今則已依曲浦暫下  
飛廬結茅茨以庇身糝藜藿而充腹候過殘臈決撰  
行期若及春日載陽必無終風且暴便當直帆得遂  
榮歸謹具別狀咨申伏惟云云

又

某啓自叨指使唯欲奮飛必期不讓秋鷹便能截海  
豈料翻成跂鼈尚類曳泥雖慎三思而行且乖一舉  
之儁既勞淹久合具啓陳某嘗讀國語見海鳥爰居



止於魯東門之外展禽曰今茲海有災乎夫廣川之鳥獸常知而避其災是歲也海多大風冬暖伏見今年自十月之交至于周正月略無鬻發缺覺溫燠必恐魯修濫祠豳改成詩靜思漢祖之興歌大風可懼遙想田橫之窟跡絕島難依遂於登舟近浦止泊籠鵠無失藩羊自安唯願時然後行必當利有攸往泛艤艘而不滯指渤海而非遙冀申專對之能早遂再來之望伏惟云云

祭嶼山神文

維年月日新羅國入淮南使檢校倉部員外郎守翰

林郎賜緋銀魚袋金仁圭淮南入新羅兼送國信等使前都統巡官承務郎殿中侍御史內供奉賜緋魚袋崔致遠等謹以清酌牲牢之奠敬缺懸于嶼山大王之靈竊以昔辨方圓始分清濁融作江海結爲山岳石戴土而土戴石小者礪而大者礪然而罕有威神靜無稜角與堆阜而相接見丘陵之可學惟靈磊磊落落高臨鯤壑嶼嶼崑崑俯壓鯨潭上則爲雲霧縈纏之骨下則爲波濤激射之窟朝則迎金鳥而前出夜則送銀蟾而後沒是以峻德能彰乎東夏西夷玄功不假乎南儵北忽則彼織女之機倚河漢秦帝



之橋架溟渤徒銜其名莫勞我形每謂蘊藏其片玉  
豈唯廁列於雙瓊遂使往來者虔虔英靈祈禱者盡  
寫精誠既蘋蘩之可薦信黍稷之非馨今者仁圭等  
久銜遠命致遠也始奉殷聘喜歸舟之既同佇遊轡  
之能並不患胡越之意殊寧慙李郭之名盛去歲初  
冬及東牟東屬以滄流尙遠玄律將窮浪形匆匆而  
鷁難浮艦風響羸羸而鵠恐辭籠遂艤剡木聊安斷  
蓬一昨雖迎端月猶懼俊風延頸而待逢候燕回眸  
而送盡歸鴻方期利涉龜從筮叶直指雞林輕浮芥  
葉豈輸馳馬之蹄願較秋鷹之捷遠詣靈峯難尋壽

宮但覩其青蓮倒蘸於巨浸碧螺高柱於晴空仰威  
靈之聳塵外想影響之飄雲中於是潔饋饁擇肥醲  
酒醴斯醺牲牲粗豐謹賚薄禮敢覬陰功伏惟大王  
潛施呼噏密降指蹤使波神拱手川后斂容楚師之  
南風且競鄭伯之東道割通照水鏡之心既分妍醜  
擘土囊之口無雜雌雄則可朝穿汗漫暮截鴻濛去  
採石華必同謝運行吟肉脯免效張融加以某臨川  
自審登木增懷憶昔雪作夜光冰爲夕飲幾年獨勵  
於鼓篋今日方期於扇枕將問荊州之絹忝披會稽  
之錦見寵若驚心如捧盈雖智有不逮而時然後行



相苑筆耕卷二十一  
况賈御筆慮滯王程今則裹裝旣飾儼有行色翫淑  
景以歌吟汎安流於瞬息唯托大王之風早歸君子  
之國俾傳帝命無曠神職尙饗

陳情上太尉詩

海內誰憐海外人問津何處是通津本求食祿非求  
利只爲榮親不爲身客路離愁江上雨故園歸夢日  
邊春濟川幸遇恩波廣願濯凡纓十載塵

奉和座主尙書避難過維陽寵示絕句三首

年年荆棘侵儒苑處處烟塵滿戰場豈料今朝覲宣  
父豁開凡眼睹文章

亂時無事不悲傷鸞鳳驚飛出帝鄉應念浴沂諸弟  
子每逢春色耿離腸

濟川終望拯湮沉喜捧清詞浣俗襟唯恨吟歸滄海  
去泣珠何計報恩深

歸燕吟獻太尉

秋去春來能守信暖風涼雨飽相諳再依大厦雖知  
許久汚雕梁却自慙深避鷹鷂投海島羨他鴛鴦戲  
江潭只將名品齊黃雀獨讓銜環意未甘

酬楊贍秀才送別

海槎雖定隔年迴衣錦還鄉愧不才暫別蕪城當葉



落遠尋蓬島趁花開谷鶯遙想高飛去

時楊生有  
隨計之行遼

豕寧慙再獻來好把壯心謀後會廣陵風月待銜杯  
行次山陽續蒙太尉寄賜衣段令充歸覲續壽  
信物謹以詩謝

自古雖誇畫錦行長卿翁子占虛名既傳國信兼家  
信不獨家榮亦國榮萬里始成歸去計一心先筭却  
來程望中遙想深恩處三朶仙山目畔橫

畱別女道士

每恨塵中厄宦塗數年深喜識麻姑臨行與爲真心  
說海水何時得盡枯

酬進士楊贍送別

海山遙望曉烟濃百幅帆張萬里風悲莫悲兮兒女  
事不須怊悵別離中

楚州張尚書水郭相迎因以詩謝

楚天蕭瑟碧雲秋旗隼高飛訪葉舟萬里乘槎從此  
去預愁魂斷謝公樓

酬吳巒秀才惜別二絕句

榮祿危時未及親莫嗟歧路暫勞身今朝遠別無他  
語一片心須不愧人

殘日塞鴻高的的暮烟汀樹遠依依此時回首情何



限天際孤帆牽浪飛

石峯

中和甲辰年冬十月奉使東泛泊舟於大珠山下凡所入目命爲篇名嘯月吟風貯成十首寄高員外

巉巖絕頂欲摩天海日初開一朵蓮勢削不容凡樹  
木格高唯惹好雲烟點酥寒影糝新雪夏玉清音噴  
細泉靜想蓬萊只如此應當月夜會羣仙

潮浪

驟雪翻霜千萬重往來弦望躡前蹤見君終日能懷  
信慙我趨時盡放慵石壁戰聲飛霹靂雲峯倒影撼  
芙蓉因思宗慤長風語壯氣橫生憶臥龍

沙汀

遠看還似雪花飛弱質由來不自持聚散只憑潮浪  
簸高低况被海風吹煙籠靜練人行絕日射凝霜鶴  
步遲別恨滿懷吟到夜那堪又值月圓時

野燒

望中旌旆忽繽紛疑是橫行出塞軍猛焰燎空欺落  
日狂煙遮野截歸雲莫嫌牛馬皆妨牧須喜狐狸盡  
喪羣只恐風驅上山去虛教玉石一時焚

杜鵑

石罅根危葉易乾風霜偏覺見摧殘已饒野菊誇秋



艷應羨巖松保歲寒可惜含芳臨碧海誰能移植到  
朱欄與凡草木還殊品只恐樵夫一例看

海鷗

慢隨花浪飄飄然輕擺毛衣真水仙出沒自由塵外  
境往來缺二字洞中天稻梁滋味好不識風月性靈深  
可憐想得漆園蝴蝶夢只應知我對君眠

山頂危石

萬古天成勝琢磨高高頂上立青螺永無飛溜侵凌  
得唯有閒雲撥觸多峻影每先迎海日危形長恐墜  
潮波縱饒蘊玉誰回顧舉世謀身笑卞和

石上矮松

不材終得老煙霞澗底何如在海涯日引暮陰齊島  
樹風敲夜子落潮沙自能盤石根長固豈恨凌雲路  
尙賒莫訝低顏無所愧棟樑堪入晏嬰家

紅葉樹

白雲巖畔立仙妹一簇烟蘿倚畫圖麗色也知於世  
有閒情長得似君無宿糝含露疑垂泣醉態迎風欲  
待扶吟對寒林却惆悵山中猶自辨榮枯

石上流泉

琴曲雖誇妙手彈遠輸雲底響珊珊靜無纖垢侵金



鏡時有輕颺觸玉盤嗚咽張良言未用潺湲孫楚枕  
應寒尋思堪惜清冷色流入滄溟便一般

和友人除夜見寄

與君相見且歌吟莫恨流年挫壯心幸得東風已迎  
路好花時節到雞林

東風

知爾新從海外來曉窓吟坐思難裁堪憐時復撼書  
幌似報故園花欲開

海邊春望

鷗鷺分飛高復低遠汀幽草欲萋萋此時千里萬重

意目極暮雲翻自迷

春曉閒望

山面嬾雲風惱散岸頭頑雪日欺銷獨吟光景情何  
限猶賴沙鷗伴寂寥

海邊閒步

潮波靜退步登沙落日山頭簇暮霞春色不應長惱  
我看看卽醉故園花

將歸海東嶼山春望

目極煙波浩渺間曉鳥飛處認鄉關旅愁從此休凋  
鬢行色偏能助破顏浪蹙沙頭花撲岸雲糝石頂葉



籠山寄言來往鷓夷子誰把千金解買閒

和金員外贈嶼山清上人

海畔雲菴倚碧螺遠離塵土稱僧家勸君休問芭蕉  
喻看取春風撼浪花

題海門蘭若柳

廣陵城畔別蛾眉豈料相逢在海涯只恐觀音菩薩  
惜臨行不敢折纖枝

桂苑筆耕集卷之二十